

中國方志叢書·華北地方·第五四一號


據

明嘉靖二十一年
呂栲纂修
本

影印

陝西 省

高陵縣志



成文出版社有限公司印行



10107862

中華民國六十五年 月壹一版

高陵縣志

全册

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

高陵縣志序

高陵古雍豫分州之地為都尉治所為馮翊
首邑為神臯涇渭所經灃朝治清濁趙氏漆沮
七水之所會也舊有志十餘葉弗傳未成書
也弘治庚戌邑人太守劉公嘗修之又弗傳
亦未成書也辛酉吾友凌堅呂子庸興於鄉
始更創志州後又第為太史氏志成又歷三
十年而後出時則由大司成為少宗伯全其

志爲帙二爲卷七爲目六十有二首地理者
志封域也及渠堰者盡力乎溝洫之書也管
隄田爲上且稱陸海者此也今誠舉鍾而雲
決渠而雨則澤民富國不在天而在人不在
古而在今矣次建置及舊署者志裁革而賦
如故也蓋嘗有丞簿矣今裁之胥驛遍矣今
裁之有他鄉里矣今裁之然夕小而任日重
者不可減站亭而濟他邑者不可復志之憫

人窮也蓋有拯援之心焉次祠廟寺觀而別
先後者辨邪正也亦不得已之意也蓋謂經
正民興則邪慝自無今奈之何其次戶租物
產者著水心所以養君子也歷數述者百五
庚績之所關也蓋元有授時歷高陵之賢實
精之故不得而畧也次禮俗抄略者著筮禮
也典禮行則信斯美矣次職官者有政典在
焉孔子之所學弗可忘也官師而傳及君庶

者詳也及馮嗣之守者以惠化在是幾於三
衢高耳志人物而及節婦科貢恩蔭者淫聖
子言之詳矣志即定陵墓者昭往以示諸來
也彼及陵豪傑之第即高王侯之墓亦不修
而名不稱者皆州木同腐爾矣孰得而志之
故昭往以示諸來者志陵墓而及卷且者春
燠謹微之義也是皆善政之蓄而寓乎醇樸
之道焉非淫聖子其孰能辨之皆嘉靖庚子

冬徐令至今公嗣應威明率辛丑令而行禁
而止矣乃問志子溼聖子刊而行焉夫有高
陵以未經二字率吳至溼聖子而志成由弘
治年首以來四十有一季矣至徐令而志行
君子謂是志待人而後成待心而後行也信
哉溼聖子夫心之所知也徐令名效賢字宗
義號几五四川江津人由舉人先任蒲城教
諭後陞於是焉

賜進士出身中大夫光祿寺卿谿田居士馬理撰

高陵縣志跋

弘治庚戌秋邑庠司訓西蜀夾江翟公宗器先生
一日過余家曰高陵志歷年旣久不惟失之太簡
抑且魯魚亥豕以訛傳焉馬遠達之不辨觀者病
之敢乞詳加修飾以便觀覽庶成一段之美事也
予固辭弗獲謹按舊志廣詢博訪質諸故老攷諸
史傳訂訛去僞拾遺補闕越三月蒐輯成編其所
編事宜見諸凡例茲不復贅爰命小兒時蘭庠生
蕭昂繕寫裝潢成帙以俟後之立言君子載加採

擇焉是禋冬十月

賜進士第中憲大夫前直隸永平知府邑人劉傑
跋

刻高陵縣志序

此涇野呂公所爲高陵志也君子于是志之行也
載尊之猶古訓然何也古彛教之陳先實後文蓋
由腹心之腴而鬯諸膚理其猷爲風化不可尚已
涇野公之爲是志也以之其諸異乎人之志與凡
我同方之士若徒玩心于其章美之炳蔚而忘有
事于敦本務實意或罔誠心或罔正頑弗誠廉懦
弗誠立焉殊無得于涇野公之志終亦古之棄也
有志于服古教化者敬之哉

嘉靖辛丑歲除日後學徐效賢頓首拜書

高陵縣志序

高陵志作者少崇伯邑人涇野呂公刻之者邑令
西蜀徐效賢也刻成謂予故高陵人先坐在焉宜
爲序志凡七卷凡十有四則其言約而盡其事核
而彰其議論允而確太史氏筆也其作志之良槩
乎夫鄉無名賢則文獻不興邑乏善令則政教不
立高陵西安之望邑也其產于斯者有若干元公
之恭儉仁愛有若楊轉運之浮雲興利有若楊文
康之特立獨行有若宋先生之仁孝禮義迄于今

則有若涇野公賢聖自期聞道有得予嘗推之以
爲今之伊川云其令于斯者修舉政教役志養民
亦惟有若劉仁師亦惟有若种師道亦惟有若張
翱亦惟有若張琦亦惟有若朱璜乃迄今有徐子
焉公廉愷悌儼古循良其殆庶幾矣乎夫鄉人者
鄉人之師也鄉有賢而罔師焉無志之士也前人
者後人之鑒也前有善令而背焉以逞賦民之吏
也然則高陵後進之英與夫嗣徐子而令者可不
知所從事哉可不知所從事哉

嘉靖辛丑冬十有一月丁未鄠杜王九思序

高陵縣志序

夫志者志其實非以飾輪輿而爲虛事也故志於
一邑一時而貽於天下後世苟事或隔微則疑信
相傳人將指摘併其名賢實跡而且詭焉何以志
爲高陵舊無志但有抄本率多缺遺漫無統紀不
足以信今而傳後識者惜之太史呂涇野公撰志
成編矣我徐侯將壽諸梓命予序於末簡三讀其
志首地理附以渠堰欲其知王政以民食爲先也
次建置欲其知因革以思古慮今也祠廟寺觀崇

正道以闢邪說也戶租兵匠物產驗登耗以制徵
賦也歷數觀天時以作人事也禮儀風俗以正禮
教也職官官師以定法程也人物節婦以端風化
也科貢恩蔭以考忠愛也終以邱宅陵墓者欲其
知生有實行則歿有令名也次第顛末雅有深意
作而嘆曰美哉此志咸正罔缺足爲世則誠非飾
輪轅爲虛車也昔明道在鄴晦翁在南康皆首重
其志今太史公於斯志編採垂三十餘年其意亦
甚厚乎徐侯清慎公敏而先務此可以占政矣後

之產於斯宦於斯者讀志而後其善焉回志之意也

嘉靖辛丑季冬靜齋劉守臣書

市醫集元

月

六

高陵縣志序

縣久無志舊志雖美亦多疎略弘治辛酉予忝鄉
舉卽事斯志往來京師篋載以行入翰林後秦晉
之越歷河海之奔馳稿未或忘垂三十餘年斯編
麤就今春學博楊子時亨以諸友之請使數士來
騰此稿予以未真不敢從命乃懇以請發篋與之
謄將終編徐侯宗義時以蒲城儒學教諭陞知高
陵蒞任未久卽念斯志請加諸梓予茲固辭門人
楊九式等曰我

國家百七八十年縣志不著豈非缺典况遇明侯欲行仁政多用教化適今不梓後復如先矣子始諾之式等取而詳加校書并增一二以答徐侯而劉岸又手圖三次志益章章或曰志先地理附以渠堰何也曰昔在周漢之間井田旣行溝洫未廢民食其利故不頌豐年則稱陸海阡陌旣開鄭渠名秦白渠名漢而澧潯灑滻諸水南灌群塍東漕支渠亦因是以名也厥後官雖設而他委渠旣久而或涇地征如初民力衰薄故地理渠堰志復初也


建置之志錄諸公署耳縣今裁減丞簿不設而局
驛館院之錄不亦多乎曰清平鄉析于三原孝義
安信張橋諸里析于臨潼縣如此其褊小也而稅
課猶舊馬驢牛車之站猶給他地民日滋貧縣日
滋罷其誰省憂故志建置以憫今也祠廟而後寺
觀者何抑異端也戶租兵匠物產通爲一志者何
以兵匠之力物產之財皆出于戶租耳洪範四五
紀五曰歷數蓋有國者之所事也高陵小邑耳而
述歷數不亦迂乎曰楊元甫元之大儒也被徵史

局作授時歷雖成于辛巳之年實可千有世行之無弊也以其縣人也故述之耳禮儀見行有儀注諸書可勿抄略矣曰儀注雖本于集禮而未備也又近年

聖皇御制孔子祀典記說未入會典窮鄉下邑之士安得聞之以裨從禮官之後嘗習聞於公所故因而志之不敢隱也其附以縣俗者且本禮儀以示必需耳職官之考亦以存舊章也官師之傳秦公子帝或爲君漢趙間翟方進或爲侯韓延壽或爲


左馮翊采入官師豈不濫乎曰事有關于其縣者
斯志之且去古則遠去今則遠雖詳乎古猶恐其
或畧也人物之志者凡以示後學耳生乎其前者
非一二學然多不傳者生如株木歿如秋草惡乎
傳傳之者言其真可承式者也故長厚不如漢周
文張叔端直不如唐于仲謚博學守道不如元楊
元甫孝廉不如今宋先生皆非夫也節婦亦人物
乎曰男子不如婦人者多矣昔有賢后人且以女
中堯舜目之矣科貢恩蔭正人物也而又後之何


也曰自科貢恩蔭而能學道卽人物耳不學乎道
是科貢恩蔭而已矣則何以邱宅陵墓終志也王
侯生曰官邱歿曰陵大夫士庶人生曰宅歿曰墓
故生有邱宅則歿有陵墓歿無陵墓猶生無邱宅
也語曰君子疾歿世而名不稱焉凡以慎其實于
生前也原陵偶陵亦名稱乎曰道雖不足位則有
餘故事有以位存者此之謂也又以見執政者之
防微也微能防則免夷狄猾夏而無原陵偶陵矣
嘉靖辛丑夏五月壬辰涇野呂構謹序



縣境圖 東北至蒲城二百二十里 東至渭南九十里

北至富平十五里





縣城迤北境圖

東北三原界

三杜村

仁宗廟

白馬寺

仁壽屯

晉文公廟

王化村

上石里

三水寨

丘店

孝義里

贈侍郎呂公墓

邑厲坊

縣城

郭橋


三皇廟


鄉厲壇址

后土宮

土地祠

縣衙北







--	--	--	--	--	--	--	--	--	--

高陵縣志目錄

卷之一

地理志第一

渠堰附

建置志第二

卷之二

祠廟志第三

寺觀附

戶租志第四

兵匠物產附

卷之三

歷數述第五

禮儀抄畧第六

縣俗附

職官考第七

卷之四

官師傳第八

卷之五

人物傳上第九

卷之六

人物傳下第十

科貢聞傳第十一

恩例貢附

卷之七

邸宅陵墓第十二

高陵縣志卷之一

地理志第一

高陵地理蓋自虞夏已爲名地大禹導水涇屬渭矣逮於縣南詩稱涇以渭濁亦本於此故雍州風土縣與其合周赧王時秦孝公置左輔都尉于此昭襄公遂封其弟公子卬爲高陵君漢隸左馮翊景帝起陽陵于縣西南三十里爲縣又曰陽陵王莽改曰千春其治在縣西一里城周三里光武東都後左馮翊自長安出治高陵長安乃爲京兆於是高陵有左馮翊城在縣西南二里其曰同州爲馮翊

之左自高陵而至之或西漢稱也故東漢言爲左馮翊者以高陵名宦言馮翊人者多高陵人物也魏黃初元年改爲高陵其治亦在縣西南後魏復徙于今所後周明帝元年析萬年縣入高陵萬年卽樂陽也而更置萬年于長安隋大業二年復爲高陵七年築城周二里百二十步今日土城爲儒學射圃北垣至唐爲畿縣亦隸雍州武德元年析涇河以南置鹿苑縣此地有鹿臺將軍祠云貞觀元年省鹿苑武后天授二年置鴻州以高陵及渭南慶山鴻門樂陽隸之大足元年廢而縣仍隸雍州會昌元年析清

鄉于三原以奉莊陵縣乃降爲赤矣宋仍爲高陵屬永興
軍元屬奉元路至正末李思齊又築鹿臺城于縣西南二
十五里尋亦廢

明興仍爲高陵屬西安府然又析東南數里于臨潼而縣
于是褊小廣二十八里袤三十五里其南省城東南臨潼
東櫟陽又東渭南東北蒲城北富平西北三原西涇陽西
南咸陽周禮雍州之域并鬼之次漢地志東并十六度至
柳八度爲鶉首于辰在未史記魏地鶉鱗參之分野其界
自高陵以東盡河東河內陳留潁川河南諸地廣雅曰北

斗樞爲雍州而高陵亦與其會是故涇渭屬流于前山原
遙峙于後清谷在左洪波在右蓋古形勝之區高明之國
宜乎周漢以來高賢端士接踵而出生乎其後者必不鶩
于偵利閑乎巧僞引惡伐善身詭于前賢以自卑也

渭河在縣南十里發源烏鼠山五泉冬夏人可躍涉歷岍
隴岐郿寶雞咸陽北受漳汭南受澧潏漭灞諸水至高陵
而益大每遇泛漲瀾漫十餘里然皆南徙不崩北岸雖且
崩數年不過一二丈故縣曰高陵云東至潼關入河
涇河出筭頭山歷平涼涇邠涇陽至縣上馬渡入渭故高

陵之遺長安直南行渭橋及新開渡而過涇渭河轉行黃
家渡過涇孫張渡始過渭其涇渭之間則高陵醴泉
地也渭橋渡在縣南十里北通蒲城富平諸縣故二縣皆
有一舟協濟新開渡在渭橋西三里黃家渡在縣西南二
十里當楊官寨前孫張渡在縣西南三十里當良村前
奉正原在縣南十里自涇陽來過縣達臨潼延幾百里高
者四五丈涇渭之不能北徙者此也故自周漢隋唐王侯
將相多葬于此又名降駕原者舊傳漢文帝誕於此原崇
皇地或曰誕於昆沙鎮又傳唐明皇兩幸此寺皆無考

鹿苑原在縣西南三十里自咸陽來當涇渭間亦名奉正原陽陵之所在也自陽陵之右漢周諸陵絡繹而西伏見交互龍虎隱映此二原其關中地形之勝與

渭北溝在奉正原上或曰亦先正引渭水以溉田者中作而輟涇野子曰近日叅政南京劉麟嘗曰使麟在陝西十年當無地不成河渠因問其策答曰北隨凹地以開渠南高涇渭之岸東杜入河之口如李冰壅江作壩法卽高陵櫟陽以北不讓江南諸郡然其策雖未易舉其志亦壯矣有志者念哉卽今西安之地北有鄭白諸渠南有灃澇漕

渭諸水府設水利同知一人故其地稱陸海稅額獨重于
他郡省也然今渠堰未通雖通不均而科徵如故如之何
民不貧且通哉

渭橋在縣西南漢文帝從代來次高陵使宋昌先馳之長
安觀變昌至渭橋丞相以下皆迎昌還報代王馳至渭橋
羣臣拜謁太尉周勃請間跪上天子璽符疑此橋當爲中
渭橋故蘇林註漢書在長安北二里而縣人相傳文帝生
于昆沙鎮故從代來復次于此鎮鎮通中渭橋路若東渭
橋則在縣南十里唐李晟所屯兵處其後自咸陽還軍仍

高陽州志 卷一
駐東橋竟從此地以入長安而劉德信援奉天之難亦嘗
進屯此橋以就積粟中橋柱七百五十今水落猶見一二
然其地今隸咸陽東橋圯廢無跡高橋在縣北三里中南
渠所經郭橋在縣東十里昌連渠經其下蓋自茲入清河
矣

阿石橋在迎翠門南一里潤人斗邊高望渠經其下張橋
在阿石橋東八里亦高望渠橋也

御井在接蜀門西十里唐高祖舊宅中井也梁開平中廢
今八角井口在龍泉寺中俗猶稱御井云

池馬泉在接野門外十五里相傳漢高祖飲馬於此高祖
廢湮

蓮池在縣東偏元時王知縣珪引昌蓮渠水遶城納水池
也今花木皆廢而址存詳渠堰

鹿苑果園在鹿臺下三輔黃圖云安陵有鹿苑果園夫安
陵與鹿苑相近然鹿苑實高陵地其土沙淖而肥故花果
獨盛今隸

秦府

渠堰高陵與涇陽三原櫟陽同體唐縣令劉仁師開五渠

于高陵其功尤大也昔者韓欲罷秦使水工鄭國說秦令鑿涇水自仲山西抵瓠口爲渠並北山東注洛三百餘里乃注填闕之水溉瀉鹵之地四萬餘頃收皆畝一鍾于是關中爲沃野秦以富强因名曰鄭國渠至漢武帝元鼎六年百三十六歲矣兒寬爲左內史奏穿六輔渠以益溉鄭渠旁高仰之田詔議咸令吏民勉農盡地利平繇行水勿使失時後十六歲大始二年趙中大夫白公復奏穿渠引涇水起谷口入櫟陽注渭中袤二百里溉田四千五百餘頃因名曰白渠民得其饒遂作歌

歌曰田于何所池陽谷口鄭國在前白渠起後

車重多雲致果爲雨涇水一石其泥數斗且此兩渠利也
且議長我禾黍衣食京師億萬之口

至唐高宗永徽六年雍州長史長孫祥及太尉長孫無忌
奏言往日鄭白渠溉田四萬餘頃今毀富商大賈碾磴得
水田纔六千二百頃玄宗開元九年京兆少尹李元紘奏
疏三輔諸渠毀王公家立碾磴者是後乃立水部式決洩
有時吠澮有度居上游者不得壅泉而專其腴每歲少尹
行視兵後寢失本根涇陽人果擁而專之公私四寶澤不
及下涇田獨肥他邑爲枯地力旣移地徵如初穆宗長慶
三年高陵令劉仁師乃循故事考式文又以新意請更水

道杜私竇遵正令列上便宜未行至敬宗寶曆元年端士
鄭覃爲京兆秋九月始具聞下丞相御史御史屬元谷實
司察視持詔詣白渠上盡得利病還奏上以谷奉使有狀
乃俾太常撰移京兆下其符縣主簿譚孺直實董之冬十
月百衆雲奔揆功十七八涇陽人又以奇計賂術士上言
白渠下高祖故墅在焉不宜以畚音本鍾近阡陌上聞命京
兆立止之仁師馳詣府控告具發其以賂致前事又謁丞
相請以纈血汚車茵丞相彭原公歛容謝曰明府眞愛人
卿入言上前翌日果有詔許訖工役仲冬新渠成季冬二

自新渠成後... 而舞曰春張六十年明府

雪之矣請名渠曰劉公堰曰彭城仁師彭城人按堰引而東千

七百步其廣四尋而深半之兩崖夾植杞柳為本下垂根

以作固上生材以備用仍歲旱沴間計切傷也而渠下田

獨有秋明年涇陽三原人又擁其衝為七堰以析水勢使

下流不厚仁師又詣京兆索言之府命從事蘇持至水濱

盡撤不當擁者由是邑人享其長利生子以劉名之立祠

彭城閘下曰劉公廟云詳唐學士劉禹錫所撰遺愛碑然劉之為渠實祖

鄭白二渠蓋二渠既受涇水下至涇陽縣北白公斗分三

限北限入三原櫟陽南限入涇陽中限則至高陵彭城關

下仁師乃分為四渠一曰中白二曰中南三曰高望四曰

禍音吳南其中南之支流曰昌連凡五渠中白渠自彭城

關東流經仁村至櫟陽北入清河表三十里其南七里為

中南渠自磨子橋經坳鳥交切下村東經高橋又東過孝

義坊入清河表五十有五里高望渠自磨子橋經魏村及

李趙村之間東過阿石橋陳楊村至臨潼境入渭表五十

有五里禍南渠自磨子橋西南流折而東經毘沙鎮原趙

村又東南過渭橋至臨潼境北田王入渭新開渡渭橋之

閘中有支流入渭昌連渠自縣西張市里分中南渠東渠
通遠門下經郭橋至臨潼境入清河宋太宗至道元年太
理丞皇甫選奏三白渠既高陵涇陽櫟陽雲陽三原富平
田三千八百五十餘頃涇河中舊石堰修廣皆百步捍水
雄壯名將軍屢廢壞已久功固難就近造木堰用稍椿萬
一千三百餘數遇夏水每漂流散失自今溉田既畢命水
工拆堰木置岸側可充二三歲之用景德三年太常博士
尙賓乘傳率丁夫治白渠洪口直東南合舊渠以畝涇河
灌高陵富平櫟陽水利饒足民獲數倍至元太宗十二年

梁泰奏撥人戶牛具修三白渠得糧米供軍食于是泰佩
金牌充宣差規指三白渠使而郭時中副之直隸朝廷置
司于雲陽武宗至大三年陝西行臺御史王承德乞展修
洪口石渠爲萬世利凡八十五步深二丈廣一丈五尺計
治石十有二萬七千五百尺用石工二百丁夫三百金火
匠二火焚水淬七內切人日採石積方一尺共日鑿五百
尺二百二十五日工畢官給食用丁夫就役利戶并顧匠
傭直委屯田府達魯花赤只里赤督工自仁宗延祐元年
二月入役續展十有七步石積二萬五千五百尺添夫匠

百人日鑿六百尺

此即今所謂王御史渠也

文宗天歷二年三月屯田

總管兼管河渠司事郭嘉議言去歲三月六日驟雨淫水

泛漲元修洪堰及小龍口盡圯水歸涇河白渠內水淺計

用十四萬九千五百一十一工役丁夫千有六百度九十二

日畢于利戶內差撥每夫麻鐵一斤繫團取泥索一草苜

一陝西省准屯田府驗田出夫千六百人自八月一日修

堰至十月放水定爲年例近因奉元路亢旱差夫又令就

出用物實不能辦竊詳涇陽北近水最便不似諸縣遙遠

今次修堰除見在戶依例差役其逃戶合出夫數宜令涇

陽近限利戶添差一人官日給米一升并工修治至十一

月畢其後官政不行豪猾奸民反因行水取財縣自西吳

慶豐二里者猶間或用水縣東南北民被豪猾擾告不獲

用水遂并夫役告消厥後高陵令王珪又卽縣通遠門下

引昌連渠入城中委其餘于蓮池至今有三分食用水之

稱宜川王處厚及今叅政章玄應皆有題王云涇流分派

灌長郊未擬良圖入郭澆三限疏通因鄭白一城利濟賴王蕭免勞抱甕

功尤重使濯纓德更趨門柳市槐皆得溉豐饒章云千里涇河百里渠五丁開鑿竟何如愚公舊

費移山志赤子今無僧石儲收委牛羊供乳虎水分升斗
活枯魚尋源欲問前朝考此當劉侯及王侯之時土饒稼
事聊謝諸生一起予

成家給人足一有徵謂男無遺產之心女無夜績之厲至
生子以父之夫地一也利與不利其孰使之然哉

建置志第二

縣城已見前至于

明興景泰元年知縣錦增築之周四里二百二十步廣二
百七十步袤一里二百步崇三丈四門東曰距河南曰迎
學西曰接蜀北曰通遠接蜀距河知縣清甄堯之重葺其
敵臺及更房十六則天順中僉事張紳所築也城東南隅
為舊蓮池甚洿下雨水咸注或浸崩城垣民舍知縣興仁

開一水門用鐵窗駝石券甃之縣七街自迎翠門直達通
遠門爲正街自通遠門而南三分正街之一爲北街自迎
翠門而北三分正街之一爲南街南街之北折而西行直
達接蜀門爲西街北街之南折而東行直達距河門爲東
街自東街之西迤南西街之東迤北爲中街其南五十步
折而東行爲縣街其西爲新街縣街新街無市集市集在
五街日輪一街惟六畜柴市在新街其市貨布花米麥優
諸處

縣衙在縣街中南面宋曰不欺堂知縣文開建玉簿積撰

記曰昔之宰官見于史冊其曰不欺者三子產之不能
于賤之不忍西門豹之不敢是也特未之見耳及得簿
高陵至自古并聞李大夫美政未詳也越數月見民不爭
吏不猾問聞諸父老曰吾大夫去蠹疾惡如鷹鷂之逐鳥
鵠豺兕之赴犬羊桀鷲者所不敢欺心無水鑑而了善惡
手無權衡而知輕重巧偽者所不能欺至若慘怛一心赤
子百里則有知者皆不忍欺乃又揖鄉之賢者能者坐而
問焉對曰大夫于詔條之頒夙夜奉承若天威之在望土
不敢欺吾君人未便安若已摧而納諸溝下不欺其民俯
仰之間端無愧怍中不欺其心父老曰吾儕日以耕鑿爲
事微子之言何以知之乃踴躍而歌曰宓琴清彈牛刀割
鷄以子視我我父母之上一誠洞然無疑嘗恐一旦被
詔促歸使我頓失父母之愛老我不能爲公爲龔遂之歌
我不能爲公爲卓茂之祠然念大夫常聚邑人于茲而顏
其堂曰不欺嶽
宗政和六年 正廳五楹幕廳在東榮其儀門北數武立

戒石亭元延祐元年知縣佐所立

鑿輿庫在吏房北亦西面廳西有屋南面爲名宦張公鞠
祠有碑或曰獄神祠以獄在工房東南也至知縣清移名
宦祠于學中而以此爲獄神廟縣庫在正廳東西室知縣
縣丞典史三第在退思廳後土地祠在縣丞第外之西皆
景泰三年知縣清建成化十年知縣傑重修廡在丞廳東
北正德十四年知縣清重建嘉靖四年知縣興仁以正堂
與大門不相直乃西移堂四尺移大門于東丈餘自堂至
儀門大門皆改建之其鑿輿庫及土地獄神二祠皆移
於儀門外東偏地數丈建之共六楹皆南面獄門亦徙于

儀門外門東向又于儀門以東為門置馬廄廄六間西有
 門通吏舍共十有三間退思堂三楹在廳之後左右皆有
 廂房亦各三楹縣舍在知縣第前之左右預備舍在縣治
 之東南面弘治初知縣安建當馬道門首縣衙按察司之
 間至知縣興仁又隔于馬道門之外其知縣朝時嘗建題
 名石于縣治中三華楊定撰記記曰高陵本秦舊縣自秦
題名記兵後不存今斷自至元七年已後受勅牒命服者
著為始使後來者相繼題名張君伯翔屬余以記若夫山
川之勝風俗之美僕老矣侯他日一到其處撥筆
為伯翔賦之至元十六年歲次乙卯嘉平念五日 鄉里秦
 漢不詳唐置七鄉其一曰清平元置五鄉曰仁義奉君修

真上原閭國

明興置二鄉編戶十五里其三里則續增恭順鄉管八里

曰郭下在城曰渭陽在迎翠門南渭河之北曰張橋在渭

陽之東曰渭橋在渭河南北曰奉正涇河南北皆有之曰

安信雜處慶安鄉管七里曰東吳在通遠門西北曰西吳

南曰孝義在距河門東曰永坊村鎮店元初百十有九

豐永寧治化雜處縣之四方

明興有名者七十有五自通遠門而出者十四曰高望南

化水堡俯流吳鄭坊吳仁坊東吳仁坊劉趙三水寨自距

河門而出者八曰小紀大紀中王孝義坊江流郭橋張橋

三杜自迎翠門而出者十九曰古城阿石七留南屯陳陽

天佑徐吳鄭村党家屯司馬上馬渡新開渡東馬坊西馬

坊鄭家店賈店小張吳村黃頭自接蜀門而出者三十四

曰昌連渠通遠坊俞家寨郭村店子頭灰堆坡西吳小吳

大吳坊晏村何村蕭千家王蕭張張市坳蕭康橋禮魏村
原李超驚馬毘沙鎮東成王西成王孟村降駕原坳下
原趙姜李中高村北高
村窰子頭鹿臺營良村

儒學在東街西偏南面漢唐之制不詳宋哲宗紹聖元年

縣令華創建縣尉柔嘉撰記記曰學校徧于鄉黨壯者以暇日經歌肄業故士不涉義

則輿臺笑之高陵古之畿縣今其俗彫弊民陋而朴介于涇渭之間者負河隄以為險齊民方且虞寇孰能治學校邪紹聖之初天子以憲章繼述為念邑令朱公思欲奉承聖化始至摧抑兼并踰年政成士人始欲向學會運使張公按臨斯邑即以建學為請得錢二萬闢廊宇相對十二楹面宜聖殿為講堂各三楹西廡東向七楹門三楹東其戶門之兩翼為二齋中亭以限內外前墉後庑落成之初邑民大悅漢唐之盛雖期門羽林悉能通經諸蕃子弟屢請入學夫學者之性如泉源導之為江河塞之為汗池習使之然也吾徒被育德化非若武夫夷狄期于致遠而後

已哲宗紹
聖元年 崇寧四年縣令棟奉詔重修棟自撰記
記曰學

久矣大府要郡雖置教官而三歲所取科舉之士率不由
于教養人既異習學或浮偽欲其勵廉耻敦風化尚不能
人人而訓之也今天子即位紹述神考之政作新人才崇
寧二年詔天下行三舍以察行素嚴月試以考藝能於是
命州縣出常平錢悉建學社俾守令以董之遣使者以總
之越明年有旨罷科舉申命有司凡學舍隘陋供饋疎薄
悉致之于法是以天下悚然奉行惟高陵縣學昔在城南
瀕于大溝有屋三十五楹乃紹聖元年所增置也至崇寧
二年首承明命更添三楹外悉仍其舊與先聖殿相對其
間不能咫尺兩廊分三齋僅能列其几案私覲之舍及夫
架閣祭器經書糧儲之庫皆闕焉至崇寧四年臣棟備員
令職實董其事於是斥官地以廣之南北四十有二步東
西五十步實其溝壑高其垣墉移舊增新共七十楹上以
奉承天子之德澤且以寬下吏我官之責徽宗崇寧四年
大觀三年五月知縣璫奉勅建御制八行八刑條碑
校置

師儒所以敦孝弟明人倫朕考成周之隆教萬民而賓興
 以六德六行否則威之以不孝不弟之刑比已立法保任
 孝弟姻睦任恤忠和之士去古綿遠士非里選習尚科舉
 不孝不弟有時而容改任官臨政趨利犯義詆訕貪汚無
 不爲已近因餘暇稽周官之書制爲法度諸士有善父母
 爲孝善兄長爲弟善內親爲睦善外親爲姻信于朋友爲
 任仁于州里爲恤知君臣之義爲忠達義利之分爲和諸
 士有八行見于事狀著于鄉里耆隣保伍以行實申縣縣
 令佐審察遞入縣學考驗不虛保明申州如令諸八行孝
 弟忠和爲上睦姻爲中任恤爲下士有全備八行保明如
 令不以時隨奏貢入太學免試爲太學上舍司成以下引
 問考驗較定不誣申尚書省取旨釋褐命官優加拔用諸
 士有全備上四行或不全一行而兼中等二行爲州學上
 舍上等之選不全上二行而兼中等一行或不全上三行
 而兼中二行者爲上舍中等之選不全上三行而兼中一
 行或兼下行者爲上舍下等之選全存中二行或有中等
 一行而兼下一行者爲內舍之選餘爲外舍之選諸士以
 八行中三舍之選者上舍貢入內舍在州學半年不犯第

建置

二等罰升為上舍外舍一年不犯第三等罰司成以下考
 驗行實聞奏依太學貢士釋褐法取書推恩中等依太學
 上等法待殿試年推恩下等依太學中等法諸士以八行
 中選在州學若太學皆免試補為諸生之首選克職事及
 論齋長論以八行考試為上舍上等其家依官戶法中下
 等免戶下支移折變借身丁內舍免支移身丁諸謀反謀
 叛謀大逆子孫同及大不恭誣訕宗廟指斥乘輿為不忠
 之刑惡逆詛罵告言祖父母父母父母別籍異財供養有關居
 喪作樂自娶釋服匿喪為不孝之刑不恭其兄不友其弟
 姊妹叔嫂相犯罪杖為不弟之刑殺人畧人放火強姦強
 盜若竊盜杖及不道為不和之刑謀殺及賣畧緦麻以上
 親毆告大功尊長小功尊屬若內亂為不睦之刑詛罵告
 言外祖父母與外姻有服親同母異父親若妻之尊屬相
 犯至徒違律為婚停妻娶妻若無罪出妻為不嫻之刑毆
 受業師犯同學友至徒應相隱而輒告言為不任之刑詐
 欺取財罪杖告囑耆隣保伍有所規求避免或告事干已
 為不恤之刑諸犯刑縣令佐州知通以其事目書於籍報
 學應有入學按籍檢會施行諸士有犯不忠不孝不弟不

和終身不肯不得入學不睦十年不婦八年不任五年不
惟三年能改過自新不犯罪而有二行之實耆隣保伍申
縣縣令佐審察聽入學在學一年又
不犯第三等罰聽齒于諸生之列
然廟毀於金兵元中

統二年權縣丞張鼎更建

明興建文間詔罷北方學校遂廢永樂間始復之至景泰

後歷知縣錦琦傑皆增修之畧備弘治初知縣讓重修知

縣安爲撰記

記曰高陵縣儒學在縣治北講堂之前僅七丈許皆民舍蔽之門復偏曲於東齋之旁成

化辛丑春洪洞段侯讓來令斯邑遂出已俸以倡邑民乃鳩工庀材撤舊堂三楹爲五楹二齋爲七楹號舍庖厨亦皆新之民舍蔽前者以價購之縱八丈有奇橫三丈有奇改曲路而直之左爲師儒解舍贊襄其功者則縣丞鄆邑王君彥教諭洛陽侯君輔訓導廣漢趙君政經始于成化癸卯春至甲辰秋而落成嗟夫正天下以正風俗得賢才

爲本然風俗必待賢才以正賢才必賴學校以得之今段
侯振揚文教而充拓作新乎學校其亦知所本矣俊秀之
遊于斯者必正心術于隱微辨義利于毫忽則德行顯風
俗正而禮義興庶不負朝廷教化作養之恩而于段侯作
新之意亦不孤矣弘治元年

敬一亭三櫺在明倫堂之後南面嘉靖十年知縣剛建明
倫堂五櫺二齋皆五櫺儀門三櫺爲教諭高先生儔所建
大門直達東街然止一櫺其西有坊曰育賢今廢訓導之
第在儀門之外東西面教諭第在堂後南面內號在其後
迤東外號及饌堂在文廟神厨之東射圃在神厨東北東
面學庫在東齋之南司吏無房借之以居於是禮器典彝

多散遠至學舍則又借東廡之南餘

即折屬
戟門處

嘉靖四年知

縣興仁以學門卑狹乃買民地令醫官郝九臯督工築崇

其基建門三櫺又移明倫堂于西北丈餘及兩齋皆改建

之名宦鄉賢則南移三丈共六櫺一門乃遷北向西向之

號舍十有二間于東北即射圃地以遠民舍又建進士題

名石于明倫堂側提學副使蘭谿唐龍撰記

稅課局在西街興國寺之東南面元宋以前雖毘沙涓橋

二鎮皆設稅官

如知縣盧佐刻石有承信郎監毘沙鎮酒
稅田定忠翊郎監涓橋鎮酒稅王仲修忠

翊即巡檢
楊章云

自縣析減後具罷之景泰間又以縣小葺縣局

官稅則固自增也

神臯驛在縣北百五十步今亡久矣夫高陵古雖名縣然其地東南析于臨潼西北析于三原今甚偏僻而馬驢牛站以給他驛遞如渭水白水青家堡高家堡者幾百餘頭匹以爲高陵褊小非大路若是也然自夫有識以來凡出使三邊及四川雲貴卿大夫士暨差使人役率避遠省城輒自渭南或臨潼徑趨高陵西來者亦然當其煩擾不減渭水諸驛而站役反給他處使者過越縣官至無以辦夫馬卽令里甲顧賃歲無虛日蓋有竭縣以作者矣安得復

神臯驛掣廻本縣給他驛遞者牛馬及所析去三原臨潼諸里庶幾其少均乎

鴻臚館在迎翠門南十有八里未詳建置之由或曰漢唐故有或曰元置焉今廢

陰陽醫學正統五年建在縣街西北隅後廢弘治初知縣安建于新街東偏南面二櫺尋又圯廢知縣剛令醫官郝九臯督工改建于按察司東偏

僧會司宣德元年建在西街西偏興國寺中南面正統元年僧人謙守一重建

道會司正統十年建在又玄觀觀在城隍廟巷中南面景泰元年道人鍾子鳴重建其街南故有里長房

申明亭在縣街之西南面弘治初知縣安建然止厥屢三間無戶牖人或便止其中正德初知縣璠置粉牌焉曰申明亭人自是少褻矣至知縣興仁更建三楹始嚴整

旌善亭在申明亭之西南面其建廢同申明亭

布政司在新街之西南面正統元年建天順八年知縣政重建然正堂卑淺東無廂房大門土築二墩空其中以爲門後堂亦隘嘉靖四年知縣興仁悉撤之建正堂後堂皆

五櫺廂房皆三櫺平其墩爲大門三櫺二門角門皆新之

大門外東拓地殆三丈爲官廳亦三櫺成化中叅政西蜀

鄧山至此嘗有題

隔煙宵柝下城臺一騎遠從山外來月
色有情隨客至燭花何事向愁開綳繆

樸械爲薪標次第剛刀芟草萊盡
日塵中忙似火幾時心上冷如灰

按察司在預備倉之東南面所謂蓮池者在其前東偏也

正統元年建天順八年知縣政重建成化十年知縣傑重

修嘉靖四年知縣興仁重建前中後堂皆五櫺門廳亦如

布政司前提學馬先生中錫嘗有題

馮翊城荒起早秋渭
川依舊背城流西風

野闊行人少落日天低去鳥愁瓦勒鴛鴦夕見翠壁
分蝌蚪字還留唐公故宅西平塚千載滄溟一泡休

府廳在中街南偏東面不詳建置年月甚褊淺自門至後垣不及十餘丈嘉靖四年知縣興仁改建增飾視舊煥然新矣

諸急遞鋪在城總鋪在縣衙預備倉之間渭陽鋪在縣南十里涇渭北干良村鋪在縣西南三十里當良村前皆知縣安重建其良村鋪東北十里淺鋪則知縣璜建若諸鄉亭及正房廂房皆知縣興仁重建巡鋪六在中街者二其餘則四門之內故所有也鄉中巡鋪在各大村

社學舊無定所弘治初知縣安建于陰陽學東一楹是在

城魁學也然既久頽廢至知縣興仁改建于西街西偏三
繼其諸里社學惟東吳者在店子頭西吳者在灣李之東
慶豐者在魏村安信者在晉文公廟之東偏南面

渭上書院元仁宗延祐初建見元學士蕭顛所撰三原學
古書院記中當在縣南渭之北干或疑爲楊文康公築然
潛齋隱處者也是未可知

演武教場在迎翠門外西偏北當隍之南岸有臺周五十
餘步臺上有榭三楹或曰知縣讓建

養濟院在西街弘治初知縣安建正德十四年知縣清改

建于又玄觀後塔寺巷東面

漏澤園在迎翠門外西偏教場之東東面或曰知縣安
建者也

高陵縣志卷一終

高陵縣志卷之二

祠廟志第三

文廟在儒學之左南向宋紹聖元年縣令韋創建崇寧四

年縣令棟奉詔重修然皆毀于金兵元中統二年權縣丞

鼎罄產更建宜川王處厚撰記鼎亦自爲之記王記曰夫子出周之

衰時命大謬傷道之鄙垂教于將來是故國家加敬詔置

廟貌春秋二祀惟本縣文廟建至故金貞祐間兵災併毀

已盡厥後于戈荐作俎豆無聞惟有張公君寶權充縣丞

之職觀其故址慨然興嘆即與縣丞雷公一議公乃助緣

贊成于是張公負勤勉力罄僿輸贊募工重建正殿三間

并兩楹窗戶三間塑宣聖鄒克三尊繪采一新比之舊跡

未幾一二柰力不克施材不克辦餘皆以俟後人中統二

年張記曰昔孔子贊天地之化育輯唐虞之至道爲法

于天下傳于後世。有國家者推而尊之。享用王禮。值金德。衰人亡禮。靡本汴人也。壯歲罹兵。寓跡于此。因而家焉。庚申秋。卽中統元年也。登宣聖廟。環瞻圮址。遂鳩工聚材。復舊基。立正殿。設尊像。亞以顏孟。闕中門。徑達市衢。由是。丁旦望。來人進拜。幸濫薦焉。厥後日夜。祇懼。復計財屬。匠。面正殿之南。立講堂。十二楹。翼殿兩序。各四十楹。七十。子冠冕。服裝。繪衣。品制舍宇。經營歲月。困身勞慮。竭產罄。貲。寧辭空匱。上以輔國家。廣開學校之。猷。次欲紹官屬。載。嚴春秋之祀。嗚呼。天未喪道。豈假手于羈旅之。微人。覬覦。同志君子。觀之。發憤。倘葺而完。諸誠予所願也。至元三年。明興。歷知縣。錦琦傑讓。增拓文飾。則畧具矣。大成殿五楹。

戟門三楹。東西廡皆七楹。序表四十步。櫺星門直達東街。

琦建廟時。前禮部侍郎翰林學士東魯邵彬撰記。記曰。文。

師孔子。使學者釋奠。釋菜。以不忘其所自。其嘉惠後學之。意至矣。我國家列聖相承。稽考古文。作新廟學。故賢。

才之興于千焉。廟之出為邦家之光。以鳴太平之盛者。後先相望。高陵西安屬邑。齊通三輔。近歲得安邑張公。鍾潤來知縣事。識大體而富文學。廉正有為。民畏而愛之。首輯廟學。慨然修復。自禮殿門廡。以至講堂齋舍。悉撤其舊而增新之。加丹堊于汚。鑄飾金碧于棟宇。高明亢爽。足稱心力。于是聖賢有像。衣章炳煥。而德容儼然。講習有所。周旋進退。而禮文秩然。藏書有閣。館師有廡。與夫豆籩簠簋之潔修。庖酒庫庖之完具。卓然觀乎涇渭之間。而邑之士庶得有所瞻仰而依歸者。大尹之力也。經始于景泰丙子十一月之朔。落成于天順丁丑十二月之望。相其事者。則縣丞崔瑜典。弘治六年知縣舟改建櫺星門壯麗倍昔。神吏劉榮也。

庫仍借西廡之南餘神厨在東序之東南北面宰牲房在其北後廢多借宰于觀德堂至知縣興仁皆重釐改修兩序之基皆用甌甃

祠廟

啟聖祠在東廡之東南面三遷嘉靖十年建

社稷壇在接蜀門北百餘步弘治三年知縣安重修洪武

初二壇分祭至八年始合為一壇制四面皆二丈有五尺

培石于壇上高二尺五寸方一尺木主神廚牲房皆三楹

二皆高二尺有二寸方四寸有五分在壇內東偏里社稷壇在故里而郭下里者在接蜀門外

關王廟前西偏然久頽廢知縣興仁皆重建之

風雲雷雨山川壇在迎翠門外東偏亦知縣安重修其分

合及壇壝神廚牲房皆如社稷壇之制然無培石門一在

南壇中南面木主三并城隍也然亦久頽廢知縣興仁皆

重建之

邑屬壇在通遠門外正北一里亦知縣安重修壇墀房厨亦如山川壇之制鄉屬壇在各里郭下里者在距河門東北百餘步俗稱白骨祠然久頽廢

城隍廟在中街北偏西巷內南面弘治末知縣璜重修正殿五楹東西廡各十有五楹有門坊焉在巷口東面其扁則故太師三原王端毅公所書其記爲郎中邑人高選撰記曰幽明之際遠矣惟誠可格况城隍禦災捍患衛庇生民通節內外自唐以來郡縣皆崇祀之至今世與守令相表裏凡祈禳報賽悉歸焉本縣城隍祠在縣治北中街之西朱侯名璜字敷威山西太原名家也以縵粟重厚之質

英敏卓犖之材。由省進士。授吾邑大夫。蒞政之初。慨然修復。又以興利除害。革奸弊。默禱而期。佑焉。神鑒其誠。感通。夢寐曰。民之淑慝。吾當察報。侯遂以作廟事。謀詣縣丞名山陸君宗典。史澤州李君秀。教諭瀘陽高君儔。訓導。嘉和君纁。宜寶楊君慕。并邑之賢士大夫。民之父老。乃首出已俸。諸君亦樂從之。民亦贊助。歡趨。乃撤舊殿三間。增五間。殿前長十丈。有奇。大門三楹。左右司房。各十有五間。功既告成。董役邑民。任智。葺將刊貞石。請記。予惟事有當為。而為之者。為是沮之者。為非。城隍土主血食一方。朱侯既能盡心協謀。以完修為已任。而一時賢僚屬良吏民。又能樂于贊助。而無所齟齬。其匠作工役。亦皆樂事勸功。可謂知所當為。而為者矣。自今以始。禱祈禳禮。昭答如響。福善禍淫。報應不訛。孰非我侯作廟昭事之誠哉。弘治四年。

漢景帝廟在縣西南三十里鹿苑原上。當陽陵前。南面正殿。五楹。齋堂。牲房在其東。漢書景帝五年作陽陵。後三年

葬之帝王世紀曰陽陵山方百有二十步高四丈

明興自洪武來皆有 論祭文然自正統至嘉靖改元祭

文詞多同

文曰維洪武四年歲次辛亥二月乙卯朔越十日甲子 皇帝謹遣侍儀舍人臣閔毅致祭于

漢景帝之陵。曩者有元馭世天下紛紜朕由此集眾平亂

統御天下今已四年矣稽諸古典自堯舜立極列聖相傳

為生民主者陵各有在雖去古千百餘年當修祀之朕典

百神之祀故遣官賚牲醴奠祭修陵君靈不昧尚維歆享

申 維洪武三十五年歲次壬午七月壬午朔越十五日丙

有天下功德及民者當享百世之祀我國家崇祀古昔帝

王厥有常典今朕遵祖訓奉天征討即位之初求惟聖帝

明王陵寢所在不可不致敬是用奉薌幣牲醴以祭惟皇

帝有治世之功有安民之德歷世雖遠神靈不忘其尚默

贊立化孚佑下民俾臻太平之福朕其敬祀萬世無斁尚

享 維洪熙元年歲次乙巳三月辛卯朔十五日乙卯

系示

祠廟

四

皇帝遣太子太保禮部尚書呂震致祭于漢景皇帝之靈
曰。惟帝漢之令主有德有功朕于嗣位之始率循典章祇
遣廷臣敬修陵寢惟帝歆鑒尚享。維宣德元年歲次丙
午二月乙丑朔十一日乙亥。皇帝謹遣太寧侯陳鍾致
祭于漢景皇帝曰。惟帝統承先業保父家邦民賴以安功
德惟茂予嗣位之初特用祭告尚享。維正統元年歲次
丙辰正月丁卯朔十五日辛巳。皇帝謹遣魏國公徐顯
宗致祭于漢景皇帝曰。予嗣承大統追惟前代嗣君克紹
先業用保生民者心存景慕謹用祭告惟帝享之。

名宦鄉賢祠在文廟之東南面弘治間知縣璜以提學王
先生雲鳳學規改梓潼君祠爲鄉賢祠然止一櫺而梓潼
君像猶存焉正德十三年知縣清乃合文昌名宦鄉賢爲
一字三室建于舊祠東北中文昌星石主東名宦祠祀漢

韓延壽王尊張湛唐李晟崔玄暉韋應物劉仁師宋朱韋
种師道李文開金張翽元張崇及 今張錦張琦劉安高
先生儔西鄉賢祠祀漢周仁張敞唐于志寧李嗣業元楊
恭懿及 今墨麟宋教授八 玉至知縣興仁又移二祠于
南三丈共六穩

三皇廟在距河門外三里蓋宋元時建也成化間邑人宋
教授公率孝義里社人重修

后土宮在距河門外北偏六七十步南面殿後有湫池甃
甃至泉禱雨禳疾者咸取焉東街社人所祀梅常以爲方

社神故撰其碑曰高陵后土宮云記曰高陵距河門東北

嬖廟成化初提學副使伍公福扁其殿曰后土宮弘治中

知縣朱璜時社人建獻殿記其梁曰坤柔宮柎自先世以

來生長神之境內求其名不得其義蓋知土人之稱意雖

親近于襄如大夫學士之稱意雖尊近于僭藝則不恭僭

則難格社人何以事神考古經據今典其方社之廟乎夫

社能出百穀養庶民社陰也有母道故土人因是而稱也

社土也實地類故大夫學士固是而稱也昔者魯大夫季

孫意如旅泰山孔子譏其非分庶人而祭地祇于制何居

如土人之稱謂若櫛髮坐水鞭龍騰仙者說則又惑眾誣

民背經遠矣故謂祠為方社之神故曰高陵后土宮我

太祖高皇帝初制天下鄉飲酒禮府州縣行之學宮社飲

酒禮里人百家行之社祭之後故今東街社人春祭神以

三月十八日即古祈穀之意其遇雨而賀即古秋報之意

其他遇旱而雩遇災而禳遇疾病而禱遇無子孫而乞皆

于神所然惟祈穀之禮既畢社人序齒燕飲猶存初制而

神為方社審矣大神既主一方生民之命是默贊天地之

泰陰暢山川之秀。毓品彙之生。保茲蒸民。非眷窮獨。使
 君子獲福。足勸為善。小人獲禍。足懲為惡。則一方人眾。戴
 神真如慈母。畏神真如鳴雷矣。東有道院。司香火者居之。
 殿西以北。有屋三楹。蓋古集塲坊所改建者也。社中士人
 多讀書其中。枹舉人時。亦嘗居以授徒。因名曰雲槐精舍。
 夫枹既論記如右。以俟正于後之君子。乃繼以詩。使有事
 祈報者歌頌焉。歸歸上神廟。此縣東。璇題疑。月金楹。抱
 龍濁。淫孔肥。蒸雨。豈時。霖霖。浸濕。來牟。未。旗。有。羔。有。豕。有。豕。
 蠲者。醜。借我。父老。薦此。春祈。襖綿。未脫。鷄鳴。荷犁。勿勿。鹵
 莽無本。不枝。其。豔。綿綿。有。我。暨。蔡。我。田。孔。度。來。不。宜。霖。幸
 不。批。霧。糜。芭。秬。秠。五。六。月。雨。傳。我。妣。祖。以。饌。父。母。夙。春。夜
 織。先。公。室。賦。惟。上。有。神。慈。我。無。疆。數。口。之。家。食。神。之。英。
 渴。則。汝。泉。飢。則。汝。饋。疾。則。汝。呼。寒。則。汝。綿。保。茲。孫。子。既。有
 豐年。嘗我。妣。祖。豈。不。來。言。螟。蟘。蚤。賊。匪。火。不。生。湖。海。之。鯉。
 岑。蕭。之。禽。殺。時。羔。豚。有。酒。在。罌。如。涓。水。清。
 工人。奏。鼓。奏。鼓。吹。笙。歲。調。如。麻。匪。神。胡。生。

東嶽廟在通遠門內東偏城下南面北街社人所祀

紫清宮在迎翠門外東偏南街社人建祀紫微星者也

龍王廟在南郭門外西側南街社人所祀以禱雨者也

義勇武安王廟在接蜀門外南面其西廡則劉先王三顧

草廬像也神刀重百斤元至大四年涇野子之遠祖諱世

昌及夫人李氏鑄其鏤有識銘殿扁為元學士蕭顛所書

蓋名筆也廟為西街社人所祀會在四月八日弘治初社

人重修教諭高先生儔撰記記曰縣治西三十步許有漢

尚存國初遍禮百神邑人復加飾焉凡旱澇禱之疫癘

禱之歲久圯壞邦人各捐貲供力以重修之功成李翰等

請記按神河東人雖膂力絕倫而堅強不屈之氣尤養獨

得時奸雄染指漢鼎神乃慨輔昭烈以圖興復而大義著

于天下其封禪之舉威震華夏當時雖魏吳割據固不畏
慕惜天奪神速不果恢復可為扼腕又按祭法有功于時
則祀之有惠于民則祀之粵自風后力牧而下凡幾世凡
幾將非不功存社稷惠及生靈或祀于當時不能及後世
或祀于一方不能遍天下或祀于公所不能及私家獨神
于載而下或塑形或繪像若都邑若村落若公私罔不摠
忱薦虔噫嘻神何為而起人心若是耶人同此心心同此
義允宜血食綿綿弗絕矣詩曰炎祚將移昭烈興惟神篤
秉為驅兵義勇凜凜昭日星騰氣轟轟群爭三分割據
威信行守鎮荆襄境土清天不祚漢神蚤薨烝黎欽慕繪
其形祠宇巍我儼若存不殊遐邇咸傾忱禦
災捍患福生靈默翊皇圖億萬春弘治四年

鹿臺之神廟在縣西南三十里鹿苑原上相傳佐軒轅黃

帝破蚩尤者事遠可疑旁有雷石風洞俗又謂之雨磨以禱雨

多應也今為奉正里人所祀元同州學正蕭逢春為縣令

楊翰主簿陳天瑞禱雨有應撰記

記曰天不言而臨于下其代天行化利物濟民

者皆神之功也高陵昔之名邑西南三十里有原曰鹿苑
 中建鹿臺將軍之祠北靠涇流南襟渭水西控咸陽東望
 驪宮地形蟠踞風景蕭幽大德己亥夏旱經彌月本縣達
 魯花赤太帖木兒縣尹楊翰主簿陳天瑞集訪僚屬耆老
 僉謂鹿臺之神禱雨而雨祈晴而晴殿旁之石曰風雨派
 分其八謂之八水挽之轉于祈禱之地視其方也若水見
 中雲氣上騰必應主簿乃齋心潔已露頂徒步率里人杜
 忠等於六月望後三日昧爽至祠下熏香叩首禱曰如獲
 感應當勒石頌功述德以答神貺遂請湫還抵山下俄見
 日斂雲垂風飛電掣墜天瓢于撫掌之間瀉銀河于旋踵
 之際越三日乃霽及餞神送水廻叙前舉而本末無考涇
 之北下廟有遺碑乃前金皇統大定間閭里富民敬仰神
 之威靈建祠為崇奉之所碑云父老相傳鹿臺將軍佐軒
 轅破蚩尤之亂有利干國有功于民由此觀之神之豐功
 偉德照耀古今用當采覽刻之翠炎辭曰倚與鹿臺地謝
 天開神武莫敵孽妖竟摧作霖拯旱潤物阜財當勒金石

永傳後來
大德四年

晉文公廟在通遠門北二里南面中南渠在其前文公爲公子時出亡在秦秦康公嘗送之涇陽作涇陽篇故邑有廟今爲安信社人所祀

齊大夫晏子廟名嬰在接蜀門西南八里爲晏村社人所祀晏村社人曰嬰故里也夫嬰齊萊夷胸人故里之說無據或者出使在秦其後人慕其賢而立祠乎

唐鄭國魏公廟在接蜀門西南十五里塞子頭社人所祀夫徵魏州曲城人而高陵有魏綸氏者金進士也自言爲

徵後嘗起祖坐于降駕原原去窆于頭甚邈徵廟在窆于頭亦有自與蓋徵卒陪葬路陵其子孫遂籍馮翊未可知也魏琪又言荷氏有徵塚

上騎都尉馮公祠其門額舊曰護國西齊王廟俗曰府君

廟在縣西南七里內有周朝隱撰紀孝碑

碑曰君諱本長樂信都人也周

之爲主天子授以丕基晉則有人丞相登其龍渥會祖某後魏外兵參軍北地郡丞相悅宇文朝顯騎將軍安定郎中令與隋文帝有舊辟命不出國步重清出爲嘉州峨眉縣令父賢隋校書郎國初率子弟應接義旗加通議大夫檢校定州北平縣令君解福利州參軍徙綿州參軍頻丁憂去結廬在墓負土成墳僅全毀滅之中重起簪裾之內服闋遷涪州錄事參軍乾封中擢亳州錄事參軍以咸亨四年卒于官春秋六十有四夫人楊氏繼夫人某氏以久

視元年五月二十二日合祔于先塋禮也嗣子敦直刻
 感咽庶祈不朽之文朝隱竹簡舊遊蓬
 直書銘其俾刻于石其辭曰瓜瓞綿綿系于周
 年畢公是出畢萬是遷仕晉何代封魏何年食菘命氏馮
 鄉有焉符運代起水火更王在燕稱孤入魏為相士流模
 楷名教宗匠冠冕播紳允歸時望光光郡丞挺生其後昂
 藏獨得耿介自守辭疾北地養高林藪雖卽干駟非義不
 受赫赫驃騎聲雄五都盈尺美玉徑寸明珠盧綰郎舊雍
 齒何辜或出或處與時並驅爰降異靈是生良宰陰陽數
 術篆籀文彩摘鷲未振潛龍有待以忠事君其跡斯在鳳
 凰有鸞有駒鸞鳴鏘鏘駒行昂昂登青子擢于上
 庠參卿軍事其道逾光盡節巨時受命河洛典茲制舉繩
 違景毫物情刻列代無謂我固藏舟于壑哀哀嗣
 子惴惴餘孝友成性忠貞令名通于天地感于神明與
 搖雄筆以紀頌聲千秋萬歲灌木豐草子孫盈門軒車充
 道或青或紫以拜以掃披其遺文與天同老嫡子銀青
 光祿大夫留直昭文館上柱國長樂
 縣開國男敦直書先天元年十一月

卷二 祠廟

西平王李公祠在迎翠門南十里渭橋北百餘步墓前西

向唐太學士裴度有撰記柳公權書弘治間王二十五世

孫叅政蕪湖贊令知縣璜建祠贊撰有祭文并詩正德間

教諭李應奎申准提學春秋祀之副使曹璉有題碑曰惟

命于我唐保茲國祚生此人傑則西平王李公其是乎不

然何覆暴如風振槁葉戴君若鼉冠靈山橫流之中一匡

而定公諱晟字良器其先隴西人後徙京兆曾祖嵩皇珉

州刺史祖思恭皇澆州刺史贈幽州大都督考欽皇金吾

衛大將軍隴右節度經畧副使贈太子太保代有名跡雄

于西土公幼好學學不為人及讀呂張孫吳之書慨然有

經邦濟物之志未弱冠遊秦涼間元侯宿將見者咸器異

之乾元初嘗客武都值酋豪以缺守搆亂殺畧平人公與

所從十數騎馳而射之殪其為魁者餘黨遂遁寇所虜獲

積如邱山公一無所取惟牛羶酒享士而去邦人咸服其

狀以聞特拜左清道率飾以金紫將朝京師自獻方畧屬
裔夷紛擾有土急賢河隴將帥相繼表用歷二府右職所
至常以才謀爲其委重累遷至光祿太常卿階爵在第一
品涇原四鎮北庭節度都知兵馬使懸識虜態周知地形
應變不窮有奪有待驥驟庭而莫展雲出岫而斯飛代宗
徵以左金吾衛將軍爲神策兵馬使屬羌蠻犯蜀朝廷濟
師命公督禁旅絕棧道而往救焉公銜枚遇險出賊不意
連下堅壁遂誅首惡還授檢校太子賓客且復舊職建中
二年田悅以魏叛德宗極意致討悉起徂征以公爲神策
先鋒都知兵馬使加御史中丞與河東河南等道諸軍合
擊公濟河而行能以衆正及破洹水陣解臨洛圍轅魏屬
城抵燕通邑其摧鋒斬銳皆先群帥而實力焉遷拜左散
騎常侍兼御史大夫厥功永成聞賊此肆逆皇居失守西
嚮慟哭載馳驅行及代北授檢校工部尚書充神策行
營節度公提孤軍募散卒拊循訓勵以達行在值懷光中
叛大駕再遷加檢校右僕射餘如故尋轉左僕射同平章
事兼京兆尹神策軍京畿郵坊節度觀察使管內及商華
等州副元帥公固守渭城決于秦壘調食制用先發我私

捐甘攻苦皆自我始每一言一誓聲淚俱發勇夫義士感而使之茂不濟矣時自雍而東延于汝洛震于河汴所在征鎮亂掠相從公介巨盜之間使聲援斷絕立成師之法致號令嚴肅蒐捕十旬指揮一舉乘墉壑而通軌道磔鼻獍以清宮禁俾九市三條無輟肆之驚無秋毫之犯羽書速告鑾輅爰歸廓氛稷爲祥光據憂憤爲喜氣詩曰允矣君子展也大成斯之謂與考古視今論功稱忠者多矣若至危而安至難而易卓犖跨道如公莫儔拜司徒兼中書令俄以兇孽未寧邊防猶警岐下任重乃以本官兼鳳翔尹鳳翔隴右節度觀察使及四鎮北庭涇原等州副元帥改封西平郡王加食邑實封至一千五百戶公名懽戎王政和藩部始至而生植少安而訓齊逮四載賦輿十倍其初會課入輔拜太尉中樞如故人或謂公勳望已高寵渥已極宜從容願養稍稍遜避公曰不然人臣外則盡力內則盡心若止偷榮孰爲且昔故每承帷幄之間則言拂無隱理奪不同大指以東夏可平西陲可復或已行而事終不顯或未用而身遠不遺以貞元九年八月四日薨于位春秋六十七德宗撫几哭于別次自都邑達關畿無士庶

無老幼皆發哀相弔則曩時安人戰兵之德可謂決于元
元之骨髓矣冊贈太師賻加等以其年十二月十六日
葬于高陵縣奉正原鄭國夫人杜氏耐焉自捐寢至安宅
皆上所辦護中貴反覆萬情所奉如不及焉嗚呼以公之
靖難扶傾不言所利雖存歿極位始終殊禮而天意若曰
其福享未至故迤延于後有子曰愿故檢校司空河中節
度等使贈司徒五列雄鎮三爲上公曰聰故光祿寺主簿
曰總故太子中允贈兵部郎中曰慈左神武大將軍贈洪
州都督曰恕故光祿卿贈右散騎常侍曰憑故右威衛大
將軍曰憲檢校左散騎常侍嶺南觀察等使進因貴霄達
以善政曰愬故檢校左僕射同中書門下平章事贈太尉
克廣前修仍執醜虜曰懿故渭南尉曰聰檢校司徒義成
軍節度使統戎按俗是以似之曰慧右羽林將軍曰慤嵐
州刺史并地勢吏用兼而有焉粵太和元年秋七月聽拜
疏上言以公之徽烈剛御製碑文于渭川矣以公之風度
則詔命圖形于雲臺矣唯大其邱龍鬱彼松楸望有祁山
之象拜無峴首之碑將刊貞石式表幽隧乃命臣度稱代
言詩其詞曰建中季年大盜忽焉皇輿避狄狩于梁川顧

詞廟

上

謂太師汝才汝略將威致討必殄寇虐太師泣奉捐軀誓
衆度其成城可以利用赫矣鋪敦傳于墻垣手搏足躋如
衝如援一鼓而破一磨而奔掃清官闈刷蕩妖昏我師蒞
止我令行矣都人不知已事方喜飛章告慶飭駕言旋鴻
烈耀古謹聲動天車服之錫河山之誓九命而俯一心若
厲俾侯于岐阜安邊陲藩政旣成衰職攸宜嶽降帝賚矢
言詭詞我后嘉猷我躬何爲道直氣和勞謙終吉福履所
綏未至萬一上天不惠厚宥遄歸垂裕流光用延恩暉翼
子肥家將壇台席繼立竒功代傳休績聽與伯仲永懷高
蹤請于朝廷表是邱封帝曰孝哉胡可不從宜我祖之丕
業繫爾父之嘉庸乃詔作銘以觀億齡○祭文云惟王氣
奪風霆忠貫日月取朱此如反掌挽唐家于不滅功勳赫
赫媿美乎汾陽節義堂堂愧死乎希烈是宜位極群僚王
封大國衍慶澤于無窮垂馨香于竹帛贊世係雲仍家藏
譜牒蓋自王子憲觀察江西憲子游宜春爵列宋遷吉水
益蕃枝葉今分派于蕪湖幸仰承乎先業與弟聯科歷官
藩臬喜茲巡歷之邦得過封塗之側覽頽邱兮荒涼觸穹
碑兮昭揭乃屬縣宰爰具毛鬣奠一觴以通誠奠九原兮

有舊焉呼木沿枝而索本水逸流而窮源王寶我祖奚容
天焉唯據實兮陳辭豈崇藉兮似類○贊詩云錦裘續帽
戰忘勞此賊平來若刈蒿統御才長齊李郭指揮功定亦
蕭曹隴山家在朝廷重渭水碑存日月高南國孫枝傳譜
牒荒墳應掃薦溪毛○曹云新春攬纒過高陵西望川原
盡坦平龍躍宮頽迷故址鹿鳴臺廢祗荒城河通涇渭猶
清濁郡隸秦雍幾變更最是西
平千古墓淡煙芳草不勝情

劉公廟在接蜀門西二十五里彭城開南使水利戶建創
以祀唐縣令劉仁師者也劉禹錫撰去思記見官師傳

宋寇萊公祠在縣西十八里小王村俗祀寇平仲者也二
名竹林祠

元楊文康公祠在迎翠門東南五里此其家廟也雙栢存

子孫居其旁涇野子有題

薰風曉過寺前村好雨初收禾發根瞻望斯文空佇立獨留雙

相在
祠門

寺觀興國寺正統元年謙守一建至知縣興仁以為諸節

令習儀之所又重葺之

慧濟寺在接蜀門西北十五里何村元大德七年僧了達

等建紫弘太師起塔教諭張希顏撰銘

隆昌寺在縣西毘沙鎮宋太宗勅賜名額有塔突兀正德

壬申涇野子嘗題於寺壁近年寺僧真端重修收壁詩

連泥皮以里人蕭屠輩拜謁涇野子請重書原題不能拒

詩云

五色雲中落一詩明心定處幾誰知
涅槃若問孔夫子開闢從來總不疑

昭慧院在迎翠門東南三里陳陽村唐大中年置以其在

咸陽渭陽涇陽東北又曰三陽寺其塔比隆昌寺塔尤崇

辣涇野子柁及谿田子理皆有重修記

記曰昭慧院之建在高陵城東三里

俗以其在涇陽渭陽咸陽之北也又曰三陽寺正德庚辛
間住僧滿愍率寺旁居民銀柁等捐貲物召匠重修工訖
礮石乃介銀生世華問記呂子曰往年柁嘗遊終南至草
堂觀鳩摩羅什之塔覽法華經之栗矣然塔院蕭條羅什
骨存而不神其栗也雖彌昆吾御宿之谿然今已為王人
者有矣况此役者哉愍曰登覺岸者不以興替渝念遊菩
提者所知奉佛而已今茲衆生沉欲海而不悔焚忿坑而
不濯投利筭而不怨墜名淵而不悟死酣壕而不醒驚迷
途而不返落榮網而不飛甘此七難不登諸天可乎曰惟
茲七難正坐佛徒夫佛西方之哲賢也幻妄人生贅疣有

爲蔭濁世界見病山河大地此其學雖非陰陽之正仁義之中然滅心以忘世絕塵以逃生指相以如來則豈今日爲之徒者可捫其墻哉惟夫杖遠公之錫而三藐不聞著達摩之衣而一歸未解誦白馬之經而百譎叢生畫祇園而夜花雨身比正而心距衝佛如有靈亦忘慈悲之心而加邱山之體矣况吾孔氏之徒者哉懿等謝曰敢不刻斯言○谿田記曰院在邑南東偏鄉人所謂三陽寺者是也唐大中年間創置然有塔則非近代物矣嘉靖間塔基壞就傾邑人銀孟常等修之于是塔固而殿宇亦咸新焉夫塔者何表藏舍利之所卽韓退之所謂佛骨者也佛經所載涅槃之後火焚之餘以其舍利分作九餅布諸各國以建九塔然皆外國爾其後申屠金人得于去病祭于甘泉則佛入中國之始及夫摩騰入漢羅什譯經誌公在梁圖澄依石達摩渡江玄奘取經于是佛教盛行雖天子宰相無不宗師故晉帝聽其不朝梁皇屢爲舍身唐之公卿甘爲弟子聽其說法矣唯韓子闕爲異端其後不應與顛僧深友遂令釋氏之徒立其書券宋興公卿學士多參謁禪流所不附者唯周程張朱數子故其言至今賴焉夫佛氏

經亦嘗翻其每卷之首有所謂耶輸陀者其妻也摩
具羅者其子也是佛固有妻子矣其語送終父母際亦甚
悉痛及語射于教諸天神之說亦多孝弟忠信等語是亦
未嘗外吾妻倫之道也後世君相不明此義遂令父母拜
于君后拜臣綱淪法教天下昏惑久矣天厭斯害篤生
聖祖創制聖法以立民極于是始令僧道拜其父母此亂
極之治其佛氏之道至于良心真切之地亦固合焉者也
今其徒知崇其教知修葺其所而不知自其真切之地以
修葺其心而不知依其師說遵我○祖訓其亦出不由戶
已矣是必卽其地而君之鯨者妻之孤者父母之獨者子
之修吾孝弟之道以忠信之心雖今此之
民卽堯舜之民矣昭慧之僧其思之哉

普濟寺在通遠門西北其南有**洪福寺**金大定年重脩

莊嚴寺在縣西許村一名旛杆寺有宋慶歷間利公和尚

記

洪教院在縣西南六里七留村正統間重修

清真寺在渭河南渭橋里元至正間建

崇興寺在縣西五里新家庄金明昌六年建

大悲寺在縣西南十七里高村弘治五年重修

崇皇寺在縣西南申村唐初置宋太宗勅賜名額相傳漢

薄姬妊文帝而出宮至此栢下誕生文帝俗傳唐明皇兩

幸於此又名重皇寺內有閣當重邱之上夏月居之不暑

又曰納涼閣宋种師道令高陵時其友鞞川居士石君倚

錢師道至此有題縣尉少華趙天祐亦有詩其序多不完

石云腰間羽箭覓封侯佩劍疑疑塞北遊惟有樊南多病
客獨登危閣日遲留 紹聖四年种師道令高陵嘗從軍
塞北友人石君倚餞至黑沙會宿昭日師道西行君倚及
利公福遂遊崇皇納涼閣上留題於閣柱 余家別墅在
藍田之南輞川谷中正是唐王維右丞別業之地雖田園
不多而清山綠水茂林修竹若與世塵相絕墅之南有會
勝寺入道消水相遡而行孱孱然起於足下奇石佳樹朱
樓深閣清人神觀又嘗客三峰鄭南山下小敷谷中朝往
而夕還者春秋令時曾無虛日穹山雲臺乃寄傲之地一
來渭北每一動念慨然遐思登高而望浩然歸計莫之能
禦也孀親垂白食口嗻嗻安得舍所事畜而斬然放懷於
物外然則久于齊非我志也芒鞋藜杖酌清泉而履白石
待余它日紹聖四年六月初三日 趙云放意學梅仙深
宮見白蓮閣陳先聖像碑記大周年孤塔穿雲外雙林倚
日邊禪關有遺 正德壬申涇野子過寺僧滿照請留題照
恨翠栢晚多烟

今九十步索重書題云

崇皇閣遠見涇涯秋日西遊一補
詩豈爲將來种太尉輞川居士與

追又題寺額重皇產異香漢文誕此幸明皇
隨相傳相祇蟠龍窟正在涇陽與渭陽

白馬寺在通遠門東北四里仁壽屯弘治十七年里人耆

老王温義官和馭等重修

習靜寺在李趙村元初置一名泥濶舉人呂田

曾學焉涇野子有題

此僧任傍涇河鄉縣諸生亦習

清真觀在迎翠門東南二十五里吳村有重修記

記曰曩弘治庚

幸間予同友人讀書東郊后土宮與道人張道隆同舍異
室居二年予治孔氏道隆治老氏道雖不相謀居久則情
親癸亥間本縣清真觀久圯觀在縣東南二十餘里吳村
原上吳村社人狀縣曰清真古觀也西魏文帝嘗遊過觀
中觀中石槽圍方不及二尋槽水常盈以飲隨駕馬千餘
匹不減升斗文帝異而問焉王觀對曰臣有飲馬珠水故

本圖16.50

不涸遂獻珠勅建此觀仍給地若干以瞻觀士乃今歲久
 荒頽獨殿基田地槽井依然無恙乞遣又玄觀道士二三
 任持此觀漸次修復于是縣遣道隆往居道隆身率其徒
 化緣鼎葺迄今二十餘年興築觀垣三百餘堵雜樹諸木
 無慮百株重整舊基仍修正殿得銅貫數根于敗礫之下
 治轉鐵鑽究成五櫺櫺皆六椽乃塑繪老子及諸神像南
 門直瞰涇渭合流其殿之東南垣外乃作道院院北與殿
 基同一原也井濟原土二丈始與道院地平空橫三丈縱
 及三尋南為洞門直達道院其北倚崖起構樓厦三櫺有
 廊脊與原埒厦前除地猶餘一二仞厦下中北鑿洞作房
 長幾二尋厦內東西各一洞寒冬居之單衣而汗若當祁
 暑如在水室洞之前門雖臨涇渭不及殿臺上觀之寥寥
 乎猶豁眸也往歲嘗送予友康子修撰德涵于此徘徊登
 眺曲洞層丘一一賞識是日天晴南山一帶翠繞如屏而
 涇渭澄澄滔滔東逝乃勃然興懷欲漁樵於此與道隆猶
 昔東郊日也今殿閣神像粧彩已訖道隆及其道友郭雲
 谷問記子嘆曰道隆其有材力者哉使其初治吾孔氏中
 庸之學其所造必滋可觀也嘗讀五千言矣多言守谿守

高更系示

卷二 祠廟

三

黑玄牝嬰兒雖與吾孔氏仁義之旨不同然其清靜無為則亦至矣斯觀之修不幾于有為乎于是道隆惕然曰呂

子命我矣 宋紹聖間西蜀宋寵父過此有題 三原過盡見秦川風物鮮明二月天

邊北十程回首望塞雲深處是烏延 一別長安三十日 邊州行盡厭紅塵渭橋舉首心歡喜重見南山似故人

白雲洞在清真觀內有記 涇野子偕近渠張處士訪三洞于渭濱時四月五日已暮三洞

已出事于南姜里其徒數人藝燈烹茗掃二榻於白雲窩中予與近渠對寢熟寐既旦早食三洞至矣提酒携魚喜

見顏面曰先生何以至此予曰君在南姜何以知吾至此答曰先生一來消息不甚大乎遂開宴於白雲窩中子聞

三洞壽辰且邇也稱一巨觥并賦白雲詩一絕自書焉且曰久矣予之不托於筆石也又明日異省有守制縣令拜

予於家不遇追訪至此出數金以為贄既而有他請予輒拒之還其金曰汝在喪予不能賻乃反餽我耶即此金以

賻汝不可乎又曰祁暑中勞汝過我不可使汝空歸吾贈汝以有命焉如汝之名已斥焉非予所得而汰也如汝之

名已漏焉非予所得而登也近有兩生者一親一故問書
於予以應試於長安予謂之曰汝交如可中是予之書增
其醜也汝文如不可中是予之書無所益也其後主試者
皆不用書惟糊名以列等兩生者皆在優列喜而嘆曰信
乎涇野子閉書之有定見也否則幾使人污蠖我輩矣縣
令色受似有覺也遂去既又飲於他所有論編糧新重者
欲豁訴一人曰前必有費而後行予謂之曰從編與從訴
費孰為良費少從編可也費多從訴不可也坐客皆從編
乃知事必有理理明則人易信言必有義義到則人易開
事不可以強為語不可以費詞且暮遂同近渠三洞南至
涇干以觀涇渭合流并看打魚之人還坐場中作詩十首
待行者有明玉於燈下備錄之又明日有縣幕至請予還
縣以為縣人囑答曰此行已為漁樵人矣待浴病湯泉而
後返又明日有異縣進士業者至為其友亦問書即以告
前兩生者誨之其人亦謝去是在八日是日子亦病閉洞
門於暮而後出也且日周覽新雨見禾花焉泯然暢茂
也幾絳州隋季良携其徒自北泉精舍步來予
滑濱觀網鯉而向有小記持示季良共訂之

昭慧宮

原在西街興國寺之左即二郎神廟也
萬歷元年改立東察院左前日子聖宮

又立觀 正統元年道人鍾子鳴建址見前

戶租志第四 兵匠物產附

弘治三年

戶二千一百五十五

口男婦三萬九千二

百四十七

夏地一千七百六十二頃九十七畝一分八

釐 稅糧九千八百六石九斗七升九合八勺

秋地六

百二十一頃一十八畝五分五釐 稅糧六千五百四十

五石九斗一升四合三勺

花地

百八頃四十七畝

稅布二千二百三疋一丈五寸

桑二百九十一株 稅

絹八十疋九尺一寸八分 四季課程鈔八千四百二十

九貫八百八十三文 商稅課鈔四千五百七十六貫六

百八十三文 門攤課鈔二千八百六十二貫 酒稅鈔

九百二十四貫 酒課鈔五十二貫八百文

嘉靖二十年 戶軍民二千一百九十九視舊則增四十

有四 口男婦三萬五百二十九視舊則減八千七百一

十有八 夏地一千七百六十頃三十五畝入釐則減舊

數二頃七十二畝有奇 稅糧九千七百九十四石八斗

二升七合五勺五抄則減舊數六石三斗有奇 秋地六

百二十一頃一十八畝五分五釐 秋糧六千五百四十
六石二斗一升四合四勺則增舊數三斗夫戶增四十而
口之減也至八千有餘則民之逋逃流亡者多矣乃均徭
銀差四季課程酒油門攤等稅視舊不減此不知征之何
人處之何則况夏秋布花等地減至二三頃矣而糧征乃
有贏餘此又何以分也

兵匠兵計靖虜衛百有一十三名○南京龍虎左衛百有
一十一名○會州衛一名○甘州中衛九名○甘州右護
衛二十五名○甘州後衛二名○甘州前衛九名○甘州

左衛五名○武功右衛五名○岷州西園城軍民千戶所
四名○四州威州守禦千戶所一名○武曠衛二名○騰
驤右衛六名○神武衛五名○神武前衛五名○神武右
衛二名○涼州衛十三名○涼州武備遞運所三十六名
○四川城都右護衛二十九名○保寧守禦千戶所一名
○山西安東中屯衛七名○留守右衛三名○留守前衛
二名○留守監衛一名○留守中衛一名○直隸潼關衛
三名○直隸興州右屯衛一名○直隸興州中屯衛二名
○榆林衛二名○雲南貴州一名○大理衛二名○留守

臨洮衛七名○普定衛四名○鄖陽衛四名○秦州衛五
名○廣東廉州衛二名○湖廣武關衛七名○東騰右衛
一名○河南都司衛一名○鎮夷守禦千戶所二名○前
寧衛一名○南京英武衛一名○漢中衛四名○秦州階
州衛一名○燕山前衛一名○直隸鎮海衛一名○南京
飛熊衛一名○鹽井衛一名○西安州千戶所六名○鞏
昌衛十名○安界中屯衛一名○涿鹿衛三名○太原右
衛四名○蘭州衛六名○歸德右衛一名○綏德衛二名
○西安右護衛十一名○固原衛八名○肅陽衛九名○

直隸通判左衛一名○嶺南衛十名○武備衛二名○延
安衛五名○錦衣衛八名○寧夏左衛一名○慶陽衛八
名○豹韜衛二名○中護衛一名○府軍前衛五名○思
州衛一名○興武營二名○貴州赤水衛八名○府君前
衛一名○西安後衛十三名○寬河衛五名○洮州衛五
名○莊浪衛十名○臨洮衛二十二名○營州中屯衛一
名○開平衛五名○龍慶衛二名○南丹衛二名○奉義
衛一名○遼東廣寧衛一名○西安前衛十一名○留守
衛一名○涼州雙塔遞運所一名○西安州千戶所十三

名○留守松盤衛一名○大寧都司營州左屯衛一名○
裕陵衛三名○廣西桂林中衛一名○河州衛一名○平
涼衛十六名○綏州衛六名○寧羗衛十一名○宣武衛
三名○越嶲衛一名○永昌衛二十二名○保安衛三名
○定海衛一名○四川寧番衛二名○貴州都司守禦千
戶所一名○北京金吾衛一名○青州守禦千戶所一名
○永寧衛一名○宣州衛一名○雲南都千戶所一名○
神武前衛一名○四川城都左護衛二名○慶陽滑池遞
運所一名○廣寧中衛一名○雲南莊州衛一名○興州

中護衛三名○南京應天衛一名○吉浪千戶所三名○
楚雄衛一名○山丹衛七名○彭真衛二十六名○臨安
衛一名○南京虎賁衛一名○天津衛一名○義州衛一
名○南京留守臨安衛一名○盧龍衛一名○寧山衛一
名○鹽林衛一名○羽林左衛一名○雲南六浪衛二名
○興武衛四名○崇慶府義衛一名○西寧衛一名○山
西潞州衛二名○河南中護衛二名○山西安東中屯衛
三名○大都河守禦千戶所一名○河南歸清衛一名
匠計住坐人匠十有七名○輪班人匠三十五名夫匠計

五十餘名兵隸衛所者殆且千人一取軍裝樂戶計丁派餉而徭稅正辦不與焉其昔人所謂多取老耆乎

物產禹貢雍州之域黃壤而縣土尤美卽築垣作臺百餘年不軌也所產五穀頗佳其藥則有遠志地黃玄胡索香附車前葶藶大小蘄牽牛涇河兩岸宜木綿渭河南宜慈

葑蒜多種柳二水中鱖鱠鯉鯊鱖鮓皆屬漢以爲上羞者也洲渚之間鶴鵲鳧鴨鷺鷥鴻鵠鴛鴦鷹百千成群縣諺曰騎社種麥社秋社也巳早則麥已遲則不實穀兩種黍黍後種穀早旋心遲則秋麥前後種者曰穉穀

其六月日種者曰疾穀又曰爭麥塲麥種在小麥之後
十日爲種後一月者爲穢糞少而雨多種者死糞多而雨
少穢者死立冬之前種莞豆已早則乾已遲則小滿後始
華小滿後始華則不實小暑種蕎蕎宜雨雨不宜夜然占
星而播種者多獲種糜在穀雨後十餘日糜懼霧霧遲早
糜獲霧早遲糜獲種蔬當午則無虫此亦水土之異宜也
夫雍田自古稱上上蓋以唐虞時洪水初殺西北地高多
黃壤東南沮洳方殷耳比其久也徐揚吳越皆有圩蕩而
雍地日高獨仰天澤天澤不時赤地千里故漢唐以來數

事鄭白諸渠以沃關中稅額因是滋重其後水利未行徵
科不減故雖黃壤之田無益民之遺窳且斃也

高陵縣志卷之二終

高陵縣志卷之三

歷數述第五

授時歷縣人楊公
恭懿作也因述

歷數自帝嚳歷日月而迎送唐堯置閏月以成歲之後歲月既久未免違錯中間雖因時立歲差日差等法如漢太初歷志以及唐都洛下閑僧一行所論多無定法惟元授時歷爲準蓋縣人楊公懿者當至元間應召受太史令同太學士許衡并天文士王恂郭守敬所撰乃至元十七年辛巳歲成也故又名辛巳歷當是時恭懿嘗有疏奏其言曰臣等編考自漢以來歷書四十餘家精思推算舊儀難

用而新者未備故日行盈縮月行遲疾五行周天其詳皆未精察今權以新儀木表與舊儀所測相較得今歲冬至景及日纏所在與列舍分度之差大都北極之高下晝夜刻長短參以古制創立新法推算成辛巳歷雖或未精然比之前改歷者附會元歷更日立法全踵故習顧亦無愧然必每歲測驗修改積三十年庶盡其法可使如三代日官世專其職測驗良久無改歲之事矣又合朔議曰日行歷四時一周謂之一歲月踰一周復與日合謂之一月言一月之始日月相合故謂合朔自秦廢歷紀漢太初止用

平朔法大小相間或有二大者故日食多在晦日或二日
測驗時刻亦鮮中宋何承天測驗四十餘年進元嘉歷始
以月行遲速定小餘以正朔望使食必在朔名定期法有
三大二小時以異舊法罷之梁虞翻口號口郭二造大同
歷隋劉焯造皇極歷皆用定期為時所阻唐傅仁均造戊
實歷定期始得行貞觀十九年四月頻大入皆異之竟改
從平朔李淳風造麟德歷雖不用平朔遇四大則避人言
以平朔間之又希合當世為進朔法使無元日之食至一
行造大衍歷謂天事誠密四大二小何傷誠為確論然亦

循常不改臣等更造新歷一依前賢定論推算皆改從實
今十九年歷自八月後四月併大實日月合朔之數也論
曰恭懿授時歷之準多本測日晷標也蓋前代天官氏測
日影者多用土圭圭首尖銳倒影多虛難以識取差之毫
釐謬以千里故恭懿雖用土圭乃上加龍首衝梁衝梁倒
影雖或少虛若切梁以識取之其爲實者多矣旣得實雖
千歲之日至卽氣朔之分加餘月之閏久亦不錯其爲巧
歷莫過焉故授時歷至今行之無弊也

禮儀抄畧第六 風俗附

載之會典入翰林後始獲莊親凡

朝祭諸禮真天下萬世所當遵行者也致仕來每遇縣中

朝賀必隨拜舞之末見諸儀節頗有差漏因詰禮士率多

不知而博士掌故亦無其籍至民間昏喪等禮尚財

而已又先師諸賢名器及禮樂器數嘉靖九年

御製記說未登會典柙因抄示諸士并抄家藏集禮

大畧與之肄業焉柙從禮官之後不敢不慎也

正旦朝賀禮

凡禮用祝贊下同

先日習儀於寺

縣俗習於興國寺

以樂道

闕亭儀仗

縣俗用鼓吹

設

闕亭殿上南面金椅在其前覆以

龍袍其南香亭一人黃傘在椅東北二人盆罐在傘南又其南二人橫瓜又其南二人鉞又其南二人瓜槌又其南二人劔其令旗鼓角金鼓旗皆二人對列如鴈行樂在二階鼓三嚴諸官朝服具分立丹墀班齊樂作四拜樂止縣官詣香案告

天祝壽俯伏興復位樂作四拜樂止搢笏鞠躬三舞蹈跪山呼萬歲三出笏樂作俯伏興四拜樂止畢且自行於縣廳禮如初若有出使官先行出使禮于露臺五拜三稽首仗右東面立長至

聖節皆如正旦

千秋節亦如之然止九拜不舞蹈山呼祝辭

臣某等荷國厚恩叨享

祿位皆賴天生我君保民致治今茲正旦長至 聖

且聖壽益增臣某等下情無任忻躍感戴之至 臣某等

茲遇皇太子殿下壽旦

之辰臣某等敬祝千歲壽

迎詔禮縣官朝服帥屬以樂導

闕亭綵輿儀仗

縣俗迎至迎翠門外

詔入 闕亭南面諸官北面五拜三稽首導之以還 闕

亭安定儀仗如正旦列諸官班齊樂作四拜樂止展讀官

跪受 詔于朝使請案開讀卒讀諸官俯伏與四拜搢笏

鞠躬三舞蹈跪山呼萬歲三出笏俯伏興四拜畢正官詣闕亭跪問

聖躬萬福朝使答畢諸官退易服禮朝使

鞭春禮先期塑牛勾芒于東郊縣俗在后土官先日縣官帥屬盛

服以樂迎于郊縣俗工具劇戲與迎人皆簪花置于牙前席殿勾芒則西

面旦日設酒果香燭于勾芒諸官朝服具班齊樂作四拜

正官進跪奠酒三祝辭俯伏興復位諸官四拜遂執綵杖

序立牛側正官枹鼓三工搗鼓贊鞭春諸官環擊牛三其

下承擊至碎祝辭惟神職司春令德應蒼龍生意誕敷品彙萌達某等忝牧是邑具禮迎新歲

和煦育我黎庶
日用土牛以頌春

護日食禮前期于牙門設香案面日在露臺上諸官位于

案後金鼓在儀門內工列于露臺南下生報初食諸官朝

服入次班齊樂作四拜樂止跪正官三袍鼓工及金鼓咸

鳴生報復圓樂作四拜樂止畢月食如日食不具朝服縣俗

間巷皆家自擊金鼓以救

祭先師禮用春秋仲月上丁三日齋戒先日縣官以樂送

祭需于學縣俗加鼓吹遂省牲有司各取毛血奠諸神下甲夜

有司盥洗陳設國學用盤楪縣俗用邊豆銅登然皆白磁先師帟一帛南三爵

禮儀抄畧

橫肆其南大羹登在中鉶羹左右登又其南黍簋稷簋各當登鉶之間稻簋梁簋負黍稷黍東八邊形鹽菜魚棗栗榛菱芡鹿脯皆對而南榛在鹽外豆入自稷西而南韭菹醢醢菁菹鹿醢內順芹菹兔醢笋菹魚醢外順羊在籩南豕在豆南香燭案在其前四配帛爵登鉶皆如先師簋黍簋稷無稻梁籩無榛芡豆無韭醢栗升于鹽東芹降于鹿下羊豕惟有肉十哲爵鉶豕肉皆一簋簋如配籩去麥棗豆去魚笋哲東西二帛兩廡各一帛黍稷籩豆燭香四位如一哲籩豆皆橫肆爵豕肉則位一期鼓三鼗諸官祭服

具存司應毛血建神四拜初獻獻官盥洗詣酒尊所遂詣
 先師孔子位跪酒笏奠帛奠爵出笏俯俛奠爵讀祝位卒
 讀爵伏奠乃詣獻復聖顏子宗聖會子遠聖子思至獻亞
 聖孟子時參獻官皆詣所分獻哲庶同禮畢以復位亞獻
 終獻惟獻官儀如初不盥洗不奠帛其饋禱受胙在讀祝
 位使者承受胙由中門出獻官出笏俯俛奠爵復位皆再拜
 撤饌送神四拜望瘞祝辭德配天地道貫古今
刪述六經垂憲萬世
 祭啟聖公禮同丁日亦三獻祝辭誕姓至聖為萬
者之師功德顯
 祭縣社稷禮用上戊日帛二皆皂羊三豕二銷二邊豆位

禮儀抄畧

皆四棗栗鹽菜魚韭菹菁菹醯醢鹿醢簋簋位皆二牲有

匣案三獻儀皆如祭先師讀祝在初獻縣稷之後祝辭

品物

資生烝民乃粒養育之功司土是賴

祭縣風雲雷雨山川城隍禮同壇為三位中風雲雷雨左

山川右城隍其儀如祭社稷羊三豕三帛七皆白中四左

二右一初祭有司即瘞毛血祝不告爵各奠于位中十有

二左六右三三獻時有司各緒酒于爵獻官別爵以行獻

讀祝飲福皆在中位前送神則望燎祝辭

妙用神機生育萬物奠我民居

足我民食某等欽承上命忝

職茲土謹具牲禮用伸常祭

祭鄉賢禮舊在祭丁之日蓋祭先師後獻官以下易祭服
着鮮明常服行一獻禮有特羊特豕

祭縣厲禮在清明中元十月朔至以城隍羊三豕三

石為盆飯前三日主祭官率屬齋沐繕城隍至日設城隍

位于壇上羊一豕一設無祀鬼神牌于壇下左右羊二豕

二皆鮮置于器羹飯各以其位列日暮諸官常服就位四

拜主祭官盥洗詣神前跪獻酒三俯伏興復位讀厲文見儀

在卒讀四拜焚紙錢禮畢

鄉飲酒禮正月望十月朔縣官率屬行于儒學前三日至

人爲書戒賓僕以下前日祝以圖設坐至日主人請學遣
 使速賓賓至帥屬迎于屏門外揖讓升堂再拜凡拜揖皆答升
 坐司正起揖于中堂揚觶而讀卒讀飲酒投觶于有司揖
 如初復位皆坐讀律誥揖儀如揚觶卒讀復位皆坐有司
 供饌以次舉主人獻賓有司授主人爵主人洗爵實酒奠
 賓席退再拜賓卒飲揖主人受爵洗獻僕如初乃復位賓
 酢主人如獻禮卒酢各就位介三賓衆賓有司以次酌酒
 于席湯三進乃羞無算爵樂作小雅肄三撤饌賓主降再拜南
 詣香案謝

恩五拜者首三主人帥薦送饗于席內外其進其一里春
秋社祭會飲酒殺于百家內供辦老者雖至者上坐少者
雖至富下坐有過者雖年長財富坐席末壽德或解辭
朝廷率由舊章敷崇禮教舉行鄉飲非為飲食凡我長幼
各相勸勉為臣盡忠為子盡孝長幼有序兄弟恭內睦
宗族外和鄉里母
以廢墜以忝所生

鄉射禮縣官朔望謁文廟講經畢習于射圃先期主人遣
使戒賓再拜凡拜揖皆答王降賓亦降今拜多省用揖期席賓西階南面東上

主人阼階上北面設尊解于賓東先在阼階東南縣于洗
東北西面乃張侯不繫左下綱中掩束之乏容也為獲者御矢在

侯西北儻報賓至主人迎于門外揖乃肅賓入賓厭引手衆

賓入門左東面北上揖讓升主人及賓皆面相前再拜主

人取爵適洗實爵拜獻賓今跪并拜皆省及奠爵賓拜受于席前復

位有司薦脯醢設折俎賓祭酒啐酒降席告旨卒爵揖降

酢主人洗拜皆如獻禮主人告崇酒遂實別觶酬之阼階

上拜祭卒觶揖降洗升實觶適西階上獻衆賓降復位衆

賓辯有脯醢主人奠虛爵揖讓升賓及衆賓就席一人洗

拜舉觶于賓降大夫若尊入門左主人及賓皆降揖讓以

大夫升席于僎位拜至洗獻皆如初然大夫有加席不啐

禮不告有其降洗升爵至在兩楹間主人來降爵于西階
 上揖告樂備復降階降大夫降立于賓南面主人揖讓以賓
 大夫及衆賓升就席正于西階上少東執豆席上有瑟笙
 入立于縣中西面乃合樂采蘋采藻室火獻玉正拜飲不
 拜既爵不祭不洗主人降揖立司正洗觶升請安于賓賓
 許乃復命主人遂立楹間以相拜主人揖賓皆就席司正
 實解舞不祭卒解奠洗北退立解南三稱饌于堂西南面
 東上司射適堂西袒左免衣遂取弓階西挾乘矢北西階
 上告賓曰弓矢既具有司請射實許乃適階告主人曰

禮儀抄畧

賓許射降自西階前西面命弟子綯射器在堂西賓大夫
 弓矢在西序主人弓矢在東序司射遂比三耦于堂北面
 命上射曰某御子子命下射曰子與某子射司正為司馬
 命張侯弟子脫束繫左下綱又命獲者以旌侯中樂正命
 弟子遷樂西階下東南西面樂正南立北面司射獲挾乘
 矢命三耦各讓取弓矢拾更遞三耦皆袒夾遂執弓搯三
 挾一个進立司射西南東面北上司射搯三挾一个進揖
 當階北面揖及階揖當物射時北面揖及物揖左足履物
 還視侯中俯正足不去旌以誘教射將乘矢在執弦南面

若如升射降出子位南適堂西換一个適階西揖扑反位
 司馬命獲者執旌負侯司射西面作土耦射反位上耦揖
 進皆如誘射儀司馬適堂西袒而執弓出司射南升西階
 鈎繞楹由上射後西南面立于物間右執蕭南揚弓命去
 侯獲者執旌諾至乏偃旌而侯司馬出下射南還其後降
 如初升處釋弓襲反位立司射位南司射進交司馬于西
 階前相左升階北面命上射曰無射獲中無獲從獲乃退
 上射既發挾弓矢下射乃射拾發獲者坐而獲舉旌以官
 偃旌以商卒射降如誘射儀與升射者相左于階前由司

馬南適堂西釋弓脫夾拾襲俟于堂西南面東上三耦卒

射亦如之司射去扑倚西階西升堂告賓曰三耦卒射司

馬如初適物間儀南揖推弓命取矢獲者諾以旌負侯而

侯司馬出左物南還其後降自西階適堂前北面命弟子

設榻于中庭南當洗東肆乃如初降釋弓襲反位弟子取

矢北面坐委矢于榻北括退司馬襲進榻南坐乘矢若不

備則又如初升儀命曰取矢不索蓋司射倚扑升請射如

初賓諾乃適阼階告主人與賓耦遂告于大夫與士耦曰

某御于子乃西階上北面作衆賓射降播扑由司馬南適

堂南北衆耦衆贊者與射者皆降繼三耦而立東上司射
命三耦拾取矢于楅如初一耦升射司馬命去侯皆如初
司射猶挾一个去扑升請釋獲于贊贊許降擗扑立階前
北面釋獲者設中于楅北執算者從司射進堂下北面命
曰不貫中不釋算乃射釋獲者坐取所釋實鹿中之八算
執之改實八算若中每一个釋一算上射于右下射于左
三耦卒射實主人皆降如三耦儀于各序皆由其階揖升
堂揖降于各序襲升就席大夫亦如賓儀則由堂西就其
耦爲下射卒射皆釋脫于堂西襲耦止大夫則升就席衆

賓繼射釋獲皆如初卒射釋獲者執餘獲升西階盡告賓
曰左右卒射降委餘獲于中西司馬命取矢委矢乘矢皆
如初司射適西階西釋弓去扑襲進由中東北面視算反
位釋獲者東面坐數左右獲遂執賢獲升西階盡告于賓
若右勝則曰右賢于左以純數告若有奇者亦曰奇若左
右均則曰左右均降斂算實其入于中司射適堂西命弟
子設豐于西楹西勝者之弟子洗觶升酌南面坐奠于豐
上司射袒執弓搯扑北面命三耦及衆賓勝者皆袒決遂
執張弓不勝者襲脫拾執弛弓皆進立于射位北上一耦

進揖如初升射及階勝者先升堂少右不勝者坐取觶豎
上退立卒觶授有司反就席大夫飲則耦不升若其耦不
勝亦執弛弓特升衆賓繼飲辯乃撤豐觶司馬獻獲者于
侯司射獻釋獲者于中皆洗爵拜受拜送其三射司射請
射命三耦及衆賓拾取矢皆如初司馬命去侯及降皆如
初司射去扑襲升請以樂樂于賓賓諾降摺扑東西命樂
正適堂下北面命上射曰不鼓不釋乃退樂正東面命太
師曰奏采繫間若一乃射三耦卒射賓主人大夫衆賓繼
射釋獲告獲取矢委矢乘矢視算賢獲升飲皆如初司射

猶如初儀命各取矢授有司于堂西皆揖升就席司射乃適堂西釋弓扑決拾襲反位司馬命弟子釋侯命獲者以旌退命弟子退楅命獲者退中與算司馬反爲司正退立觶南樂正命工遷西階賓北面取俎西觶阼階上拜酬主人乃就席主人適西階酬大夫大夫降席如賓酬禮司正升自西階相旅作受酬者皆如賓禮降復位使二人拜舉觶如初儀復升自西階告命撤俎賓主人皆離席卒撤主人以賓揖升坐無算爵二人舉觶賓大夫不興卒觶不拜遂旅酬于西階皆不拜辯及執觶賓興主人拜送于門外

士庶人冠禮筮日筮賓于廟品官禮擇日告廟酒果盥洗出

主四拜遂戒賓期則設帷房于廳東北陳深衣大帶襦衫

有祝辭西偏酒南其下納履納鞋席在房南巾帽幘頭俟于西階

西有籍幕洗在東榮前縣俗猶加緇布冠備弁若品官則

有東房有帑及篋始加青衣乃位主人在阼階將主人迎

素裳再絳紗服三爵弁服冠者紛在房

賓升堂再拜立于各階賓揖將冠者即席始加贊者盥為

受冠于西階進祝乃加再加三加皆如始乃醮于戶西南

冠者入房深衣帶履出再加三加加不盥乃醮于戶西南

面字于西階東縣俗三加及醮字辭或從令制其冠者受

酒拜啐酒拜對字拜及賓答拜皆如典

冠者拜賓及贊者拜父母及諸尊長出見鄉先生主人禮

賓卒禮以冠者見廟縣俗見廟同家禮在見父母前其入

家四拜見母母立受儀禮母拜恐因

禮儀抄畧

子獻脯
賓也

士庶人昏禮納采以問名

縣俗發媒似之蓋先通言至是主人告廟具書宴媒往女氏用

鴈若羊酒致辭女主人亦告廟復書卜吉則納吉如納采
有答書各具男女名字生年月日

一成禮似之加金幣羊豕主人黨亦往同女主人時娶則
謁其廟而後燕明日女主人復禮于男氏有羊酒

納徵如納吉品官加立纁束帛縣俗第二成禮
似之加冠花釵釧女主人酬以女鍼指
期縣俗問客似壻冠而後親迎縣俗迎在午前以是日宴

子命辭女主人告廟醮女戒辭壻奠明日婦廟見見舅姑
之不用儀物壻冠而後親迎男女賓也其主人告廟醮

鴈授綏導婦入房交拜合卺皆如典明日婦廟見見舅姑
縣俗婦下車卽拜神主改粧卽拜賓舅姑其明日舅姑率

壻婦見廟及婦執棗栗見舅殿修見姑及舅姑禮婦皆如
壻往見婦之父母執贄四拜縣三日婦盥饋縣俗婦盥

俗亦謁其廟三日婦盥饋洗具饌于

舅姑亦先獻廟其婦家
備盛饌饋婦皆婦典

士庶人喪禮疾病遷正寢屬續以既絕廣牀寢地乃哭被髮徒

否復縣俗復亦執卒沐浴乃襲拒手足其死後掘坑抗衾

沐浴多廢其襲亦在臨危有官者多用官服唐巾士庶用
直領包巾間用深衣幅巾其瞑目充耳握手或用綿纈帕

無肩質殺昇尸牀于堂中奠祝盥斟酒薦脯醢主人下為位哭

縣俗用楊氏禮婦人在屏後哭飯含品官含用玉六品下主自含縣設靈

座魂帛立銘旌于其右古用明日小歛品官有朝祭服

其布絞衾疊衣及括髮免三日大歛于棺實鬻爪楊氏禮

木炭一秤鋪燈草及七星設靈牀于柩東乃殯乃奠如小

板栢枕今縣俗亦或用之歛儀

禮儀抄畧

四日而成服主人始食粥朝奠夕奠食時上食哭無時朔

日殷奠

縣俗每七俗節亦奠

有新物則薦之

如土食儀

三月而葬避五患

以擇地祠后土于墓左

請吉服人或有官者

遂穿壙刻誌石造明器

及下帳筮筭瞿備大饗及娶乃作主

用粟

前發引一日設奠

殯祝執功布奉柩朝祖遷廳事

主人下哭從至廟止哭哭于廳事皆如初儀品

官擊鼓為節加拂披鐸嬰旌

燾導柩縣俗廳小率用棚

晡設祖奠

縣俗亦親賓致奠

賻厥明遷柩就輦

品官飾棺一池紐三采無具陳吉凶儀仗及方相

設遣奠

撤于筮

祝奉魂帛及木主于靈車遂發引

楊氏禮有引魂馬縣俗猶用之

至墓魂

帛入靈幄設奠柩至賓拜辭歸乃窆主人贈玄纁于柩側

乃獻明器下帳筭篋乃實土埋誌石又實土以築祠后

土禮如初祝題主于靈幄前縣俗請祝奉神主升車返主

人下哭從神主至家置靈座主人下哭位如初拜吊客是

日虞祭主人下沐浴祝出主主人下倚杖戶外太哭出杖

凡出入皆然降神再拜主人盥于西階升祝進饌如朝奠品初

獻主人升受酒三祭于茅沙奠亞獻縣俗婦終獻親賓

食祝升添主人下出門旁立祝闔戶噫歆告啟戶主人下

哭執事點茶主人出祝告禮成辭神哭再祝埋魂帛罷朝

夕奠柔日再虞剛日三虞辭曰三月而卒哭儀如虞縣俗

禮儀抄畧

禮儀抄畧

日主人兄弟疏食飲水不食菜果寢時枕木古有受服卒哭明

日而耐主人哭奉新主至廟止哭入置于亡者之祖主側

儀如卒哭哭返新主祝辭于祖則曰齊耐孫某于新主則曰薦禘事期而小祥儀

如卒哭辭稱祥事主人練服縣俗練無冠或着麻布始食菜果

再期而大祥儀如小祥先日告遷于廟奉禫主虛東一龕

改題群主是日祭畢主人禫服安新主于東龕祝撤靈座

斷杖埋禫主于墓側主人始飲酒食肉復寢大祥中月而

禫儀如大祥喪至此不計主人始吉服其聞喪奔喪改葬

畧如初其齊衰三年杖期不杖期五月三月大功九月小

功五月禮廟三月及長慶廟廟下禮服皆以次降

士族人祭禮禮得祀其祖父母父母于寢其時享亦畧做

品官品官有家廟祭用四仲月前期以环玦下日于廟前

三日主人主婦致齋于內外設高祖考妣下四代位各一

椅一卓而合之東上祔位在東西隔下主人具饌乃行事

品官唐帽束帶封婦女釵翟衣士深衣幅巾庶人巾衫結條婦人大襖長裙縣俗婦人不與祭盥洗告廟

請神至于正寢縣俗有廟止祭于廟祭神再降神主祭升焚香跪受

土四位同進饌主人設正四位每位肉在盞南麵食在肉

再拜復位西魚在醋南米食在魚東醋東盞羹盞西孟飯其蔬果脯醢匙筋則初獻主人升取位前盤盞注酒前設既設祔位人代設奠故處北面跪又醇酒茅

上兄弟炙肝于爐薦筋四正位考
亞獻終獻亦如初
有食

此祔位人分獻辭曰祇薦歲事
不讀祝
主人升添酒主婦授祝闔門
此即厭也男啟門祝聲三噫
匙飯中正筋再拜降祝闔門
婦門東西立啟門敬乃啟門

主人主婦分進茶
主人飲福受胙于香案前
祝授酒及飯
于考妣祔位人代主人飲福受胙于香案前
于主人致嘏

辭主人啐酒嘗食俯伏其祝
辭神再
檀主歸于廟乃徹乃
告禮成主人復位皆再拜
神再

餽若庶人則不殺縣谷工庶人之祭不及四仲月多
在除夕寒食中元十月一日長至禮簡畧詳縣谷

士庶人相見禮子孫弟姪甥壻見尊長生徒見師奴婢見

家長久別四拜近別揖諸親戚長幼久別再拜平交同其

鄉黨士農工商平居相見及宴會皆序齒如佃戶見佃主

不齒序並行以少事長之禮親屬則不拘其內外官致仕

居鄉惟子弟族序尊卑如家人禮于外家及妻家亦然若筵會則設別席不得坐乎無官者下如與同致仕官會則序爵爵同序齒其與異姓無官者相見無答禮庶民則以官禮謁見

縣俗正旦前夕士民皆祭其先先期懸紙錢于闕旁夜半祭畢焚錢酹酒闕旁者亦焚之酹湯酒或卽古祭禱之義也比雞鳴各懸黃錢于長竿以祀天曰接天神又以麻竿木炭懸之門曰去瘟疫至日或合族或隨各支釀酒饌以祭宗祖祭畢尊長上坐卑幼以次拜其下餼祭之餘而散

曰拜神主二日親屬詣門相拜曰拜節其親者則送酒禮
至元宵各坊巷設蠟堂燈山以祈年順五日縛紙婦人寅
夜出之街衢曰送窮立春日女新適人者母家歸禮焉曰
迎春至日縣人爭裂土牛皮以塗竈曰祛蚩蜮奪春杖以
育蠶謂蠶盛也用朱墨筆畫牛角及小兒項曰打春二十
日置煎餅屋上曰補天清明前二日爲寒食家長率子弟
婦女往祭墳若有葬在去年者則前一日祭曰新墳清明
日縛鞦韆婦女童子遊賞罷業卽有作業者曰能令目盲
四月八日男女戴皂筴葉曰巳頭痛端午日戴艾葉曰去

疾幼者繫百索于項腕曰蛇蟲不齧又曰爲厲原蛟龍故
六月六日迎女節七夕女子生蓼豆葉以乞巧每有燈處
遊針以驗能中元祭先在黃昏儀如正且然必折麻穀以
獻蓋告穡事成也中秋請男女賞月間送月餅重陽獻糕
于先人因以相餽亦迎女節也十月一日薦俸餽于先人
儀如中元又送寒衣于墓卽古履霜露而悽愴之遺也冬
至儀如正且然焚錢在甲夜臘月五日食五色煮豆曰豆
者毒也食之已五毒八日煮粥以獻先卽臘祭也二十四
夜祀竈以糖塗竈口曰見天無言是非夫縣民多醇厚朴

實尚勤儉好禮度事耕織徵稅易完詞訟尤簡但昏姻多重財貨致有男女愆期者

職官考第七

夫高陵在周既行封建或設州縣長皆不可考然而黨正庠師族師閭胥比長鄣正則固有也秦置令丞尉皆一人三老一人亭長未詳人數漢率襲秦令一人千石月俸八十斛丞一人四百石月俸十五斛尉一人二百石月俸三十斛主簿令長得自調用秩與尉同三老一人擇鄉之三老爲之得與令丞尉以事相教孝弟力田一人嗇夫游

一人三老齋夫見官師傳韓延壽下至武帝增置學官一人平帝置經師

一人晉增置齋夫二人校官椽一人方畧吏一人書吏二人吏佐一人後

魏增置博士助教皆一人學生四十人唐置令一人從六品秩

田五頃歲俸八百有五石丞一人從八品秩田三頃歲六

十四石有五斗主簿一人正九品秩田二頃五十畝歲俸

十九石有五斗尉一人從九品秩與簿同坊正村正未詳其數學置

長使一人學生三十人則固猶漢魏也宋置知縣一人秩田六

頃俸二十千丞一人秩田四頃俸十五千主簿二人秩田

三頃俸十二千尉一人主學一人秩俸皆同簿增置忠翊

郎巡檢一人承信郎監毘沙鎮酒稅一人忠翊郎監渭橋

鎮酒稅一人元增置達魯花赤兼諸軍與魯勸農事一人

秩田二項月俸鈔十有八兩縣尹一人秩與達魯花赤同

主簿一人秩田一項五十畝月俸鈔十有三兩丞一人秩

田一項月俸鈔十有二兩典史及尉皆一人

見魏堯啟書
戒石亭銘外

月俸米八石鈔十兩教諭一人月俸二石鈔十兩至

國朝縣爲臨潼三原所析遂裁尉及主簿巡檢止設知縣

一人正七品月俸七石有五斗丞一人正八品月俸六石

有五斗後丞又裁革典史一人月俸二石教諭一人訓導

三人俸廉皆三石

學生廉膳皆二十八

陰陽訓術一人醫學訓科

一人僧會一人道會一人額吏十有二人

司吏三人典吏八人儒學司吏

一人司吏

月糧三斗

三
分三
二

清陵縣志卷之三終

高陵縣志卷之四

官師傳第八

周嬴公子市秦昭襄君之弟也赧王二十四年昭襄封市爲高陵君嘗進退不請又是時市弟悝爲涇陽君而昭襄身魏冉爲穰侯共理秦政皆專恣自用

漢趙周武帝元鼎二年爲丞相封高陵侯父夷吾爲楚王戍太傅諫諍而死周其賢者之後與

韓延壽字長公燕人也後徙杜陵宣帝地節元康間爲左馮翊嘗治高陵獄蓋行縣至高陵民有兄弟訟田延壽

高陽縣志 卷四
大傷之曰幸得備位爲郡表率不能宣明教化至今民有
骨肉爭訟旣傷風化重使賢良吏嗇夫三老孝弟受其恥
咎在馮翊當先退是日移病不聽事因入臥傳舍閉閣思
過令丞嗇夫三老亦皆自繫待罪此兩兄弟者深自悔皆
自髡肉袒謝願以田相移終死不敢復爭延壽大喜開閣
延見酒肉與相對飲食勉勵以意告鄉部以表勸乃起聽
事勞謝令丞以下引見尉薦郡中歛然莫不傳相救厲不
敢犯延壽恩信周徧二十四縣莫復以詞訟自言者

王尊字子贛涿郡高陽人也成帝建始初爲高陵令初尊

少孤諸父使牧羊澤中尊竊學問能史書年十三求爲獄
小吏數歲給事太守府問詔書行事無不對太守奇之除
補書佐後以高第擢爲安定太守有治績又擢爲司隸校
尉中書謁者令石顯專權爲奸邪丞相匡衡御史大夫張
譚皆阿附畏事顯尊因奏衡無大臣體奏曰衡譚位三公
與五常九德以總
方畧壹統類廣教化美風俗爲職如中書謁者令石顯等
專權擅勢大作威福爲海內患害不以時白奏行罰而阿
諛曲從附下周上懷邪迷國無大臣輔政之義皆不道在
赦令前赦後衡譚舉奏顯不自陳不忠之罪而反揚著先
帝任用傾覆之徒妄言百官畏之甚于主上卑君尊臣非
所宜稱失大臣體又正月行幸曲臺臨享罷衛士衡與中
二千石大鴻臚賞等會坐殿門下衡南面賞等西鄉衡更
爲賞布東鄉席起立延賞坐私語如食頃衡知行臨百官

共職萬眾會聚而設不正之席使下坐上相比為小惠于
公門之下動不中禮亂朝廷爵秩衡又使官大奴入殿中
問行起居還言漏上十四刻行臨到衡安坐不
變色改容驕慢不敬有詔勿治謫尊高陵令
是時成帝

新卽位重傷大臣乃下御史丞問狀劾奏尊塗污宰相摧
辱公卿輕薄國家奉使不敬詔左遷尊為高陵令數月以

病免會南山群盜備音明音倚姓也宗等校尉傅剛逐捕歲餘不

能擒或說大將軍王鳳鳳遂薦尊為諫大夫守京輔都尉
行京兆尹事旬月盜清遷光祿大夫守京兆尹

翟方進字子威汝南上蔡人也成帝鴻嘉間封高陵侯初
方進家世微賤至方進父翟公好學為郡文學方進年十

二三失父給事太守府爲小史號遲鈍數爲樵史詈辱方
進自傷通詣汝南蔡父相蔡父太奇其形貌謂曰小史有
封侯骨當以經術進方進心喜因病歸家欲西至京師受
經後母憐其幼隨之長安織屨以給方進讀經博士受春
秋積十餘年經學明習以射策甲科爲郎二三歲舉明經
遷議郎累官丞相司直司隸校尉及京兆尹後擢丞相封
高陵侯食邑千戶後母尚在方進內行修飭供養甚篤及
後母終旣葬三十六日除服起視事以爲身備漢相不敢
踰國家之制爲相公潔請託不行郡國持法刻深奏牧守

九卿峻文深詆中傷者尤多如陳咸朱博蕭育逢信孫閑
 之屬皆京師世家以才能少歷牧守列卿知名當世而方
 進特立後起十餘年間至宰相據法以彈咸等皆罷退之

劾王鳳王立諸奸相業甚顯

劾咸信曰邪在貪汙營私多
 欲皆知陳湯姦佞傾覆利口

不軌而親交賂遺以求薦舉後為少府數餽遺湯信咸幸
 得備九卿不思盡忠正身內自知行辟無功效而官婚邪
 臣欲以微倖苟得無恥孔子曰鄙夫可與事君也與哉咸
 信之謂也過惡暴見不宜處位臣請免以示天下奏可初
 咸信官薄皆在方進右及方進為相皆不平咸又嘗以事
 詰責方進方進心恨之若陳湯則大將軍王鳳王音所厚
 者也又劾咸曰咸前為九卿坐為貪邪免自知罪惡暴陳
 依託紅陽侯立微倖有司莫敢舉奏冒濁苟容不顧恥辱
 不當蒙方正舉備內朝臣并劾紅陽侯立選舉故不以實
 有詔免咸勿劾立



一
李商隱
卷五

邪臣自結附託為黨庶幾立與政事欲獲其利今立斥
就國所結交尤著者不宜備大臣為郡守案後將軍朱博
鍾鹿太守孫閑故光祿大夫陳咸與立交通厚善相與為
腹心有背公死黨之信欲相攀援死而後已皆內有不仁
之性而外有雋材過絕于人勇猛果敢處事不疑所居皆
尚殘賊酷虐苛刻慘毒以立威而無纖介愛利之風天下
所共知愚者猶惑孔子曰人而不仁如禮何人而不仁如
樂何言不仁之人無所施用不仁而多材國之患也此三
人皆內懷奸猾國之所患而深相與結信于貴戚姦臣此
國家大憂大臣所宜沒身而爭也請免傳閑咸歸故郡以
消奸雄之黨絕群邪而望奏可先是方進劾立狡猾不道
請下獄成帝曰紅陽侯朕之舅不忍致法惟遣就國陳咸
亦憤 綏和二年春熒惑守心議郎李尋說方進退位方進
死

方憂而上聽星士賁麗之言賜冊令自殺

冊曰皇帝問丞
相君有孔子之

賢孟賁之勇朕嘉與君同心一意庶幾有成惟君登位于
今十年災害並臻民被饑餓加以疾疫溺死關門杜開失

言師傳

于守備盜賊黨輩吏民殘賊毆殺良民斷獄歲歲多前上
書言事交錯道路懷姦朋黨相爲隱蔽皆無慮群下兇
詭更相嫉妬其咎安在觀君之治無欲輔朕富民便安元
元之念間者郡國穀雖頗熟百姓不足者尚衆前去城郭
弗能盡還夙夜未嘗忘焉朕惟往時之用與今一也百姓
用度各有數君不量多少一聽群下言用度不足奏請一
槩增賦稅城郭墮及園田過更算馬牛羊增益鹽鐵變更
無常朕旣不明隨奏許可後議者以爲不便制詔君君
云賣酒醪後請止未盡月復奏議令賣酒醪朕誠怪君何
爲容容之計無忠固意將何以輔朕帥導群下而欲久蒙
顯尊之位豈不難哉傳曰高而不危所以長守貴也欲退
君位尚未忍君其熟念詳計塞絕奸源憂國如家務便百
姓以輔朕朕旣已改君其自思強食慎職使尚
書令賜君上尊酒十石養牛一君其審處焉
其子宣襲

爵高陵侯亦明經篤行君子人也

楊湛未詳何郡人成帝綏和間爲縣令與櫟陽令謝游皆

貪猾不遜持郡短長前二千石數案不能竟及東海薛宣
守左馮翊湛詣府謁宣宣設酒飯與相對接待甚備已而
陰求其罪臧具得所受取宣察湛有改節敬宣之效迺手
自牒書條其姦臧封與湛曰吏民條言君如牒或議以爲
疑于主守盜馮翊敬重令又念十金法重不忍相暴章故
密以手書相曉欲君自圖進退可復伸眉于後卽無其事
復封還記爲君分明之湛自知罪臧皆應記而宣辭語温
潤無傷害意乃卽解印綬付吏爲記謝宣終無怨言而櫟
陽令游自以大儒有名輕宣宣獨遺書顯責之然則湛亦

本通志卷五十四

可謂勇于知過者矣

段熲

古迥苦迥二切火光也

字紀明武威姑臧人也明帝永平間爲

陽陵令熲之先出鄭共叔段西域都護會宗之從曾孫也

熲少便習弓馬尚游俠輕財賄長乃折節好古學初舉孝

廉爲憲陵園丞陽陵令所在能政後遷遼東屬國都尉及

護羌校尉殺虜首以萬計再遷司隸校尉及太尉然曲意

宦官爲士所短初熲與皇甫威明張然明並知名顯達京

師稱爲涼州三明明云

晉楊駿字文長弘農華陰人少以王官爲高陵令鎮軍府

司馬後以后父超居重任遷車騎將軍封臨晉侯

潘尼

音寧

字正叔滎陽中牟人太康中為高陵令少有清才

與從父岳俱以文章見知性靜退不競唯以勤學著述為

事著安身論以明所守

論曰蓋崇德莫大乎安身安身莫尚乎存正存正莫重乎無私無私

莫深乎寡欲是以君子安其身而後動易其心而後語定其交而後求篤其志而後行然則動者吉凶之端也語者榮辱之主也求者利病之幾也行者安危之決也故君子不妄動也動必適其道不徒語也語必經于理不苟求也求必造于義不虛行也行必由于正夫然用能免或繫之凶享自天之祐故身不安則殆言不從則悖交不審則惑行不篤則危四者行乎中則患憂接于外矣憂患之接必生于自私而興于有欲自私者不能成其私有欲者不能濟其欲理之至也欲苟不濟能無爭乎私苟不從能無伐乎人人自私家家有欲眾欲並爭群私交伐爭則亂之萌

也伐則怨之府也怨亂既構危害及之得不懼乎然棄本
要末之徒知進忘退之士莫不飾才銳智抽鋒擢穎傾側
乎勢利之交馳騁乎當塗之務朝有彈冠之朋野有結綬
之友黨與熾于前榮身扇其後握權則赴者鱗集失寵則
散者瓦解求利則託勿頸之權爭路則構刻骨之隙于是
浮僞波騰曲辯雲沸寒暑殊聲朝夕異價鴛蹇希奔放之
跡鉛刀競一割之用至于愛惡相攻與奪交戰訓謗噂噉
毀譽縱橫君子務能小人伐技風頽于上俗弊于下禍結
而恨爭也不疆患至而悔伐之未辯大者傾國喪家次則
覆身滅祀其故何邪豈不始于私欲而終于爭伐哉君子
則不然知自私之害公也故後外其身知有欲之傷德也
故遠絕榮利知爭競之遘災也故犯而不校知好伐之招
怨也故有功而不德安身而不為私故身正則私全慎言
而不避欲故言濟而欲從定交而不求益故交立而益厚
謹行而不求名故行成而名美止則立乎無私之域行則
由乎不爭之塗必將通天下之理而濟萬物之性天下猶
我故與天下同其欲已猶萬物故與萬物同其利夫能保
其安者非謂崇生生之厚而耽逸豫之樂也不忘

有期進者非謂窮貴寵之榮而籍名位之重也不忘退而
已存其治者非謂嚴刑政之威而明司察之禁也不忘亂
而已故寢蓬室隱陋巷披短褐茹藜藿環堵而居易衣而
出苟存乎道非不安也雖坐華殿載文軒服黼繡御方丈
重門而處成列而行不得與之齊榮用天時分地利其布
衣安藪澤沾體塗足耕而後食苟崇乎德非不進也雖居
高位享重祿執權衡握機秘功蓋當時勢侔人主不得與
之比逸遺慮沒才智忘肝膽棄形器貌若有能志若不
及苟正乎心非不治也雖繁計策廣術藝審刑名峻法制
文辯流離議論絕世不得與之爭功故安也者安乎道者
也進也者進乎德者也治也者治乎心者也未有身安而
不能保國家進德而未能處富貴治心而不能治萬物者
也然思危所以求安慮退所以能進懼亂所以保治戒亡
所以獲存也若乃弱志虛心曠神遠致徙倚乎不拔之根
浮游乎無垠之外不自貴于物而物宗焉不自重于人而
人敬焉可親而不可慢也可尊而不可遠也親之如不足
天下莫之能狎也舉之如易勝而當世莫之能困也達則
濟其道而不榮也窮則善其身而不悶也用則立于上而

非爭也舍則藏于下而非讓也夫榮之所不能動者則辱之所不能加也利之所不能勸者則害之所不能嬰也譽之所不能益者則毀之所不能損也今之學者誠能釋自私之心塞有欲之求杜交爭之原去矜伐之態動則行乎至通之路靜則入乎大順之門泰則翔乎寥廓之宇否則淪乎渾冥之泉邪氣不能干其度外物不能擾其神哀樂不能盪其守死生不能易其真而以造化爲工匠天地爲陶鈞名位爲糟粕勢利爲埃塵治其內而不飾其外求諸已而不假諸人忠肅以奉上愛敬以事親可以御一體可以牧萬民可以處富貴可以安賤貧經盛衰而不改則庶幾能安

初應州辟後以父老辭位致養復舉秀才爲太常

博士歷高陵令淮南王允鎮東叅軍元康初拜太子舍人

上釋奠頌 頌曰三光迭運五德代徵黃精旣亢素靈乃暉

有皇承天造我晉畿祚以大寶登以龍飛聖容
勿穆侍講閭闔抽演微言啓發聖真探幽窮曠温
故知新日皇儲后體神谷幾兆吉先見知來動微 出爲宛

一
李陽
16
K
50
城

令在任寬而縱恤應勤政厲公平而遺人事入補尚書

郎俄轉著作郎為乘輿箴辭曰易稱有天地然後有人倫有父子然後有君臣傳曰大孝

天地其次君臣然君臣父子之道天地人倫之本未有以

先之者也故天生蒸民而樹之君使司牧之將以導群生

之性而理物之情豈以寵一人之身極無量之欲如斯而

已哉古之為君者無欲而至公故有茅茨土階之儉而

後之為君有欲而自利故有瓊臺瓊室之侈無欲者天下

共推之有欲者天下共爭之推之之極雖禪代猶脫屣爭

之之極雖劫殺而不避故曰天下非一人之天下乃天下

之天下安可求而得辭而已者乎夫修諸己而化諸人出

乎邇而見乎遠者言行之謂也故人主所患莫甚于不知
其過而所美莫美于好聞其過若有君子于此而曰子必無
過唯其言而莫之違斯孔子所謂其庶幾乎一言而喪國
者也蓋君子之過如日月之蝕過也人皆見之更也人皆
仰之雖以堯舜湯武之盛必有誹謗之木敢棘之鼓盤杆
之銘無諱之史所以閑其邪僻而納諸正道其自維持如

高
度
原
示

參
可
官
師
傳

此之備故箴規之興將以救過補闕然猶依違諷喻使言之者足以自誠先儒既援古義舉內外之殊而高祖亦序六官論成敗之要義正辭約又盡善矣自虞人箴以至于百官非唯規其所司誠欲人主斟酌其得失焉春秋傳曰命百官箴王闕則亦天子之事也屈以爲王者總萬機而撫四海簡群才而審所授孜孜于得人汲汲于聞過雖廷爭面折猶將祈請而求焉是以不量其學陋思淺因負擔之餘當試撰而述之不敢斥至尊之號故以乘輿目篇蓋帝王之事至大而古今之變至衆文繁而義詭意局而辭野將欲希企前賢髣髴崇執譬猶邱垤之望華岱恒星之繫日月也其不逮明矣頌曰元元邃初芒芒太始清濁同流玄黃錯峙上下弗形尊卑靡紀赫胥悠哉大庭尚矣皇極啟建兩儀旣分彛倫永序萬邦已紛國事明王家奉嚴君各有攸尊德用不勤義農已降暨于夏殷或禪或傳乃質乃文太上無名下知有之仁義不存而人歸孝慈無爲無執何欲何思忠信之薄禮刑實滋旣譽旣畏以侮以欺作誓作盟而人始叛疑煌煌四海藹藹萬乘匪誓焉憑左輔右弼前疑後丞一日萬機業業兢兢犬出其言善則干

里是應而莫予違亦喪邦有徵樞機之動式以廢興殷監
不遠若之何勿懲且厚味腊毒豐屋生災辛作璇室而莫
興瑤臺糟邱酒池象筓玉杯厥肴伊何龍肝豹胎惟此哲
婦職爲亂階殷用喪師夏亦不恢是以帝堯在位茅茨不
翦周文日昃昧且丕顯夫德輶如毛而或舉之者鮮故漢
有慙德武未盡善下世道衰末俗化淺耽樂逸遊荒淫沈
湎不式古訓而好是佞辯不遵王道而覆車是踐成敗之
効載在先典匪唯陵夷厥世用殄故曰樹君如之何將人
是司牧視之猶傷而知其寒燠故能撫之斯柔而敦之斯
睦無遠不懷靡思不服夫豈厭縱一人而玩其耳目內迷
色外馳逐不修政事而終于顛覆昔唐氏授舜舜亦聲荒
命禹受終納祖丕承天序放桀惟湯尅殷伊武故禪代非
一姓社稷無常主四嶽三塗九州之阻彭蠡洞庭殷商之
旅虞夏之隆非由尺土而紂之百尅卒于絕緒故王者無
親唯在擇人傾蓋惟舊白首乃親望由鈞夫伊起有莘負
鼎鼓刀而謀合聖神夫豈借官左右而取介近臣蓋有國
有家者莫云我聽蓋此回從莫謂我智聽受未易甘言美
疾豈不爲累由夷逃寵遠于脫屣柰何人主位極則侈知

人則吾惟帝所難唐既泰四族作紆周室既隆而管蔡不虔匪我二聖孰弭斯患若九德咸受雋父在官君非臣莫治臣非君莫安故書美康哉而及趙王倫篡位孫秀專易貴金蘭有皇司國敢告納言

政忠良之士皆罹禍酷是遂疾篤取假拜掃墳墓聞齊王罔起義乃赴許昌罔引爲參軍與謀時務兼管書記事平封安昌公歷黃門侍郎散騎常侍侍中秘書監永興末爲中書令時三王戰爭皇家多故罔居顯要從容而已雖憂虞不及而備嘗艱難永嘉中遷太常卿洛陽將沒携家屬東出成臯欲還鄉里道遇賊不能前病卒于塢壁

唐崔玄暉博陵安平人本名畢武后時有所避改爲高宗

開耀永淳間為縣主簿初立曄少以學行稱叔父秘書少

監行功器之既舉明經為縣主簿居父喪盡禮廬有燕更

巢共乳母盧氏有賢操嘗遺書戒立曄書云吾聞姨兄辛

有言其貧囊不自存此善消息若買貨盈篋愆惡也吾常

以為確論比見親表仕者務積財以奉親而親不究所從

來必出于祿廩則善如其不然何異盜乎故立曄以清白

若今為吏不能忠清無以戴天履地矣

名母亡哀毀甘露降庭樹以庫部員外郎累遷鳳閣舍人

長安元年為天官侍郎不受私謁執政忌之改文昌左丞

不踰月武后曰卿向改職乃聞令史設齋相慶此欲肆其

貪卿為朕還舊官厚賜綵物三年授鸞臺侍郎同鳳閣鸞

臺平章事兼太子左庶子四年遷鳳閣侍郎以誅二張功
爲中書令博陵郡公後封爲王

鄭僖舊志云爲高陵尉時常與賓客投壺飲博平居廉靜
據几終日號白雲翁云

姜晦秦州上邽人累爲高陵令治有聲遷長安令人畏愛
之開元初擢御史中丞先是永徽顯慶時御史不拜宰相
銜命使四方者廷中揖見後稍屈下晦獨狗舊體由是臺
儀復振轉太常少卿時國馬乏晦請以詔書市馬六胡州
率得馬三十署游擊將軍詔可閑廐乃稍備除黃門侍郎

辭不受改兵部滿歲爲吏部侍郎至選曹吏嘗請託爲姦
前領選者周棘扈藩檢室內外猶不禁至晦悉除之示無
防限然處事精明私相屬譖罪輒得皆以爲神始晦革舊
示簡廷議恐必敗旣而賊賊路塞流品有叙衆乃服後因
兄皎被放貶春州司馬徙海州刺史卒

蔣況萊州膠水人專潔博學少有名以孝廉授洛陽尉處
事平剖斷精允群僚莫敢望與兄演溶弟清俱爲才吏有
名天寶間至乾元中令高陵羨政流行長老紀焉郭子儀
軍出其縣敕麾下曰蔣况賢令供億富有素土得蔬飯足

矣毋撓其清也遷長安令累官刑部郎中御史中丞大理卿持法明審號稱職德宗出奉天沈奔行在爲賊所拘欲誘署僞職沈絕食不應命竄伏里中京師平乃出擢右散騎常侍卒

韋應物京兆人代宗永泰間以京兆府功曹攝縣尉林寶姓纂云應物周道遷公夏之後左僕射扶陽公待價生司門郎中令儀令儀生鑾鑾生應物應物生監察御史河東節度掌書記慶復李肇國史補云應物性高潔鮮食寡欲所居焚香掃地而坐其爲詩馳驟建安以還天寶時扈從

遊幸疑爲三衛自高陵尉後大厯間爲鄆縣棣陽令以疾
辭歸善福精舍建中二年除比部員外郎出爲滁州刺史
改江州追赴闕改左司郎中貞元初又歷蘇州故有集曰
韋蘇州云其縣居時書情寄三原盧少府有詩二篇直方難爲
進守此微賤班開卷不及顧沉埋案牘間兵凶久相殘徃
賦豈得閑促戚不可哀寬政身致患日夕思自退出門望
故山君心倚如此攜手相與還悠悠遠別離分此歡會
難如何兩相近反使心不安亂髮思一櫛垢衣思一浣豈
如望友生對酒起長嘆時節異京洛孟冬天未寒五
陵多車馬日夕自遊盤獨我何耿耿非君誰爲歡

李晟字良器其先洮州臨潭人後因仕進遷京兆蓋高陵
云今縣南十里渭河北千有晟冢并裴度所撰神道碑而

冢旁居民李大祿自云相傳爲晟後唐書言晟屯東渭橋
或其地也然晟傳言請貫萬年則又不可知或者晟葬之
後子孫家高陵云詳見祠廟志

韋夏卿字雲客京兆萬年人性通簡好古有遠韻少遽于
學善文辭大歷中與弟正卿同舉賢良方正皆策高第授
高陵主簿累遷刑部員外郎時仍歲旱蝗詔以郎官宰畿
甸授奉天令課第一改長安令轉吏部郎中擢給事中出
爲常蘇二州刺史後召爲吏部侍郎時從弟執誼在翰林
嘗受人金有所干請密以金納夏卿懷中夏卿毀壞不受

曰吾與爾賴先人遺德致位及此顧當如是哉執誼大慚
轉京兆尹太子賓客檢校工部尚書爲東都留守辭疾改
太子少保卒

劉仁師彭城人也穆宗長慶間爲縣令仁師武德中名臣
刑部尚書德威之五代孫大歷中詩人商之猶子也少好
文學有籌畫歷尹劇縣皆以能事見訪旣令高陵初涇水
東行注渠壅而爲三以沃關中後或壅遏不行仁師乃爲
民更水道杜私竇遵正令以成四渠民遂名渠曰劉公堰
曰彭城生子以劉名之時學士劉禹錫撰去思記

縣內大
夫鮮有

適愛在其去者非有卓然異績安能久而愈思太和四年
 高陵人李仕清等六十三人具前令劉君之德詣縣請刻
 金石縣令以狀申府府以狀考于明法吏吏上言謹按寶
 應詔書凡以政績將立碑者具所紀之文上尚書考功有
 司考其詞宜有紀者乃奏明年八月庚午詔曰可令尚書
 其章明有以結人心者揚揭于道周云涇水東行按部武
 决洩有時畎澮有度居上游者不得壅泉而顛其腴每歲
 少尹一人行視以誅不武兵與以還寔失本根涇陽人果
 壅而顛之私開四寶澤不及下涇田獨肥他邑為枯地力
 既移地征如初人或赴訴泣迎尹馬而占涇之腴皆權倖
 家勢足以破理訴者覆得罪由是咋舌不敢言長慶三年
 高陵令劉君勵精吏治視人之瘼如燦疽在身乃循故事
 考式文暨前後雜條又以新意請更水道入于我里杜私
 寶使無棄流遵正令使無越制別白纖悉列上便宜緣吏
 依違不決居二歲距寶歷元年端士鄭單為京兆秋九月
 始具以聞事下丞相御史御史屬元谷實司察視持詔書
 詣白渠上盡得利病還奏上以谷奉使有狀乃俾太常撰
 曰京兆下其符縣王簿譚孺直實董之冬十月百眾雲奔

續與善并口誑手運不肩懸數段功十七八而經賜人以
 苛計賂術士上言白渠下高祖故墅在焉子孫當祭敬不
 宜以奢鍾近時陌上聞命京兆立止君馳詣府控告具發
 其以賂致前事又請丞相請以類血而車商丞相彭原公
 飲容謝曰明府真愛人陛下親元元無庸第未刑知情
 偽耳即入言上前望口果有符許記後仲冬新架成涉季
 冬二日新架成獨直告已事其僚躬勞練之丞徒謹
 呼奪殺而舞成曰香恨六十年明府雪之摘奸犯豪卒就
 施為請名渠曰劉公堰曰彭城按股射而東于七百步其
 廣四等而深半之兩涯夾植柳萬本下垂根以作固上
 生材以備用仍歲旱診而渠下田獨有秋稟成之明年涇
 陽三原二邑又據其衝為七堰以折水勢使下流不厚君
 詰京兆索言之府命從事蘇持玉水獲盜擄不當擁者由
 是邑人享其長利生子以劉名之君諱仁師字某彭城人
 既有績于高陵轉昭應令俄兼檢校水曹員外郎充渠堰
 副使賜朱衣銀章時相愛其能表為檢校屯田郎中兼侍
 御史幹池鹽于蒲錫紫衣全章歲餘以課就加中執法理
 人爲循吏理財爲能臣一出于清白故也先是高陵蒙秋

高陵系

官師傳

高

惠風而借其拾去發于窮懷播于聲詩今采其旨而變其辭志于石文云 意溼水之遠迤既我公兮及我私水無心兮人多辨鋼上游兮乾我澤時逢理兮官得材墨綬移今劉君來龍愛人兮恤其隱心既公兮言既盡縣中府今府聞天贊憤湖兮沈疴痊劃新渠兮百畝流行龍蛇兮止膏油遵水式兮復田制無荒區兮有良壤嗟劉君兮去朝翔遠我福兮幸我賜紀厥功兮鏤美石永信詞兮昭玉鑽

譚孺直不知何郡人穆宗寶曆元年爲縣主簿是年冬任尹劉仁師治溼水凡二月而成

杜惠襄陽人晉當陽侯預之遠孫也嘗爲縣令見唐書世系表其政事未詳

拓拔思忠夏州人嘗從兄思恭討黃巢拒賊于渭橋表有

鶴射之沒羽賊駭之遂先士卒戰沒傷宗贈宥州刺史祠
于涓陽夫思忠非我族類忠勇若此性固不分于中外貴
賤果然哉以其沒于高陵也故收之此若不收思忠真虛
死矣豈錄善無外者之意哉

宋裴莊字端已閩州閩中人莊在蜀以明經登第歸宋歷
虹縣尉爲縣主簿本府詔權司隸掾轉運使雷德驥以威
望自任嘗巡按至境官屬皆出迎候莊獨視事本局徐謁
道左德驥稱其有守授權忻州錄事叅軍雍熙三年命將
巡邊以莊掌隨軍糧料官至光祿卿卒年八十一

朱革 紹聖元年爲縣令始至縣境兼并強梁者束手遠逝
踰年政成境內安堵初建宣聖廟暨儒學落成之初士始
知向學邑民大悅

吳嘉柔 不知何郡人紹聖元年爲縣尉佐革創修學宮及
宣聖廟

种師道 字聖源一字彛叙少從張載學於長安豹林谷以
陰補奉職紹聖間爲縣令常憂恤民隱循行阡陌又時與
騷人墨客賦詩歌詠邑大治後官至太尉宋史有傳

趙天佑 字亮功華州人紹聖四年攝縣尉佐种聖源爲政

有名稱蓋一時文人也遺詩六篇

出郊見新花折贈宰公
輔之云
和風習習氣

初新紅杏黃梅暖意句見說宰公渾未賞為君分得一枝

春送封道云相送河梁畔當感酒易寒清歌臨渭水古

道入長安秋草寒雲斷野橋霜葉乾知君為政暇時抱素

琴彈春日水邊送人云柳邊池酒離人起欲行不行情

未已已把垂楊折贈君落花更逐東流水閑適云地僻

經過少齋空自閑山厨引泉入僧閣看雲還古木緣黃鼠

疎籬過白鴈水清長見影空曠鬢毛斑冬日野步云東

野難舒步猶慙酒力温晚鴉噪寒木歸犢入煙村景短沉

山速林疎墜霧昏歸來問鵝鴨稚子掩柴門歸得書信

云見說葡萄新撥醉故園桃李一時開揚鞭意氣誰能遏

拂面春風躍馬來春夜云春夜西園行

西隣月共明不聞人語笑憂憂秋千聲

范棟不知何郡人崇寧四年知縣事奉詔重修宣聖廟蓋

自朱革創建之後至是益廓大矣是時佐之者主簿馬宗

佑縣尉傅完也

張璣崇寧間以承務郎監商州酒稅權知縣管勾學事兼管勾勸農公事嘗礮石建入行八刑條碑是時學長李希及權學諭史致直學吳若虛教諭胡巨源將仕郎縣尉管勾學事李凱三班奉職監縣酒稅權主簿張憲皆佐璣以治者也

焦積河東人政和間爲縣主簿能佐其令李文開爲政以忠信爲本嘗爲文開作不欺堂記

崔詵政和間以保義郎權縣尉又有田定以承信郎監

沙鎮酒稅王仲修以忠翊郎監渭橋鎮酒稅楊章以忠翊郎爲巡檢

金程章 大定三年以從仕郎知縣事

張翺字子翔淄川人博學有才識大定十三年登進士第釋褐授單州軍事判官尋遷狄道北海高陵三縣令東京留守推官後爲解鹽副使自公之去高陵也去任已入載

邑人曹璋率老父畫像構祠堂而事之將仕郎張建撰去

思碑 太史公序循吏傳曰奉法循理之吏不伐功不矜能百姓無稱亦無過行淄川張翺博學有才識著名於

時大定十三年登進士第釋褐授單州軍事判官尋遷狄道高陵北海三縣令東京留守推官今爲解鹽副使自公

高陵原志

官師傳

之去高陵也既更三考而民猶念之豈非有愛民之誠心
教之以孝弟廉恥不爲鈞距詭異之行雖嘗加刑責者亦
服其義而稱誦之初公之莅職于是也有訴其男毀奪女
娣之粧奩者公以子之長幼妻之前後諭之其人悔悟而
去有妯娌不睦日相詬詈聲徹縣署公遣女婢以義責之
其人慚而止三期之間所斷訟獄不啻數十百使人修省
改過皆此類也歲或亢旱公爲之虔禱無不感應士或惰
學公爲之誨諭無不勸勵今蒙古丞相夾谷公尹京兆暨
陝西路提刑使栢德公同尹日凡幕職有關必委公攝其
事非廉能夙著何以致此公解職之明年朝廷遣使廉問
備得公善政之詳不數歲三遷其職任邑人曹璋率諸父
老繪公之像構祠堂而事之朝夕瞻望而不忘其德如周
人勿剪甘棠而思召公也明昌五年季春友人王彥達赴
試來京師丐文於予予曰昔子產爲政三年而人歌之孔
子所以謂古之遺愛者以其久而不忘也今張君去職入
年而人尚思之是亦古之遺愛也予既嘉張公之善政且
喜高陵之民
不忘公之德

張鼎字君寶其先汴人後流寓籍本縣中統二年權充縣丞重修儒學建大成殿三楹後之作者皆因是焉

元王珪至元七年以敦武校尉知縣事兼諸軍與魯勸農

事自此年至至正八年歷世成武仁英順六帝中間知縣

事兼諸與魯事者蓋二十餘人其陳天瑞則主簿也曰張

濤十一年以張翼十四年以郭泰十七年任武貴二十年以敦

邢寔二十五李琚二十八王大用元貞二年以

楊翰以徵仕郭良弼至大元盧佐延祐元梁才

茂承務郎任王賦至治三尉公明後至元三崔

官師傳

補顏 五年以從 任某 至正二年以 張從益 以承仕 邪律正

四年以從 張已石 八年以承 陳天瑞 成宗大德年 間為縣主簿

張審 大德年間以從仕郎知縣事兼諸軍與魯勸農事有

善政去後人思之前中臺監察御史奉訓大夫郭松所撰

記 記曰郡縣守令公忠亮直泛應曲當廉以勵其操和以

得失卓爾有立者其庶乎吾於縣侯張君可以言矣君名

密字子高其先世為北京人世為宦族其父嘉議公有文

武才為人沉鷲勁邁倜儻不羈喜功名重然諾至元中天

子恢弘祖業大舉伐宋圍襄陽公使交趾還詔公以中叅

政行省幕議兵事江南平以功授官五遷而至嘉議大夫

東京總管兼開封府尹所在聲績表表卒於官君始用廕

投官起家為西安藍屋令政尚寬平再遷從仕郎高陵令

高陵古為劇縣縣有白渠之利引涇水灌溉田極膏腴歲

數入倍它邑以故官置屯田輸穀贖糶倉恒以萬數歷三
二歲主者慮變腐符縣下其直與民爲兩濟法而縣官貪
恣多詭糴轉賣利其贏餘民不獲惠坐是爲下所訟憲司
窮竟其事訊鞠論罷縣爲一空其罷者誣縣俗喜告訐使
不得與它厚俗齒民噎默含垢無所控雪君到視其人和
以良察其吏敬以勤曰嘻易治也向者誣耳民間相賀曰
吾邑得賢侯以直吾枉大幸於是縣多滯訟而戶昏爲尤
甚歲十月務閑吏抱成案追其人赴縣日日辨對囁嚅涉
冬入春至務再停乃已十月復入初至有十餘年不杜絕
者吏因緣爲姦人至破產無所告訴於是參考辯理懸示
法例絕其請謁使賄賂不得通既灼見情實山判不搖旬
時之間吏民厭服惟所命是聽是後縣廳寂然無復鬪訟
聲上官聞其能有它疑獄常使君停法讞決之號廉平每
歲行春勸農褐衫席帽從吏卒三數輩親載糲糗所至集
鄉社民教之服田力穡仰事俯畜而人亦化君行自不爲
浮薄游惰事家以給足異時賦役煩數急於星火君乃消
息百姓知其強弱爲役先後知其貧富爲賦多少其有孝
子順孫義夫節婦及文學之士可諮詢以政者必編表禮

敬之以厲民俗諄諄然有古循吏風政間則獨居一室左
經右史與聖賢相對至於奉上接下柔而有立剛而無虐
在任七年始終一致外內無與爲仇敵者省臺交章辟之
代至請解當去吏民齋咨戀慕至有感泣者於是相聚謀
曰君於吾儕德至渥也著見成效闕而不書爲匪民耶迺
謁文礪石紀其遺愛以示永久云 銘曰猗歟那君宜社
宜人製錦不傷發硎而新君未至止吏多刻深有竭澤以
漁有剝膚以侵君既至止展我心兮荷歟那君不伎不求
絃鳴一堂琴施六轡君未至止噢咻孔填而夜有吠犬而
川無恬鱗君既至止寧我神兮天之照我以風以雨有不
則天胡俾我瘡遲君之來式歌且舞皇之愛我至優至渥
有不承宣貽我大轂遲君之來休其爍爆衣我食我無寒
無饑君今去矣云何不
悲勒文茲石以寫餘思

寇卞涇陽人自耀遷縣尹有嘉政聲

宋九嘉鄒縣人以奉政大夫爲縣令有文采好古博雅嘗

集种師道趙天祐馮叔獻諸作勒石有序

高陵古縣更歷唐宋名人題咏

不少獨有渭橋閣下宋京二石刻餘則冥然竊嘗怪之訪於故老士子知种太尉公作邑於是而趙亮功嘗攝尉焉余閒登崇皇寺於其頽屋敗砌榛莽之下得諸詩皆隋唐人知其古跡尋既登閣則見太尉公行記與其友石君偉諸辭翰而進士飲酣言則誦亮功數詩乃命判者摹按舊題字而勒石君倚字畫媚秀可愛為俗子所搆貌遂與趙尉詩皆手為書之畢刊矣乃得黃山先生帖於毘沙民家復得翰林馮公之墨蹟於南宮敗屋傾柱之上迺皆蠟紙刻焉种太尉公黃山老事業暴諸史名章章在天下固不必言亮功宋人追事國朝與其鄉人喬元龍左先之游汴梁太學日沉醉無所事同舍以為言不恤也忽一日醉中亮公高誦春秋而元龍草聖於壁上舍盡驚當時謂之少華三先生漫郎書事者馮公叔獻也今為大理丞學問宏遠議論滾滾起人文章壯觀皆古風志節慷慨百折不屈四海學者尊師之九嘉求學京師時公在翰林實與之游從而兄事之惟謹禮有加於師嘻余天資不事佛老而

所集之書多在官寺蓋文忠公
集古錄之遺意也觀者其亮

魏堯啓縣人等爲本學教諭有善教聲

明興黃禎洪武中以監察御史來知縣事廉謹有爲後復
前職永樂七年陞按察司僉事

張錦山東人正統間以國子生知縣事縣舊城隋大業七
年築歲久頽圯錦新築之周四里三十步又曰五里三分
公署學廟皆建之正統十四年也又善醫藥常命方制劑
以施病者病者愈稽首衙前以謝日與他政相半焉

楊清字源璩雲南太和縣人以國子生知縣事蒞政五年

慈祥愷悌上下文移不出吏手有古循良風後以憂去

張琦字鍾潤山西安邑人以書經魁任山東學政諭景
泰末年順天府尹王賢薦陞縣尹在任四年興利除害專
以孝弟教人雖有詐名養親者亦蒙獎勞若訪獲逆子奸
猾輒置之死於是頑夫悖子皆逃他境天性忠廉剛正而
面貌蒼古人號鐵臉瀕死之日囊無羨貲丞欲啟庫取耗
金以贈琦曰此其所爲哉吾有數子耕者自能力田讀
者自能力書足矣卽取其管鑰并符籙付丞而死後其子
曰岫官至都御史

鄭紹夔字希賢山西絳州人正統十三年以易經魁任本縣教諭本學乏科十年矣紹夔學規嚴整宅心公正而又勤於訓誨故任內三科連舉五人登進士者一人後士子思慕焉

崔瑜字廷玉山東行唐人天順初爲縣丞

全性字復初朔廣潛江人天順初任教諭

龐瑜字廷用四川南充人天順初任訓導

馬政河南柘城人天順間爲縣尹亦能修舉廢墜

張傑字文英山東臨清州人由監生知縣事明法理有幹

又善事上官增修學廟縣署不勞而起故當時上下以能吏稱滿任而去百姓留鞭

張尹字商任河南魯山人由舉人成化五年任教諭有孝行能以身教人生徒有貧窘者以麥粟周之九年秩滿轉長安生徒涕泣留鞅然在長安士子束修甚涼薄而張亦貧甚見高陵生又涕泣言其貧

段讓字遜之山西洪洞人成化十八九年以舉人知縣事是時年已耆艾然風流洒樂而善詩酒處百姓甚和至賄賂饋送皆不禁二十一年關中大饑盜賊蜂起讓獲盜輒

磔足梟首懸示四門雖當荒亂之時邑賴以安

侯輔字翼之河南洛陽人成化末年以舉人任教諭寬厚明敏涉獵諸經群史尤邃於易諸生亦知向學有長者風後子孫皆貴顯

劉安字定之趙州臨城人弘治初以監生知縣事秩俸之外毫髮不取身食倉米以馬通給爨人不敢干以私縣有刁猾數年卒刺探官府以爲衣食如縣官貪污卽爲所制縛安盡革之於是此輩朋謀誣訟安具言所守上官反以爲不能而去之至今人思焉

翟先生宗器四川夾江人弘治初任訓導剛果有口亦能
勤誨生徒有里長饋馬芻一車御史李伯起亦問去

楊舟字濟川河南孟縣人以舉人知縣事剛果有胸中氣
文移皆自草左右不能欺子弟或取民財聞之輒蹴踢至
流血身亦被氣幾斃後歸竟以中氣卒

高先生儔字宗伊四川瀘州人弘治三年以舉人任教諭
身頗長美姿容博雅端正兼通五經下至醫卜書畫亦皆
嘉妙勤於訓誨五經輪日講解士子課業無長少皆逐首
改正其獎善化惡如春風解冰有頑徒以私憾夜斷公座

繩椅昧爽先生升堂坐跌僵仆乃徐起名諸生流涕自責
諸生咸泣欲舉頑徒以懲之先生曰止是謀之不善也後
頑徒亦自化是時涇陽三原富平渭南臨潼諸縣知名之
士皆來就學俱有所獲而去渭南舉人李錦其一也官亦
至知州先生教人以六德六行爲主而以冠昏喪祭鄉飲
鄉射鄉相見爲條約歲終考德行朔望召士子冠屨衣紳
肄業條約故一時禮讓文物煥然可觀雖街民村叟皆知
敬慕先生或以公事他出馬過而人嘆賞繼之秩滿諸生
送至渭河北岸涕泣而別後至京考部元陞武定府同知

自是高陵舉進士者二人中鄉試者五人皆平日指授之徒也先生既謝武定而歸優游泉石猶以文章警勸瀘人然瀘通衢也高陵人商賈四川者必至瀘問起居先生待之若親戚子弟其於當時諸生生死仕隱未嘗不致問焉高陵人今皆謀立去思碑

和先生纁字廷秀河南獲嘉人弘治六年以國子生任訓導然年已艾耆慷慨坦易處諸生若父子是時瀘州先生方以文行教諸生則謂士子曰講經有汝高師誦經則我課業有汝高師勤業則我於是夜四鼓輒起令斗級二人

持燈火身詣諸生號門召諸生誦讀無燈火者以所持者
與焚之遲五鼓再至無書聲者則呪罵百端或以掌擊其
面背書不過者亦如之夏月坐齋督年少諸生誦書比午
渴則令家人具漿水飯煮蒜薑爲菹以餉之諸束修節令
之饋不問多寡家不給或取諸富徒至諸生之貧者則又
輒以假之不計也秩滿而去士子弟泣送之其懷思與瀘
州先生等故登進士舉人者亦先生之功

楊先生綦字實夫四川宜賓人勤爲諸生講授經旨其說
能簡明發道理

尹本字邦寧直隸開州人由舉人知縣事少治書經極力鑽研屢經師授雖一題或有數說至臨政不能自達於是奸猾得志氣熒獨無告然其人慈良寬厚無毫髮害民心此不知何也後致仕去

朱璜字敷威山西陽曲人弘治十二年以舉人知縣事剛方有爲能鋤強暴以綏良善刁猾遠遁廳衙清肅六事駁駁乎舉矣而又善遇上官至摘隱而問應答如響於是諸司皆以爲能後陞平涼苑馬寺丞

陸宗四川名山人弘治十二年任縣丞朴實不詭廉謹自

奉是時陽曲朱君方勇於有爲而宗凡所承受罔不立辦有老當益壯之志尋致仕去

郭文忠字質夫四川眉州人由隴西令謫教諭慷慨樂易心無嫉忌嫌疑每三日課諸生或自具饌以餉諸生有不至者則涕泣自責後陞宜君令

賀璠字寶之山西嚳縣人正德初由舉人知縣事閑雅安靜自奉澹泊請托不行雖謁尊官貴客亦無窘步又知百姓窮苦毫髮不橫征但不能禁戢豪彊或惑於左右耳

辛九齡字希張山西尉州人由海鹽令調知縣事動靜安

肆顧瞻有威上下體統似亦不失然寵信左右左右人或挾取民財亦不禁也

李應奎字文輝山西平定人任教諭能勤於訓誨而甘乎淡薄有二弟皆撫教之成立至舉人其後二子念愈又皆舉進士高第亦嘗師事予

劉學禮字汝立四川廣安州人由鴻臚寺鳴讚知縣事其之任時中書舍人信陽何景明及今吏部侍郎內江張潮皆有贈序多言涇野子事不及錄蓋劉初甚欲有爲也然未久以憂去

翟清字汝揚直隸大名入正德十三年由舉人任知縣爲人坦易不詭然以他事註誤去尋改遷藍田縣

張廷燧河南光山人正德十三年任縣丞

屈萬端字宗本四川雙流人正德間任典史

黃炎字汝章四川嘉定人正德間以唐山訓導陞教諭

邢琛字廷獻直隸祁州人正德九年由監生任訓導

程相字朝佐四川南部人正德十三年任訓導

鄧興仁字愛立河南洛陽人嘉靖元年由舉人知縣事能舉廢墜而多營繕

梁温山西襄陵人嘉靖二年以監生任縣丞醇朴質實

韓鉞山西長子人嘉靖二年任典史

張罔四川越雋衛人以監生任教諭篤於訓誨而勤於學務其廟庭栢樹多其種植云

李瑜山西聞喜人任訓導

許伸字信夫靈寶人嘉靖五年以舉人知縣事

馬牙河南滎澤人以舉人知縣事

楊剛字潜甫直隸冀州人以監生知縣事忠信廉介士也

李嵩四川宜賓人由監生任訓導後陞咸寧教諭

羅尚朴字宗南四川營山人任訓導以親老告致仕於上官弗允也卽日飄然西歸邑人頌羨之尋提學聞其賢以幣行獎然已去矣縣尹訪其交游得耆老近渠張公蘭乃以幣托寄之公蘭遣其子齎幣至營山取印信回文以達上官而後已

劉祚字子延河南信陽人由舉人知縣事履任廉公不事詭隨上官率惡其慙直而民情亦未大伸嘗述詩退思堂壁間以見志

詩曰一官到此兩經春不愧蒼天不愧民神道有靈應識我去時還似到時貧

栢達山東章邱人嘉靖十五年任典史

苟完字廷璧四川西充人任教諭

周森四川倉溪人任教諭亦長文藝以他事註誤去

崔鶴字九臯真定衛人由舉人任知縣事

張貫中四川江安人嘉靖十七年任典史

徐效賢字宗義四川江津縣人由舉人嘉靖十九年以蒲城教諭陞知縣事

楊文泰字時亨河南嵩縣人由監生以山西解州訓導陞教諭

張恪字尚恭山西蒲州人由監生任訓導

呂憲字廷章河南溫縣人由監生任訓導

耿臣字大卿山東膠州人嘉靖二十年任典史

馬習詩字子言山東章邱縣人隆慶元年任典史

高陵縣志卷之四終

高陵縣志卷之五

人物傳上第八

漢周仁字文其先任城人也景帝徙其家于陽陵故爲高陵人本傳以醫見景帝爲太子時爲舍人積功遷至大中大夫景帝初立拜仁爲郎中令仁爲人陰重不泄常衣敝補衣溺袴故爲不潔清以是得幸入臥內于後宮祕戲仁常在傍終無所言上時問人仁曰上自察之然亦無所毀景帝再自幸其家上所賜甚多然終常讓不敢受也諸侯群臣賂遺終無所受武帝立爲先帝臣重之仁廼病免以

二千石祿歸老子孫咸至大官

張毆字叔高祖功臣安邱侯說少子也毆孝文時以治刑名侍太子然其人長者景帝時尊重常為九卿至武帝元朔中為御史大夫毆為吏未嘗言按人專以誠長者處官官屬以為長者亦不敢大欺上具獄事有可徯徯之不可者不得已為涕泣面而封之其愛人如此老篤請免天子亦寵以上大夫祿歸老于家家陽陵子孫咸至大官

如淳相傳為縣人嘗為散騎侍郎陳郡相有碑頌存君憤傲榮

塗稟性叡哲少好博學通敏五經精練六籍懷寬猛之才抱緯世之策每覽莊生犧牛之誠思踐四絡巖栖之跡遁

志邱園群儒遵道賢聲遐布響聞天宇靈帝聞之蒲輪辟
 名若大舜之舉臯陶周文之得尚父授散騎侍郎制漢書
 音義百有十二冊拜陳郡相較洪禮政民庶澤波妹土之
 位邵公洛陽之遇姬旦化被累稔能言戴德但兵亂將興
 皇道巨夷解職辭祿匿躬畎畝暨魏納劉禪特徵任時
 遇耳順惟辭免承受加光祿大夫送柩還春秋七十五
 魏張旣字德容魏書云本縣八年十六為郡小吏旣少小
 為郡門下小吏自惟門寒念無以自達乃常畜好工書疏
 刀筆及版伺諸大吏有乏者輒給與由是見識焉後歷右
 職舉孝廉不行魏王為司空辟未至舉茂才除新豐令治
 為三輔第一袁尚拒魏王於黎陽遣所置河東太守郭援
 并州刺史高幹及匈奴單于取平陽發使西與關中諸將
 合從司隸校尉鍾繇遣旣說將軍馬騰等旣為言利害騰

高爽系示

人物

乃遣子超將萬餘兵與縣會擊幹，破之，斬援首。幹及
單于皆降。其後復舉并州、反河內，張晟聚萬餘人，無所屬。
寇峭、馮閔、河東衛固、弘農張炎各起兵以應之。魏以旣爲
議郎，叅錄軍事，使西徵諸將。馬騰等會擊晟，等破之，斬炎。
固首幹奔荊州，封旣武始亭侯。魏王將征荊州，而騰等分
據關中。魏王復遣旣喻騰等，令釋部曲東還。騰已許之，而
更猶豫，旣恐爲變，乃移諸縣，促儲待二千石，郊迎騰，不得
已許之。發東魏王表，騰爲衛尉。子超爲將軍，統其衆。後超
反，旣從魏王破超于華陰。西定關右，旣爲京兆尹，招懷流

民興復縣邑百姓懷之魏國既建爲尚書出爲襄州刺史
魏王謂旣曰還君本州可謂衣繡書行矣從征張魯別從
散關入討叛氏收其麥以給軍食魯降旣說魏王拔漢中
民數萬戶以實長安及三輔其後與曹洪被吳蘭于下辯
又與夏侯淵宋建別攻臨洮狄道平之是時魏徙民以充
河北隴西天水南安民相恐動不安旣假三郡人爲將吏
者休課使治屋宅作水碓民心遂安魏王將拔漢中恐劉
備北取武都氏以逼關中以問旣旣曰可勸使北出就穀
以避賊前至者厚其寵賞則先者知利後必慕之魏王從

其策乃自到漢中引出諸軍令既之武都徙徙五萬餘落

出居扶風天水界三輔决錄注曰既為兒童為郡功曹游

家其設賓饌及既至殷妻笑曰君其悖乎張德容童昏小

兒何異客哉殷曰卿勿怪乃方伯之器也殷遂與既論霸

王之略饗訖以子楚託之既謙不受殷固託之既以殷邦

之宿望難違其旨乃許之殷先與司隸校尉胡軫有隙軫

誣構殺殷殷死月餘軫得疾患自說但言伏罪伏罪游功

曹將鬼來於是遂死于時關中稱曰生有知人之明死有

貴神之靈子楚字仲允為蒲坡令魏王定關中時漢興郡

缺守魏王以問既既稱楚才兼文武遂以為漢興太守後

轉隴西是時武威顏俊張掖和鸞酒泉黃華西平麴演等並

舉郡反更相攻擊俊遣使送母及子詣魏王為質求助魏

王問既既告以宜兩存之後鸞果殺俊武威王怒又殺鸞

既曰俊等外假國威內生傲悖計定勢足後歸反耳今方
事定蜀且宜兩存而鬪之猶卞莊子之刺虎坐收其斃也
是時不置涼州自三輔距西域皆屬雍州文帝卽王位初
置涼州以安定太守鄒岐爲刺史張掖張進執郡守舉兵
拒岐黃花翹演各逐故太守舉兵以應之旣進兵爲護羌
校尉蘇則聲勢故則得以有功旣進爵都鄉侯涼州盧水
胡伊徃岐妾治元多等反帝憂之曰非旣莫能安涼州乃
召鄒岐以旣代之有詔詔云昔賈復請擊郾賊光武笑曰
執金吾擊郾吾復何憂卿謀畧過
人今則其以遣護軍夏侯儒將軍費曜等繼其後旣至金
便宜從事

城欲渡河諸將皆曰兵少道險未可深入旣曰道雖險非

井陘之隘夷狄烏合無左車之計今武威危急赴之宜速
遂渡河賊七千餘騎逆拒於鵠陰口既揚聲軍從鵠陰乃
潛由且次出至武威胡以爲神引還顯美既已據武威曜
乃至儒等猶未達旣勞賜將士欲進軍擊胡諸將又止之
旣曰今軍無見糧當因敵爲資若虜見兵合退依深山追
之則道險窮餓兵還則出候寇鈔所謂一日縱敵患在數
世也遂前軍顯美胡騎數千因大風欲放火燒營將士皆
恐旣夜藏精卒三千人爲伏使叅軍成公英督千餘騎挑
戰勅使佯退胡果爭奔之因發伏截其後大破之斬首獲

生以萬數帝甚悅有詔獎之

記云鄉河風以勞擊死以塞居家功高南仲勤論吉

肅此數非但破胡乃永寧河右使吾長無西顧之念矣

從封西鄉侯增邑三百并前

四百戶酒泉蘇衡反與羌豪鄰戴及丁令胡萬餘騎攻邊

縣既與夏侯儒擊破之衡及鄰戴等皆降遂上疏請與儒

治左城築鄣塞置烽候邸閣以備胡西羌恐中衆二萬餘

落降其後西平麴光等殺其郡守諸將欲擊之既曰唯光

等造反郡人未必悉同若便以軍臨之吏民羌胡必謂國

家不別是非反相持著此為虎傅翼也光等欲以羌胡為

援今先使羌胡鈔擊重其賞募所虜獲者皆以卑之外沮

其勢內離其交必不戰而定乃檄告諭諸羌爲光等所誑
誤者原之能斬賊帥送首者加封賞於是光部黨斬送光

首其餘咸安堵既臨二州十餘年政惠著聞其所禮辟扶

風靡延天水楊阜安定胡遵酒泉龐涪燉煌張恭周生烈

等終皆有名位黃初四年薨有賜詔

詔曰昔荀植子立勳
翟士晉侯賞以千室

之邑馮異致力漢朝光武封其二子故涼州刺史張既能
容民畜衆使群羌歸土可謂國之良臣不幸薨隕朕甚感
之其賜小子翁歸爵關
內侯賜曰肅長子緝嗣

張緝字叔仲既之子太和中爲溫令名有治能會諸葛亮

出師詔以問中書令孫資資以緝爲有籌略遂召拜騎都

尉遣叅征蜀軍軍罷入爲尚書郎以稱職爲明帝所識帝以緝之材能多所堪任試呼相者相之相者云不過二千石帝曰何材如是而位止二千石乎及在東莞領兵徵還緝吝於財而矜於勢一旦以女爲皇后徵去郡還坐里舍數爲國家陳擊吳蜀形勢又嘗對司馬大將軍料諸葛恪雖得勝於邊上見誅不久大將軍問其故緝曰威震其主功蓋一國欲不死可得乎及恪從合肥還吳見殺大將軍聞恪死謂衆人曰諸葛恪我輩耳近張敬仲謂恪必見殺今果然如此敬仲之智爲勝恪也會太常卿夏侯玄常憾

曹爽之誅中書令李豐私心在立然與緝俱馮翊人又以
緝皇后父也同謀欲以立輔政而黜大將軍司馬昭事發
收送廷尉賜死

晉張殷魏光祿大夫張緝之孫涼州刺史既之曾孫也惠
帝永興中仕爲梁州刺史見晉書

後周于謹字思敬其先本洛陽人從魏武帝入關仕周因
家京兆遂爲高陵人唐學士于志寧蓋其曾孫也志寧傳
云高陵人又曰臣家自周魏來世居關中故志謹爲高陵
人云謹深沉有識量略窺經史尤好孫子兵書屏居閭里

未有仕進之志或有勸之者謹曰州郡之職昔人所鄙台
鼎之位須待來時太宰元天穆見之曰王佐材也及破六
韓拔陵首亂北境引蠕蠕爲援大行臺侯射元纂率衆討
之宿聞謹名辟爲鎧曹叅軍事從軍北伐蠕蠕聞大軍逼
遂逃出塞纂令謹追之前後十七戰盡降其衆後率輕騎
出塞覘賊屬鐵勒數千騎奄至謹以衆寡不敵退必不免
乃散其衆騎使匿叢薄之間又遣人升山指麾若分部軍
衆者賊望見雖疑有伏然恃其衆而進軍逼謹謹以常乘
駿馬一紫一駟賊先所識者乃使三人分乘之突陣而出

賊以爲謹也乎遂之謹乃率餘軍擊之其追騎遂奔走因
得入塞正光四年行臺廣陽王元深北伐引謹爲長流叅
軍特相禮接乃使其子佛施拜焉後屢立戰功有大勲業
官至太師長子實字實實以軍功封萬年縣子次子翼字
文若拜員外散騎常侍封安平縣公北史皆有傳

〔**于義**〕字慈恭後周太師謹之子義少矜嚴有操尚篤志
好學大統末以父功賜爵平昌縣伯邑五百戶起家直閣
將軍其後改封廣都縣公周閔帝受禪增邑六百戶累遷
安武太守專崇德教有郡民張善安王叔兒爭財相訟義

曰太守德薄所致乃取家財分與二人喻而遣去善安等
各懷耻愧移貫他州其以德化人皆此類也進封建平郡
公明武世歷西兗瓜郃三州刺史數從征伐進位開府宣
帝嗣政刑日亂義上疏諫時鄭譯劉昉以恩倖當權謂義
不利於已先惡之於帝帝覽表色動謂侍臣曰子義謗訕
朝廷息御史大夫顏子儀進曰古先哲王立謗訕之木置
敢諫之鼓猶懼不聞過于義之言不可罪也帝乃解及王
謙構逆高祖將擊之問將於高顏顏薦義可爲元帥劉昉
沮曰梁睿位望素重不可居義之下乃以睿爲元帥以義

爲行軍總管謙將達奚恭擁衆據開遠義將左軍擊破之
尋拜潼州總管賜奴婢五百口雜絲三千段超拜上柱國
時義兄翼爲太尉弟智兄子仲文並上柱國大將軍已上
十餘人稱爲貴戚歲餘以疾免職歸於京師數月卒時年
五十贈豫州刺史謚曰剛賻物千段粟米五百石子宣道
宣敏並知名

于宣道字元明義之長子性謙密不交非類仕周釋褐左
侍上士以父功賜爵城安縣男邑二百戶後轉小承御上
士隋文帝爲丞相引爲外兵曹及踐阼遷內史舍人進爵

爲子丁父憂水漿不入口者累日獻皇后命中使敦諭歲餘起令視事免喪拜車騎將軍兼右衛長史舍人如故後六歲遷太子左衛副率進位上儀同卒年四十二子志寧早知名出繼叔父宣敏

于宣敏字仲達義之仲子少沈密有才思年十一詣周趙王招王命賦詩詩甚有幽貞之志王大奇之起家右侍上士遷千牛備身高祖踐阼拜奉車都尉奉使撫慰巴蜀及還上表疏曰臣聞開磐石之宗漢室於是惟永建維城之固周祚所以靈長昔秦皇置牧守而罷諸侯魏后暱諂邪而疎骨肉遂使宗社移於他族神器傳於異姓此事之明甚於觀火然山川設險非親勿居且蜀土沃饒

人物殷阜西通邛夔南屬荆巫周德之衰茲土遂成戎首
 炎政失御此物便為禍先是以前者防於無形治者制其
 未亂方可慶隆萬世年逾七百伏惟陛下日角龍顏膺樂
 推之運叅天貳地居揖讓之期億兆宅心百神受職理須
 樹建藩屏封植子孫繼周漢之宏圖改秦魏之覆軌抑近
 習之權勢崇公族之本枝但三蜀三齊古稱天險分王威
 屬今正其時若使利建合宜封樹得所則巨猾息其非望
 姦臣杜其邪謀盛業宏基同天地之長久英聲茂實齊日
 月之照臨臣雖學謝多聞然情深體國帝省表嘉之謂高頴曰于氏世有人

焉竟納其言遣蜀王秀鎮於蜀語在藝文畧宣敏常懼盛
 滿懷靜退著述志賦以見其志未幾卒官時年二十九

唐于志寧字仲謐京兆高陵人宣道之子大業末調冠氏

縣長山東盜起棄官歸高祖人關詔授渭北道行軍元帥

府記室與殷開山叅謀議薛仁果平讖褚亮於囚虜中遷
天策府中郎文學館學士引亮與同列貞觀三年爲中書
侍郎太宗嘗宴近臣問志寧安在有司奏勅召三品志寧
品第四帝悟特詔預宴因加散騎常侍太子左庶子黎陽
縣公是時議立七廟群臣請以涼武昭王爲始祖志寧以
涼非王業所因帝詔功臣世襲刺史志寧奏古今異時慕
虛名遺實患非久安計帝皆從之嘗詔志寧以正道輔太
子詔曰古者太子旣生士負之卽置輔弼昔成王以周召
爲師傅日聞正道習以成性今太子幼卿當輔以正道
無使邪僻啓其心勉太子承乾數有過惡志寧上諫苑以
之官賞可不次得也

諷帝見大悅賜黃金十斤絹三百匹俄兼詹事以母喪免
有詔起復本官固請終喪帝遣中書侍郎岑文本彊起之

乃就職時太子以農時造曲室累月不止又好音樂過度

志寧力諫

諫曰今東宮乃隋所營當時號為侈麗豈容復
事磨礱彩飾于其間丁匠官奴皆犯法亡命鉗

鑿梃杵往來出入監門宿衛直長千牛不得苛問瓜牙在
外廝役在內其可無憂乎又宮中數聞鼓聲太樂伎兒輒
留不出往年口敕丁寧殿下可不思之太子不納而左右
多任宦官志寧復諫曰奄宦者體非全氣專柔便佞託親
近為威權假出納為禍福故伊戾敗宋易牙亂齊趙高亡
秦張讓傾漢近高齊任鄧長顛為侍中陳德信為開府內
預宴私外干朝政齊卒顛覆今殿下左右前後皆用寺人
輕忽高班陵轍貴仕品命失序經紀不立行路之人咸以
為太子益不悅東宮僕御舊得番休而太子不聽又私引

突厥與相狎比志寧懷不能言上疏極諫

諫曰竊見僕寺司與愛及獸醫

自春迄夏不得番息或家有慈親以闕溫清或室有幼弱以虧撫養殆非怨愛之意又突厥邊鄙支等人狀野心不可以禮教期不可以仁信待狎而近之無益令望有損聖德况引內閣中使常親近人皆震駭而殿下獨安此乎

太子大怒遣張師政紇干承基往刺之三人入其第見志

寧憔悴在苦塊中不忍殺乃去語亦在藝文畧太子取帝

知狀謂曰聞公數諫承乾不聽故至此是時官臣皆廢獨

志寧蒙勞勉晉王為皇太子復拜左庶子遷侍中加光祿

大夫進封燕國公監修國史永徽二年洛陽人李弘泰誣

告太尉長孫無忌反有詔不待時斬之志寧以為方春少

陽用事不宜行刑且醮謀非本惡逆請依律待秋分乃決

從之衡山公主既公除將下嫁長孫氏志寧據禮議不可

禮女十五而笄二十而嫁有故二十三而嫁固知遇喪須

終三年春秋魯莊公如齊納幣母喪未再期而圖婚二家

不譏以其失禮明也今議者云公除從吉此漢文創制為

天下百姓耳公主身服斬衰服可以例除情不可以例做

心喪成婚非於是人情所忍於是詔公主待服除乃婚拜尚書左僕射同

中書門下三品頃之兼太子少師四年隕石十八于馮翊

高宗問曰此何祥也朕欲悔往修來以自戒若何志寧對

曰春秋隕石于宋五內史過曰是陰陽之事非吉凶所生

雖然陛下無災而戒不害為福也後邊太傅嘗與右僕射

雖然陛下無災而戒不害為福也後邊太傅嘗與右僕射

張行成中書令高季輔俱賜田志寧奏臣家自周魏來世
居關中貲業不墜今行成季輔姑營產土願以臣有餘賜
不足者帝嘉之分其田以與二人顯慶四年以老乞骸骨
詔解僕射更拜太子太師仍同中書門下三品王皇后之
廢長孫無忌褚遂良固爭不見從志寧不敢言武后以其
不右已銜之後因殺無忌坐免官出爲榮州刺史改華州
聽致仕卒年七十八贈幽州都督謚曰定後追復左光祿
大夫太子太師志寧愛賓客樂引後進然多嫌畏不能有
所薦達也凡格式律令禮典皆與論譔賞賜以巨萬初志

寧與司空李勣修定本草并圖合五十四篇帝問復修本

草何所異志寧有對

對曰昔陶弘景以神農經合雜家別錄註詔之江南偏方不周曉藥石往

往紕繆四百餘物今考正之又增後世所用百餘物此以

為異帝曰本草別錄何為而二對曰班固惟記黃帝內外

經不載本草至齊七錄乃稱之世謂神農氏嘗藥以極含

氣而黃帝以前文字不傳以識相付至桐雷乃載篇冊然

所載郡縣多在漢時疑張仲景華佗竄記其語別錄者魏

晉以來吳普李當之所記其言華葉形色佐使相須附經

為說故弘景

帝善之其書遂大行會孫休烈

合而錄之

于休烈機鑿融敏善文章與會稽賀朝萬齊融延陵包融

齊名開元初第進士又擢制科歷秘書省正字吐蕃金城

公主請文籍四種玄宗詔秘書寫賜休烈上疏

疏曰戎狄國之寇經

籍國之典也戎之生心不可以無備昔東平王求史記諸子漢不與之以史記多兵謀諸子惟詭術也東平漢之懿戚尚不示征戰之書今西戎國之寇讐安可貽以經典况吐蕃之性慄悍果決善學不回若達於書則知戰深於詩則知武夫有師干之試深於禮則知月令有廢典之兵深於春秋則知用師詭詐之計深於文則知往來書檄之制此何異假寇兵資盜糧也臣聞魯兼周禮齊不加兵吳獲乘軍楚屢奔命喪法危邦可取鑒也公主下嫁異國當用夷禮而反求良書恐非本意如不得已請去春秋夫春秋者有以臣召君取威定霸之事誠與之國之患也狄固貪婪貴貨易土正可錫以錦綵金玉無足所求以資其智

詔中書門下議侍中裴光庭

曰吐蕃不識禮經孤背國恩今求哀稽顙許其降附漸以詩書陶以聲教斯可致也休烈但見情僞變詐於是平生不知忠信節義亦於是乎在帝曰善遂與之累遷起居郎

直集賢殿學士比部郎中楊國忠爲宰相斥不附已者
爲中部郡太守肅宗立休烈奔行在擢給事中遷太常少
卿知禮儀事兼修國史帝嘗謂曰良史者君舉必書朕有
過失顧卿何如對曰禹湯罪已其興也勃然有德之君不
忘規過於時經大盜後史籍燔缺休烈奏國史開元實錄
起居注及餘書三千八百餘篇藏興慶官兵與焚煬皆盡
請下御史覈史館所由購府縣有得者許上送官一書進
官一資一篇絹十疋凡數月止獲一二篇唯韋述以其家
藏國史百三十篇上獻中興文物未完休烈獻五代論討

著舊章天子嘉之轉工部侍郎仍修史宰相李揆於已護
前羞與同史任爲等列奏徙休烈爲國子祭酒權留史館
修撰以卑下之休烈安然無屑意乾元初始詔百官元日
冬至於光順門賀皇后休烈奏不可奏曰周禮有命夫朝
人君命婦朝女君自
顯慶以來則天皇后甫行此禮而命婦與百官雜處在禮不經帝罷之代宗嗣位甄別名
品元載稱其清諒拜右散騎常侍兼修國史加禮儀使遷
太常卿累進工部尚書封東海郡公雖歷清要不治產性
恭儉仁愛無喜愠之容樂賢下善推轂士甚衆年老篤意
經籍嗜學不厭妻韋卒天子嘉休烈父子著儒行詔贈韋

國夫人葬給鹵簿鼓吹歲中休烈亦卒年八十一帝爲歎
息贈尚書左僕射謚曰元遣謁者就第宣慰爲儒者榮二

子益肅

子益休烈長子天寶初進士及第當志寧時爲翰林學士
其事業不詳

子肅休烈次子亦當志寧時爲翰林學士終給事中其死
也贈吏部侍郎事業亦不詳肅子敖

子敖肅之子擢進士爲秘書省校書郎元和初拜監察御
史五遷至右司郎中進給事中左拾遺龐嚴爲元禎李紳

所厚與蔣防俱薦爲翰林學士李逢吉誣紳罪逐之而出
嚴爲信州刺史防汀州刺史赦封還詔書縉紳意由嚴在
及駁奏下乃論貶嚴太輕衆皆啞諫逢吉乃厚赦三遷至
戶部侍郎出爲宣歙觀察使赦修謹爲時所稱及居官無
所建明卒贈禮部尚書四子球珪瓌琮皆清顯琮知名

于琮字禮用落魄不事事以門資爲吏久不調駙馬都尉
鄭顥獨器之宣宗之選士人尚公主者顥語琮曰子有美
才不飾細行爲衆毀所抑能爲之乎琮許諾中書舍人李
潘知貢舉顥以琮託之擢第授左拾遺初尚永福公主主

未降食帝前以事折七箸帝知其不可妻士大夫更詔尚
廣德公主咸通中以水部郎中爲翰林學士遷中書舍人
閏五月轉兵部侍郎判戶部八年同中書門下平章事進
中書侍郎兼戶部尚書爲韋保衡所構檢校司空山南東
道節度使三貶韶州刺史保衡敗僖宗以太子少傅召未
幾復爲山南節度使入拜尚書右僕射黃巢陷京師以病
臥家巢欲起爲相琮辭疾賊迫脅不止乃曰吾死在旦夕
位宰相義不受污賊遂害之

李嗣業縣人長七尺膂力絕衆開元中從安西都護來曜

討十姓蘇祿先登捕虜累功署昭武校尉後應募安西軍
中初用陌刀而嗣業尤善每戰必爲先鋒所向摧北馬靈
譽爲節度出戰必與俱高仙芝討勃律署嗣業及中郎將
田畛爲左右陌刀將時吐蕃兵十萬屯娑勒城以扼王師
仙芝潛軍夜濟信圖河令曰及午破賊不者皆死嗣業提
步士升山頽石四面以擊賊又樹大旗先走險諸將從之
虜不虞軍至因大潰投崖谷死者十八驅至勃律禽賊平
之授右威衛將軍從平石國及突騎加特進虜號爲神通
大將初仙芝時以計襲取石國其子出奔因構諸胡以告

大食連兵攻四鎮仙芝率兵二萬深入爲大食所敗嗣業
謀曰將軍深履賊境後援旣絕而大食乘勝諸胡銳于圍
我與將軍俱前死尚誰報朝廷者不如守白石嶺以爲計
乃卽馳白石路旣隘步騎魚貫而前奮拔汗那還輜餉塞
道不可騁嗣業懼追及手挺麈擊人馬斃仆者數千百虜
駭走仙芝乃得還表嗣業功進右金吾大將軍留爲疏勒
鎮使城一隅地屢築輒壞嗣業祝之有白龍見因其處絕
祠以祭城遂不壞漢耿恭故井久涸禱已泉復出初討勃
律也通道葱嶺有石塞隘以足躡之抵穹壑識者以爲至

誠所感云天寶十二載加驃騎大將軍入朝賜酒玄宗前
醉起舞帝寵之賜綵百金皿五十物錢十萬曰爲解醒具
及祿山反肅宗詔至卽引道與諸將割臂盟曰所過郡縣
秋毫無可犯至鳳翔上謁帝喜曰今日卿至賢于數萬衆
乃詔與郭子儀僕固懷恩犄角常爲先鋒以巨梃笞闕賊
值類崩潰進四鎮伊西北庭行軍兵馬使廣平王收長安
嗣業統前軍陣于香積寺北賊酋李歸仁擁精騎薄戰王
師在矢逐之走未及營賊大出掩追騎還蹂王師嗣業謂
子儀曰今日不蹈萬死取一生則軍無類矣卽袒持長刀

大呼出陣前殺數十人陣復整步卒二千以陌刀長柯斧
堵進所向無前歸仁匿兵營左覘軍勢王分同紇銳兵擊
其伏嗣業出戰背合攻之自日中至昃斬首六萬級填澗
壑幾半賊東走遂平長安進收東都嗣業戰多乃與張鎰
魯炅來瑱嗣吳王祗李奐畧定諸州兼衛尉卿封號國公
實封戶二百兼懷州刺史北庭行營節度使與子儀等圍
相州師老諸將無功獨嗣業被堅數奮爲諸軍冠中流矢
臥帳中方愈忽聞金鼓聲知與賊戰大呼創憤血流數升
卒謚曰忠勇贈武威郡王給靈輿護還葬日使中人臨吊

給掃除十戶嗣業忠毅憂國不計居產有宛馬十疋前後
賞賜皆上于官以助軍云子佐國襲爵歷丹玉府長史卒
推嗣業功贈宋州刺史

金楊天德字君美縣陳陽村人登興定二年進士第釋褐
補博州聊城丞未及赴辟陝西行臺掾官至轉運司度支
判官公自讀書入仕至於晚歲風節矯矯不變其爲隆德
令時被圍於德順冒圍請援以死期於復命及復立縣治
撫養瘡痍誅鋤強梗民賴以安慶陽之圍也復任安北主
帥以公忠勤使兼錄事并鎮撫軍民又牒令判府事晝夜

不皇處盡智畢力拒守踰年居民餓死殆盡卒待救至圍解召公還京師公嘆曰既不能救民之死又暴其骸而去之吾不忍也擾攘中竟留月餘悉收葬之其忠主愛民如此亂後士夫或不能自守而公于勢利藐然如浮雲晚讀大學解沿及伊洛諸書大嗜愛之語人曰吾少時精力奪于課試殊不省有此今而後知吾道之傳爲有在也埋沒篆刻中幾不復見天日日昏不能視書猶使其子講誦而朝夕聽之以自樂及有疾親友往問之談笑歌詠不衰曰吾晚年幸聞道死無恨矣年七十有九卒葬高陵奉正原

之先營詳魯齋許衡所撰墓誌銘子恭懿皇慶元年贈中

奉大夫刑部尚書弘農郡侯謚莊敏有誥

誥曰行敦素尚器韞黃中令隆

德則善求民瘼判度支則會當邦經天才由間氣之鍾風

節至晚年而彌厲故人樂賢父兄也惟誨子以詩書豈子

若小丈夫然遂息交于軒冕謂善道之

傳為有在焉平生之德不啻多矣云

魏綸縣人金進士家世相傳以為唐魏徵之後也云譜牒

并古琴一張為綸高祖所收其別籍延安者之子孫犯死

罪計取其琴譜以賂延安知府得琴而免之然譜竟亦在

于彼也綸之子堯啓任本縣教諭墳在縣西南降駕原

孫展縣南孫村人中解元登進士當金之衰元初勝國時

戎虜縱橫父彥十三郎被難而卒辰及二弟典史芳金牌
屯田千戶吳渡大河客于晉家籍安邑後芳道經高陵復
置田宅令子孫繼而居焉乃遷其祖彥之柩于邑東南萬
安坊辰生仲祥仲祥生世昌世昌生文顯文顯生二子彥
輝由舉人任延安府同知伯亨由舉人任晉府伴讀後授
本縣教諭今郭下奉正二里孫氏皆伯亨之後也是時同
舉進士者又有路秉鈞李文本季曄申甲劉偉

元楊恭懿字元甫自少力學強記日記數千言雖從親逃
亂未嘗廢業年十七西還於書無不讀後得朱熹集註四

書歎曰人倫性命皆萃此書矣父沒水漿不入口者五日居喪盡禮宣撫司行省以掌書記辟不就至元七年與許衡俱被召恭懿不至衡拜中書左丞日于右相安童前稱譽恭懿之賢丞相以聞十年詔遣使召之以疾不起十一年太子下教中書俾如漢惠聘四皓者以聘恭懿丞相遣郎中張元智爲書致命乃至京師旣入見世祖遣國王和童勞其遠來繼又親詢其鄉里族氏師承子姓無不周悉十二年正月二日帝御香殿以大軍南征使久不至命筮之其言秘侍讀學士徒單公履請設取士科詔與恭懿議

之恭懿言明詔有謂士不治經學孔孟之道日爲賦詩空
文斯言誠萬世治安之本今欲取士宜敕有司舉有行檢
通乎經史試以經義論策夫旣從事實學則士風還淳民
俗歸厚國家得才矣奏入帝善之會北征恭懿遂歸田里
十年詔西安王相敦遣赴闕入見詔于太史院改歷十一
年二月辛巳歷成是日方列跪未讀奏帝命許衡及恭懿
起日卿二老毋自勞也授集賢學士兼太史院事十八年
辭歸二十年以太子賓客召二十二年以昭文館學士領
太史院事召二十九年以議中書省事召皆不行三十一

卒年七十公初家貧無田于郊假室以居鄉鄰或繼其
匱皆謝不取惟服勞以爲養至遭父喪魯齋許文正公會
葬歸語學者曰小子志之曠世墜典夫夫特立而獨行之
其功可當肇修人紀故有與其極者直期以宗盟斯道于
將來遂易禮春秋思有纂述耻爲章句儒而止所著有潛
齋集是時奉元有蕭軋同恕韓擇及乾州楊奐諸賢皆因
先生而興起公與許魯齋甚厚當時魯齋與公書及與人
書多道之

魯齋與元甫論梁寬甫病證書梁寬甫證候右
脇肺部也嗽而吐血舉動喘促者肺胗也發熱
脈數不能食者火來刑金肺與脾俱虛也肺與脾俱虛而
火乘之其病爲逆如此者例不可補瀉蓋補金則慮金與

火持而喘咳益增瀉火則慮火不退位而痊瘳反盛正宜
補虛益氣湯先扶元氣少以治病藥加之聞已用之藥而
不獲效意必病勢苦逆而藥力未到也當與寬甫熟論還
遠期秋涼庶就平復蓋肺病惡春夏火氣至秋冬則退也
止宜與益氣湯中隨四時陰陽升降浮沉溫涼寒熱及見
有証增損服之或覺氣壅間服加減枳朮丸或有飲間服
局方枳朮湯數月後庶逆氣少回逆氣回則治法可施但
恐今日已至色青色赤及脈弦脈洪則無及矣近世論醫
有主河間劉氏者有主易州張氏者張氏用藥依準四時
陰陽升降而增損之正內經四氣調神之義醫而不知此
妄行也劉氏用藥務在推陳致新不使少有壅鬱正造化
新不停之義醫而不知此無術也然而主張氏者或未盡
張氏之知則瞑眩之劑終莫敢投至失幾後時而不救者
多矣主劉氏者或未悉劉氏之蘊則劫效目前陰損正氣
遺禍于後日者多矣能用二家之長而無二家之弊則治
其虛幾乎寬甫病候初感必深所傷物當時消導不盡停
滯奄延變生他証以至于今恐亦宜倣劉氏推陳致新之
意少加消導藥于益氣湯中庶有漸緩之期鄙見如此未

敢以為必然惟吾才卿元甫子益共商之論也與呂伯
充書書奉伯充秀才不意凶變令尊仗旄棄策養可勝驚
但舊聞伯充途路中偶與人相從及相別心為不忍今罹
此艱咎何以堪處葬禮遵用遺言依倣古制信道力行至
于如此楊元甫之亞也敬羨敬羨路遠不及一往慰問悵
惘曷可言來問惟以禮自盡區區不具與趙撫相公書
宣撫相公執事比日車從過單懷不獲一見可勝悵悵時
暑甚惟起居安裕友兄楊元甫隱士也篤信好學操履
不苟實我輩所仰重執事時肯眷顧美事也劉成之舊從
姚司豐今將還家謹托附意比良晤惟千萬為國為民自
愛區區
不宣
皇慶元年贈榮祿大夫太子少保弘農郡公謚文

康有誥

誥曰其肩隨許魏公者誰與而目為秦君子則
公也抱經濟學耻章句儒守四書為入德之階梯

持一敬為立身之根祇其辨析則江河之莫禦其操履則
山岳而不移信蠶有績而蟹有匡化三輔喪親之自致無
鶉生突與祥生與視萬鍾于我有何加所師授者皆成德
達才有朋來者必忠告善道非商山之幣不起而宣室之

席始前由道德禮樂刑政蘊之旨故歷象日月星辰
指諸掌是皆非常人所企及宜其爲吾道之指歸 子三

人長寅最顯有傳次宙蒲城縣尹次宏洛川縣主簿孫六
僖伏羌縣尹仔隱居好學而能修禮樂不墜公聞曾孫復
荊州稅課提舉益鄔堡縣尹遷華州同知詳本傳

楊寅字敬伯恭懿之子生而穎悟異常讀書一覽成誦比
長盡通六經百氏之學性至孝友兼善治生未嘗以匱乏
貽親憂嘗爲蓋屋尹仁嚴兼盡未洽旬朔積年宿弊剖祛
無遺以文康公喪去任哀毀骨立服闋由韓城尹擢陝西

行臺監察御史建言

言曰修德用賢以固太平之基明制
審律以定一王之法農政舉則民生

厚屯田懇則兵食足其諸敬天憲祖興學求言公
賞罰振綱紀微隱逸抑僥倖皆禱治明時之語 未幾轉

江南行臺監察御史復申前議拜監察御史上陳江淮河

壩之田爲豪強占種者衆宜按視徵租大德丙午出僉陝

西漢中道肅政廉訪司丁內艱起僉山東東西道所至伸

枉黜濫風紀振揚至治癸亥遷西蜀四川道憲使進階朝

請大夫泰定乙丑朝廷軫念老成遂有集賢學士國子祭

酒之命其在成均講明誨誘終日忘倦卒年七十三詳編

修趙晉撰神道碑子四人僖偉旣任僖奎伏羌縣尹

魏紹開教諭堯啓之子金進士綸之孫也天性聰敏以通

經儒士發解陝西初任涇陽縣教諭轉商州學正再轉延
安府教授陞陝西奉元路教諭再陞慶陽知府所至皆有
政績生六子俱仕宦而承德尤顯任翰林國史院編修

馬遵先奉正里人任京兆尹

馬謙夫直言舉

馬廷光孝廉舉皆馬煥之先

張鼎其先本汴人遭宋金兵亂因家高陵遂爲高陵人至
正初慨文廟傾圮困身勞慮竭產罄貲鳩工聚木復舊基
立正殿設諸賢之像闢中門徑達市衢而自爲之記

雷貴縣毘沙里人兵燹之起父母逃難失去貴不避鋒鏑

誓死以求遂得父于鄧得母于終南女道中張氏姑一子而寡亦失于兵聞其在邠也備金自往贖養以終其子既長乃均已子分其業縣令以貴才賢舉監稅官宣撫司辟爲縣丞後陞爲主簿兼三原涇陽櫟陽三縣又改朝邑及洛川治縣二十餘年猛不殘義寬不宥姦卒年六十六後以第三子禧貴贈奉訓大夫華州知州飛騎尉高陵男詳潛齋楊文康公撰誌及直學士同恕爲之撰碣禧素有學行時楊文康公方以道倡起關中一時名儒如同寬大薰惟斗及薦輩皆尊事之故楊子之名與河內許魯齋頡頏

其耻仕元之志雖魯齋亦陰畏讓之楊子之道大行于時未必非雷禧輩之力也

吳份縣人嘗畜牛牛善識人意每耕任不煩人策人策之輒觸人死子弟欲鬻之份曰是嫁毒也母鬻他日份出子弟鬻之份來客已牽牛去矣份撻其子弟而躬追客以牛性語客且曰份非欲增直也客如允份言願返牛直不然種後日悔客遂還牛取直而去份又善折鬪訟不繁辭而問閭咸賓人有鬪若訟不之官而解官聞之朝迺旌其問曰耆德吳份門至今存

卷之五終

高陵縣志卷之六

人物傳下第九

明興張訥字敏行東吳里人洪武間鄉舉任翰林檢討威儀閑雅應對敏給而又善辭翰故數爲

上所寵任 上有謀議輒召訥賜坐咨訪焉其徵文之士戶外常滿屢或云訥勝國時人

崔瑾字孟瑜縣廓下里人洪武間以通經儒士任本縣學教諭勤於教訓足爲士子師表陞應天府治中

馬煥字有章縣奉政里人相傳漢伏波將軍馬援之後也

舉人洪武辛亥涇陽令辟爲儒學教諭有績授浙江道監察御史能伸寬理枉人多稱其公平尋陞鄭州知州去任鄭人懷思不忘洪武十三年三月一日卒春秋五十一以子馴貴 勅贈承德郎禮部儀制司主事有 勅命女二長爲少保墨榮毅公夫人馴字才驗中洪武二十一年鄉試任山西大同府經歷後謫戍尋以薦者遷吏部司務陞行部吏曹主事初馴七歲而孤母夫人親操井臼及長使馴力耕以自給後邑里有欲推馴爲吏者母憂之馴亦不樂爲遂爲邑庠弟子母躬紡績以資其學業馴由是領鄉

書至顯仕然馴公恕忠清勤謹和緩自始仕至終皆有政
聲有勅命馴有孫名忠者嘗令棠邑善政彰著忠孫曰
應陽者慕古求道以卒遺其妻李氏守節則馬氏自京兆
公後世有令聞寧非積善之慶乎

墨麟字士禎縣廓下里人中洪武十七年鄉舉任福建道
監察御史後改北平道風紀大振擢陞北平按察司副使
永樂初年

上靖內難南征召麟守北平督運磚石兼管軍餉招復士
卒或借兵北狄皆有成效陞刑部右侍郎人不敢干以私

家人嘗受人金器之賂懼麟知遂投之井然卒不能欺麟
追還諸人復轉兵部右侍郎進階榮祿大夫少保兼詹事
府詹事

上寵任甚隆欽免軍役賜以獅蠻帶獅蠻帶有三其一
上自繫其一賜尚書呂震其一則賜麟者也然麟雖受
寵知顯貴迨群家甚澹泊至其歿也夫人無以爲生計有
楊布政者買獅蠻帶去後呂尚書至其家問帶安在夫人
以告呂曰此子當斫頭也楊聞之卽獻其帶於呂呂遂持
還釋其罪永樂四年卒於官時

上遣官祭壘於家至二十四年行取其子準而官之洪熙

元年贈榮祿大夫少保謚榮毅有 誥命初公少時之在

郡學也讀書終南書籍所積甚多乃請工畫書舍圖士大

夫爲之詩春坊大學士廬陵解縉紳爲之序

序曰終南山載于禹貢與

俾物鳥鼠二山及積石延亘千數百里禹導雍州山水往來經此故表識以爲雍州之鎮而漢唐以來文人之賦詠至唐極盛韓退之作南山詩百有二韻照映古今蔑以加矣少時每一誦之輒思往造其間而不可得後在京師與長安諸君子交游問其勝槩則又爲之深慕焉戊寅之冬遠斥道經終南時大雪十日循禹跡而西至於礪石不意環偉傑特之觀乃得於窮愁羈旅之役亦庶幾傾其夙願而當時故舊詩問無一遇者浩歌慨歎而已數年東歸迫於程期倍道兼行但覺終南山色依依然有迎送之意不啻若夢中之境耳此余所以甚不能忘情于此山也吾友

墨君士禎世家茲山之下早歲爲郡學生洪武甲子舉進士官栢臺與余有同寅之好今爲夏官少司馬詹事春官又日與相見間復語余昔讀書山中書舍固在藏書幸無恙而此心不能一日忘因請爲之圖而士大夫爲之詩子其爲我序之夫以此山之勝雖余以遠方慕尚猶不能忘情也况君之世家于此山邪但自昔年與余語終南之勝古今俯仰二十春秋多已物故存者各天一方朝夕相見者惟余與墨君之意多前無毫髮異若常在終南書舍之時也其讀書之所得者多矣所謂出處惟一致者非歟蓋仕與學理同事異君每用以相資不偏廢也他日懸車還第以余相訪一覽終南之勝詠歌太平之盛披圖玩詩各述其所造詣以相長是又余之所望于君也子準以蔭任宗人府經歷

蕭鼎字大器縣毘沙里人中洪武二十一年鄉舉任南京兵科給事中改北京工科給事中居官清介不受饋遺事

有當言者輒與同僚入 奏無隱後官至山東平度州知
州又陞懷慶府知府致仕卒于家

裴榮縣孝義里人以薦舉茂才仕武剛州知州再轉沂州
廉勤方正惠愛及民政聲著於一時

蘇林縣東吳里人永樂間同**魏景仁**當歲饑各輸粟以周
貧皆至千餘石縣奏于

朝詔立義坊以旌其賢皆有

勅諭

勅曰國家施仁養民
爲首爾能出粟穀一

千一十五石用助賑濟有司以聞朕用嘉之今遣齋 勅
諭勞爾以羊酒旌爲義民仍免本戶雜稅差役三年尚允
蹈忠厚表勵鄉俗用副
褒嘉之意欽哉故勅

王弁縣東吳里人永樂年間解元任四川江安縣教諭在江安有教人之績陞監察御史

宋先生諱玉字廷珍孝義里人身長七尺方面隆準而蒼顏聲呵嗒聞數里自幼好書不廢道路人號宋五經舉正統三年詩經魁任雙流訓導初在學時見友人不端潔者手捶其人亦不怨同等類見不端潔者曰宋大漢來也其人輒遁避弘治間提學和順王先生移縣入鄉賢祠何提學雍大記人物列傳云性好學手不釋卷五經要義多所自得幼孤且誦且樵以養母在雙流誨生徒若子弟各

達其材行以賢能取赴部時王振當權不肯爲賂改潘府
教授 潘王尊敬如師動止語默必稟而後行比致仕不
入城市惟教授鄉間子弟從遊者甚衆治喪不用浮屠鄉
里化之及卒終不依陰陽絕穴而易之鄉人至今稱曰宋
慙爲善云涇野子曰柎未逮事外王父嘗聞諸長老云他
勿論卽臨死不易絕穴與古易筮者奚異哉

劉平字仲衡縣鄉下里人少孤奉母雷氏甚孝友愛兄弟
性淡泊以勤儉承家弗墜先業讀書知大義不飲酒寡嗜
欲沉靜簡默不輕言笑於祭祀賓客必極豐潔見人過失

必曲爲之掩護紛爭有不能平者則以正言折之卒至敬
服輕財樂施遇人之急必量力以周之有假貸不能償者
多置不問尤篤於教子子傑舉進士授戶部浙江司主事
平暨配鄭氏膺勅命

呂祁縣公諱鍾字大祿縣郭下里人景泰七年貢始任山
東齊東縣丞以母憂去後改山西祁縣丞公美姿容小心
勤慎動循禮法不妄取民財所至遺愛於民蓋自爲諸生
縣學咸重其忠信有行涇野子之三叔祖也嘗親見其行
事慈祥雅厚不凡云

高恕字子推縣郭下里人賦性剛直其事父母善伺顏色以悅之家法甚嚴至教子已雖未嘗爲學然于其子之所讀書必令背誦遇有齟齬輒痛朴焉丰采峻厲每至族中婦女無不趨避者嘗應里長自具飲食分毫不以科派于里中若里中有所忤犯必于通衢杖之其人亦心服不怨或有爭訟者多就質判不至官而退其所操履信有異於鄉人故子選卒至顯名 勅命褒贈如其子官鄉人以爲得教子之效無不榮羨之也

劉傑字世英號樂菴縣郭下里人平之子中景泰四年鄉

舉明年登孫賢榜進士授戶部浙江司主事貴州草塘之役差給軍餉及草塘平遷郎中三月遷知湖州府湖民尚訟傑乃滌誣冗譎誕之習而示之以禮民遂靡然向風明年上歲幣官屬語存餘爲出納之圖傑曰吾安可割民以奉勢乎執事者果大怒退幣七十餘疋劾不職左遷同知真定府尋以母憂去復除平陽未幾復陞知永平府屬縣富民有巡校以盜誣者官府率畏而不敢爭傑得告卽發執之其衆果自遁然乃因此中傷傑去都御史楊繼宗力辨其誣以爲自傑莅官興利除害竭盡心力民愛戴若父

母卽所誣當是寸朽之棄卒未得行傑性孝居喪盡禮又不喜侈泰平生亦不喜飲讀書常至夜分不易寒暑通春秋易卒以易顯年七十六歲卒子六人長時蘭以易舉弘治戊午科

張宗字繼祖縣東吳里人篤信端慤言動不苟嘗與樂菴劉知府爲友以貢授直隸丹徒縣主簿履任廉能民皆敬服其歸也流涕送之後五十餘年有藍田李御史者嘗令丹徒猶聞民懷之言去任好官惟張君耳太學士楊先生有贈志

周先生諱尚禮字節之號養浩軒縣治化里人以貢任垣
曲縣丞未仕授徒殆百餘人涇野子與焉乃取古孝弟忠
信修身睦婣才能政治者日講一條督令躬行其他灑掃
應對出入起居俱有法度諸門人不敢違也故一時及門
之士多漸漬以成邑中小學之教若先生可謂肇修矣垣
曲之政以清謹著聞季子紹舉人知縣

高選字朝用號渭坡縣郭下里人恕之子登弘治癸丑毛
澄榜進士授戶部雲南司主事陞本司員外郎奉勅冊
封韓府遭疾得告後忤宦官劉瑾致仕復加以勘田事罰

未五百身輸宣府會宣府缺督理糧儲官戶部薦選正德
己巳陞戶部郎中督理宣府糧儲庚午吏部尚書張采敗
言者以選同年左遷河南鈞州同知七月陞知吉州期年
改臨清州用南京大理寺暨巡撫都御史薦陞兩淮鹽運
司同知卒於官選善事父母不違意命友於兄弟不私財
產剛正慷慨敬賢樂善莅官處有政聲嘗收通州運儲擊
斷權豪兌支月糧未浹兩月積糧四十餘萬續復收放天
津倉糧雖蓆葦諸物鬻金五百遞之戶部比起天津軍校
哭送旣陞員外監督馬房草場宦官饋謁杜絕靡門所至

鋤強撫弱軍民安堵又善聽訟辯其誣枉流賊圍鈞乃設二十四策晝夜巡城金鼓弗息又援入城外男婦五十俘賊三十獲雋三顆賊攻八日不克遁去是時郡邑率殘破鈞獨完免在兩淮時邑人劉氏趙氏婚姻也時賈揚州一見不再後劉爲人請託峻拒不從及卒都憲藍公檄運司賻金商賈及臨清人奠哭七日有去思碑

姚文盛縣慶豐里人以吏員授四川某衛知事守法奉公其廉無比費用馬通出乘蹇驢雖遇撫按上官亦不懾懼然而撫按無不敬愛其守制也有巡按者作孝衣二襲以

彰其賢并賜養廉米二石文盛具不受當其志操雖縉紳大夫亦或讓焉有德政碑存

孫先生諱昂字廷舉縣慶豐里人中弘治壬戌康海榜進士授行人司行人先生幼有大志父携之任有恃其官而侮之者先生正色曰此豈可以誇人哉比長入邑庠言動不苟苦於誦習常至夜分或且達旦隆冬則以羊裘被身足藉麥草不以爲苦又以親老在家暮則自學至家長則自家至學日常徒步二十餘里定省學業兩不曠廢教人以敦本尚實修德謹行爲首及爲行人猶日常燭書讀法

不輟志在行道濟時構所深知也未究而卒年三十九

崔先生諱誠字彥實縣郭下里人以貢士任河南商城縣
主簿在官廉慎小心縝密無所苟取於民既致仕非飲射
讀法不與縣大夫接爲鄉大賓者四十年公之繼室貢士
尚翁諱溫之第五女與涇野子母宋淑人爲五姨涇野子
少時得數侍公杖屨知其詳卒年九十五

李先諱崇光字宗顯其先臨潼人元末兵亂來籍高陵
西吳里先生少爲邑學生正德庚午以太學生授南京國
子監典籍事父母能色養得其歡心父疾親嘗湯藥侍臥

其側晝夜不解帶旣殯猶寢苦容顏枯槁見者曰古毀傷者殆此夫邪其事母疾猶事父也嘗作營域環域築堵環堵種樹樹計百章又嘗代諸兄構屋基廣八十畝爲屋百楹工師僮僕日百人食於其家乃獨談笑指揮比屋落成析居家人無後言外人無私議旣爲典籍又以其俸貲作服器畀諸兄家 國朝典籍書板多泄南監繕紳置籍者印千紙輸白金五分於典籍乃皆辭弗受以爲吾豈鬻書者哉於是祭酒永嘉王公司業棠邑穆公咸曰李籍之俸已薄此亦弗取其可得哉以疾卒於官

樊先生諱宗玉字廷璋號渭北縣張橋里賈店人也幼而質實敏給長益勤儉爲庠生以易鳴關中累試於鄉不第弘治七年以歲貢選爲朔州訓導尋以母憂解任免喪復除河南遂平訓導未幾御史薦其稱職陞河陰教諭初先生_{在學篤信好學有古人風其喪親也勇修古禮不作佛事成化末年歲凶人相食乃出廩米以賑里間自爲庠生教人有方受業之徒卽誨以忠信質實不令作浮華態其後教朔遂平及河陰皆若是也}

崔先生諱璉字宗商縣郭下里人以歲貢生爲崇慶州判

至則抑權右解寃誣於是陳副使之弟以侵田刑萬王事

之姪以凌人罪他日又薛蕭監生所誣盜穀之人并娶婦

廖氏誣盜馬者及釋群盜誣富民張益之事民皆稱快巧

郿郿温諸盜百餘寇城常受都御史委選用策士一朝盡

擒之於是州人歌之曰崔公直如矢清如天又歌曰趙酷刑唐

善貪人心天蓋其平日奉身儉約祿秩外毫髮不取有民

理崔州判餽雙魚僧餽一茶者亦不受遇公燕亦先返不夜飲每曰

燭淚流處人淚流也至於革春燕之浮費寬里中之雜歛

皆州人所心悅者也然信行其志而權要者陰使頑狡七

訟于上官然卒無驗反數獎其廉能茂州倉弊萬端監收數得賞被罪去巡撫劉公曰非崔州判不可乃委之然適病風濕嘆曰此天留我也卽上書求致仕劉公三差官查勘又昇其身親視之辭之益恨劉公嘆曰知足知止無此官也遂檄州給道里費二十五金於是州人涕泣塞道以送且曰自有州官以來未之見也初先生襁褓鄰媪撫其腹曰此兒後必顯貴旣學生矣言論侃侃上下信服有韓叅政者按縣當月食韓寤熟失救諸不敢請先生以石擊其門韓驚起賞粟五斗嘆曰後必爲忠臣父病瘞下九十

餘日先生獨涕泣侍側以簪引丐下比歿哭幾喪明與兄和索居十年矣買地十畝兄欲之卽破券畀之五畝當歲貢時劉知縣安贖金三十有刁民訟劉誣爲賊又賂先生約勿任則答曰吾寧失歲貢不可失天理也後在太學祭酒司業皆器重之使同典簿收支月俸且曰利不可誘才足有爲者此秀才也其旣去崇慶也盛暑耘耔祁寒教授一羊裘二十年其徒孫行人先生來錦輩皆名士

呂渭陽公諱溥縣郭下里人封翰林院修撰歿贈南京禮部右侍郎何提學雍大記曰公爲人質直無華行孚於鄉

黨平日救死者五六人又多解紛難事故墨劉李等數姓

世感德焉其敬神忠君愛民之意雖飲食間未嘗忘三

事馬理曰公不言而躬行者也以子構官受封翰林院修

撰有勅命勅曰父有善行為子者務在顯揚臣有賢勞

邦制之常矧子禁從之英上有賢明之父肆加褒命實倍

常倫爾呂溥乃翰林院修撰構之父性敏質淳慮周識遠

安恬有守儉樸無華聞達不求于當世修為默契乎古人

排難解紛播義聲于鄉黨孝親友弟篤倫理于家庭眷惟

令子之登庸實出義方之訓誨雖當貴顯尤切箴規遐齡

浸及乎七旬榮養方隆于三釜康強無恙諒天道之足徵

寵渥維新宜綸音之渙布茲特封為儒林郎翰林院修撰

遠增林壑之光安享桑榆之樂勅曰教育多勞母恩不

殊于父寵榮均被君心實體乎臣此倫理之當崇實風

所由係典章具在存歿攸同爾宋氏乃翰林院修撰呂

之母出鄉賢之名門爲善人之良配性惟貞靜行特端莊持家于困約之時式勤警戒教子于幼穉之日勤切規箴顧翰苑之超登已泉扃之久闕養違鼎釜報德之心何窮光黃絲綸追卹之恩宜厚雖緣大慶式按爨章特勅贈爲安人匪徒彰裕後之休抑以爲有德者勸勅日繼母有教育之德不異劬勞朝廷有褒錫之榮式隆寵數蓋禮則緣義而起故恩必以類而推在古則然於今猶重爾侯氏乃翰林院修撰呂柟之繼母稟質端方提身謹飭從夫雖晚治內無違實聲丕著於六媼慈愛實均於諸子顧惟冢嗣爲時名流詞垣久積乎勤勞鼎食方隆於祿養宜申眷渥以勵顯揚茲特封爲安人諒國典之常新庶家規之永賴其誥命見宅墓

劉勤字警常縣郭下里人臨清知州守臣之父也爲人忠

厚温良貌類儒者雅不與人競短長人以是非質者輒平

分之退無怨言親死無葬地時新室卽以釵環易之居喪

哀毀骨立柱而後起每遇其忌辰必泣而致祭與諸少弟處友愛甚篤同爨至白首閭里有不善於兄弟者必指之以相勵云一日里人會飲衣新衣出遇友人偕行者衣甚敝卽更以舊衣陪之當年儉嘗步求弟璉於漢中以歸他日獲穀盜因勸爲善人知縣璜署其名於旌善亭曰躬行爲善又能化人於善年六十六卒涇野子誌其壙云

劉鑛縣郭下里人性醇厚質樸不知巧僞專以力田養親爲事凡商賈貨利之務一無庸心惟粗衣糲食以自甘見人有侈靡者必指以戒子孫曰毋若所爲以壞爾性也談

弟銜少孤鑽收之同爨及長爲之昏娶至成立弘治間知縣璜置善簿以紀邑之善人署鑽爲首曰心純行篤爲善第一正德間知縣恂時
鄉飲可正賓席鑽固辭不赴反免之削其名及後再舉始赴之嘉靖間知縣興仁會諸庠士而議鄉飲須擇有德者時齋長崔漢等對曰惟劉耆老鑽稱耳遂以鑽爲正賓除其夫役年七十六卒孫岸舉嘉靖庚子科禮記魁人常以爲積善之慶涇野子數勸告鄉里人云

周紹字克述縣治化里人養浩先生之仲子也早遵庭訓

篤志經史爲文字多奇古語幼與程汝修及涇野子同窗
皆以聖賢之學相期舉弘治甲子鄉試遊京都相交與者
悉名士及累科不第遂受戎縣令蒞政公清夷民敬服於
是上官薦其勤能調任江陵時縣有江水害迺創築長堤
民獲安居墾田千頃窮人被利巡撫張公稱其仁明然不
能善事太守爲其誣陷解任而歸素履剛方清謹事繼母
以孝聞樂勸人爲善初縣無春秋禮記雖鄰封求二書無
所得也絡乃身走武功諸處購求獲之於是程吉治春秋
半時用治禮記而縣始有春秋禮記之學君之緒行可以

占知矣

程吉字汝修號東軒縣郭下里人生而惇樸慤直辨毛之年與涇野子同憲師事周先生吉性遲鈍誦講皆難功倍他人然後同之然堅確不憚恹心若弗得寢食戚廢既入邑學與涇野子暮夜伍燈多至鷄啼白晝亦多不越戶闕行輩嘉之曰程二得無有兩銅睛邪初治尚書已徹首尾廼自棄去復爲春秋苦力鑽研間有齟齬與友辯讐三年之間精詳貫穿提學按試遂魁邑士邑有春秋之傳實自吉始士人曰語有之力到功深鐵擔成針程二之謂已吉

父嬰疾吉捐業不事索醫求藥奔走不遑灑涓之間人咸
敬慕父娶後妻宜而勤家吉克祇若慈孝兩至乃他人來
不知吉有繼母也事其兄憲敬允愷悌自少至壯罔或闕
牆人家昆弟忿爭必指吉昆弟自咎涇野子曰吉良友也
余孤介狂直妄欲倣古然力不能赴屢自畫焉吉獎勸救
正令勿顛踣及今稍能省解深思吉益吉廼不存若吉者
仲尼所謂直諫者非邪吉雖未有爵位布所學於當時卽
其所至可不謂難與吉同時有周紹桑子達劉時蓀紹舉
人爲江陵令已見前子達字兼善在學時其弟已析居矣

旣而弟死子達憐其姪之幼孤也復收與同爨時教諭李
應奎稱其友弟也申移於提學云旣貢瀕選而死時蓀字
廷香素公直其從兄嘗矜其富時蓀譏之曰兄不見長安
北楊家城乎今已被他人犁耕矣一日子過懷慶會都御
史栢齋何公問城外明月山曾到否公曰未也予曰山近
在此而不遊將是子友劉廷香邪蓋予曾約廷香遊山答
曰只是一塊石耳公卽問其名與號以爲與已同也廷香
事其母甚孝飲食衣服皆口手親試而後進諸弟有不恭
者不形諸言恐以傷母心也旣遭喪哀毀骨立人不忍看

日惟田間一至並不他出古之直道而行者其殆斯人與

予少受父師之訓賴茲群友夾持既長從遊之徒又復資

益如高廷璽之端慤周官之明果楊九儀之孝友馬應陽

之沉毅弟栖之甘貧慎獨

栖答牛友書曰辱惠書讀之竦然驚惕惜生遲鈍又乏為善惟

日不足之意將有行也多為所困故獲罪于人者不可枚

舉有愧于已者不勝其改今足下奮志慕古是吾友也第

恐怠心一生而為群議所訕則反遠鄉間友朋之所恥笑

夫為學規範門路於來書已備矣生雖愚劣願共體而行

之雖暗室屋漏之處必思與顯明之地相合雖貨利交橫

之際必思無為所引以喪其初志行之不已雖舜孟之徒

亦可班矣如何如何幸甚教之庶此生 康衢李犬紀之從

之不虛也不具丙寅十月日栖再拜 善李毅之確實孔氏裔之慕古今皆亡之矣因慕吉傳并

憶諸良涕泗交頤

節婦唐李氏本縣人楊三安妻舅姑及夫相繼卒子孤寡李氏晝田夜紡三年間葬七喪太宗賜帛三百免徭役

于琮妻廣德公主李氏宣宗女懿宗妹也咸通十三年琮貶韶州刺史公主與之韶州行則肩輿門相對坐則執琮之帶琮由是免時諸公主多驕縱惟廣德動遵法度事于氏宗親皆如禮內外稱之及廣明元年黃巢入長安殺琮廣德曰我唐室之女誓與于僕射俱死賊并殺之

明興張氏臨潼相橋里張錦女適縣孝義里王九成年二

十而九成死乃撫育三子奉舅姑舅姑欲奪其志張屢剪髮自殘示不嫁有司上其事永樂五年旌表

張氏縣郭下里人吳仁之妻年二十而仁亡遺腹越月生子守志撫育然舅姑哀其年少欲挫其節張氏截髮自示以誓不嫁惟紡績爲生宋教授公有題其畧云舅姑欲奪志誓將青絲截紡績以爲生恨不同夫穴永樂五年有司奏其事旌表

白氏縣東吳里人鄭鼎妻知縣侃之母也白氏生侃時未三十而夫死勤儉持家誓不改志侃少長誨之讀書或惰

饑荒業各踰中庭無少姑遇有丈夫風佩果中式官至知縣豎白貞節門

邢氏縣張橋里人張得憲妻國子生睿之母也嘗紡績以養舅姑而已與夫糟糠不給又蹴夫行貨以資養夫死河州邢哭幾死舅姑欲奪其志邢曰婦事二夫禽獸行也使其無子尚不忍爲况霄漢在邪他日從叔之妻龐氏隣人王銳之妻宋氏皆以新寡遇年難不安其室謀諸邢以圖存邢曉之切至龐宋感其言皆完節故邢至今生幾八十里人狀諸縣未奏旌耳於是光祿卿三原馬公爲作傳

且讚曰男有百行女惟一貞詩稱女士其殆邢乎

論曰婦人未識字講學至其節守雖遭饑餓患難老病而不改孟軻所謂性善者乎縣節婦如上所錄者皆已旌其門閭載諸史傳矣至張得祿妻邢氏者年幾八十尚未奏旌然賴有馬公傳焉彼墨昌妻吳氏少寡撫一子至八十二而卒王洪妻周氏無子撫諸女或間日一得食至七十而卒吳恂妻馬氏幼寡守節撫一子至六十餘而卒蕭悼子妻王氏年二十生子韶甫三歲而悼子歿乃撫韶成立年幾六十而歿邑學生崔漢妻楚氏漢死守節不嫁至

被擄逼迫具狀縣尹給帖執守以率斯數婦者豈非所謂
性善者乎然且未旌故縣之婦人雖貴如女后張楊二氏
未能為詳獨此死節者哀其志立論云

科貢間傳第十一 例貢恩蔭附

科金楊天德

見人物

魏綸

進士見人物

孫展

鮮元登進士見人物

元魏紹開

見人物

魏思明

紹開孫任江西道御史

魏希會

紹開會孫

魏希智

紹開曾孫任

鄆縣知縣

明興洪武間八人馬煥

見人物

馬賈

御史

郇端

給事中

墨麟

見人物

張訥

見人物

蕭鼎

見人物

吳範

未詳行事

馬馴

見人物

永樂間九

人馬瑀 字孟玉郭下里人九年鄉試謫直有口而膽畧過人應試時憲司搜檢瑀拍其腹曰文章在此腹內

奚用搜檢憲司問其名則對曰馬瑀也是科果中式他日

標陽呂尚書有事于墨少保家墨氏速瑀以應寶呂公頗

有失言瑀即應之曰將相豈有種乎呂公遂抱其首

曰甚勿言使震得罪于鄉黨朋友於是瑀聲名大起 王弁

見人 王佐 字廷甫郭下里人十二年 王端 字表正孝義

孝義里人 舉人任和州同知見宅墓 王端 里人癸巳科杜

韋 科未詳 馬達 字九達慶豐里人戊 銀綬 字文佩郭下

全雲 字均澤郭下 宣德間一人 劉志 字文學東吳 正統間

一人 宋玉 見人 景泰間六人 張政 字子宣渭陽 劉傑 甲戌

見人 墨春 字景芳準之子癸酉科 郝鏡 字敏道西吳里人

物 劉鍾 字天錫郭下 成化間一人 郝滋 字時益西吳里人

里人 丙子科 初任中令再任

本朝名臣

均人知類 弘治間七人高選庚申科孫昂庚午科劉時蘭字廷

之子戊午科能孝 胡重德字尚仁東吳呂柟在翰林時受

勅命轉任南京尚寶司并禮部時受 誥命字仲木郭

酉科正德戊辰進士第一名授翰林院修撰官至南京禮部右侍郎致仕 勅曰文章之任谷特重乎翰林國史之

官筆前首稱乎修撰故必極衣冠之選抑將為臺閣之儲既越常流宜承殊典爾翰林院修撰呂柟學識深醇器資

端粹狀元及第素非溫飽之圖禁從登庸遂列清華之職考接號得人之盛編摩稱秉筆之公顧守正不汙于權奸

而引疾甘求於靖退身安田里名動搢紳比公道之昭明尋英賢之起用茲特進爾階儒林郎於戲陳仁義格君心

赤旣徵於勸講罄謀猷裨治道尚有待於登崇益懋乃庸用光朕命欽哉 勅曰婦人之行不出閨闈之間綸命之

褒特顯朝廷之上雖因夫而後貴亦有家而甚賢風化是關恩章可後翰林院修撰呂柟妻李氏系出宦門嬪於儒

科貢

三

彥性惟貞靜行特端莊禮義從夫有儆戒相成之益勤儉
 率下無貴驕自恃之心婦道既修褒章宜錫煥揚綸綍式
 耀禴禕茲特封為安人用昭主闈之賢益行宜家之慶
 誥曰朕惟典璽之官職親地密視他司為益重必得其人
 乃克稱焉爾南京尚寶司卿呂柟學有本源文魁天下講
 筵史局勞效有年頃者出補外僚歷遷今職乃能首公砥
 節廉慎弗渝一時之人望攸歸朕甚嘉焉茲特進爾階奉
 政大夫爾其益勵乃行修乃業延登有待副我訓詞欽哉
 誥曰朝廷推恩群臣必及其配重風化崇激勸也爾南
 京尚寶司卿呂柟妻封安人李氏毓秀德門作嬪名士克
 修婦道相乃有家夫既進階爾宜並貴茲特加封為宜人
 茂膺寵光益敦儆戒制曰春卿之建寶首四時倫魁之
 選特先多士休哉此選兼預此官既際遇之獨隆宜德業
 以相副谷爾南京禮部右侍郎呂柟學識老成文章典雅
 覽觀載籍常懷復古之思出入險夷愈礪直躬之操緣沉
 晦既久人方望其有為顧幾會如斯志可知其必遂昔魁
 大對乃見先皇帝之明今擢禮曹實出子一人之意茲
 遣國家慶典推恩特進爾階通議大夫錫之誥命爾尚益

爾乃無盡弘乃散允諧邦禮之司用侯留都之鎮
 婦人無遂事言從夫也從夫而貴則名號等威亦當視其
 夫矣爾封宜人李氏乃南京禮部右侍郎呂構之妻出自
 右族嬪於德門勤儉靖恭克執婦道侍郎構歷華要茂著
 聲稱爾亦有功焉茲特加封為淑周紹見人劉守臣為知
 人從夫貴也顯號聿新內治惟謹
 縣時有勅命字克艱郭下里人平子科初任任邱縣知
 國政所關朝廷有錫命之榮賢才是勸徵諸往勤賜以嘉
 旌爾直隸任邱縣知縣劉守臣登名鄉薦擢宰畿邦牧民
 存愷悌之心處已勵清廉之節賢聲既積最考是書宜有
 寵名用示褒勤茲特進爾階文林郎錫之勅命爾其勿怠
 初心益勤庶事如有懋績朕不爾遺焉欽哉勅曰朝廷
 既單恩于臣下必首逮于室家肆被褒嘉豈殊存歿爾直
 隸任邱縣知縣劉守臣妻紀氏率修婦道允宜厥家雖相
 夫之志未終而元配之名尚在可無錫命以示追榮茲特
 贈為孀人幽扁弗昧渥寵斯歆勅曰婦職重於厥祀位
 不可虛君寵厚于推恩禮無容廢爾直隸任邱縣知縣劉

科貢

守臣繼室璽氏夙遵姆訓繼配需流雖未躬井臼之勞亦
 克副蘋蘩之托爰因夫貴用示恤恩茲特贈為孀人諒其
 未泯之靈歎正德間一人鄭侃字本直東吳里人庚午科
 此至優之渥初任絳州學訓導屢被上

官獎勵云學行著聞教法修舉而一時絳郡諸賢無不作
 詩歌詠其美陞河南昨城知縣蓋侃平日勸學好善夙夜
 不惰早喪父事其母白氏承顏順志不敢違訓借其妻供
 養甘旨備極孝敬他日侃有小過白捶撻之罰跪中庭盡
 日不敢起也時侃年已將三十矣白待之嚴如此及侃既
 舉憂母之貞節坊未立也訪問營謀夙夜不遑眠食者二
 三十年至建嘉靖間五人呂田字幼耕涇野子馬書林為
 立而後已

南京刑部主事時有勅命

字子約己丑進士初任輝縣知縣進南京刑部主事陞本

部員外及郎中再任汝寧知府勅曰朕惟父母正則子
 孫孝慈古有斯言矧茲臣工孝以事君非其義方有素無
 以致是爾馬憲乃南京刑部雲南清吏司主事書林之父
 孝友勤儉本其成性忠信懇懇足以廉頑惟茲直道之民

安於家食之吉爰因命子以是褒嘉茲特封爲承德郎南
京刑部雲南清吏司主事祇服恩光益維壽祉勅曰朕
聞賢母之教其子入則致孝於親出則盡忠於國以無貽
父母憂茲維母則朕甚慕焉爾齊氏乃南京刑部雲南清
吏司主事書林之母族爲上望德爲女師勤儉恭順克濟
夫剛慈惠莊嚴能成子美錫之命服維以象賢茲特封爲
安人其祇新恩以食舊德勅曰朕聞古先哲王同民心
而出治道有刑以防其姦然惟助治而已嚴不深文寬不
長惡兼是二者疇將若予爾南京刑部雲南清吏司主事
馬書林蔚以進士往收下邑朕用省於有司之職守已愛
民惟爾允恭叅執邦典正刑明郡威愛克孚用副簡求允
謂宜稱茲特授爾階承德郎錫之勅命書不云乎明德慎
罰明猶慎之可勿勉歟勅曰朕惟婦人無爵從夫之爵
古有是言今國家寵綏群臣旁及閭閻豈非不失其相稱
之義哉爾南京刑部雲南清吏司主事書林妻王氏少以
茂資輔之姆教言容功德徽柔懿恭嬪於令人宜其家室
可無褒命以厲相成茲特封楊九式字檢夫西吳劉遷字
爲安人其尚欽承斯爲異數

喬郭下里人丁酉科會試中
乙榜選授山西高平縣教諭
劉岸 字汝登郭下里人
庚子科禮記魁

貢洪武間二人馬福 初年貢任
南充知縣 李濟 字巨川西吳里人
十八年貢任河南光

山縣丞陞四川德陽知縣清勤愛民增
益戶口縣有遺愛碑至鄉人稱許之
永樂間七人文彬

字尚質東吳里人初
年貢任潛山主簿 劉玉 貢年未詳任
觀成知縣 馬瑄 貢十年 魏志 字本

道郭下里人 李瓚 字廷珪十四年貢任
張釗 字克己貢 牛

十二年貢 宣德間六人尚温 字志和張喬里
張儀

温 字仲和郭下里 人貢年未詳
字九成滑陽里人貢年未詳
任開縣知縣復任井陘知縣 崔翥 字彥翔郭下里
周最 字公

勉治化里人貢年 魏賓 字至賢郭下里人貢
郝達 字文通

未詳任太原縣丞 年未詳任四川吏目 郝達 西吳里

人貢年未詳任 正統間九人李芳 字子實郭下里人四
武鄉縣教諭 年貢任郝州判官 李

瓊字宗瑤奉政里人初劉繼清上石里人

年貢南京橋張翽字九臯上石里人十一

年貢鳴讚李璟字玄玉西吳里人十

字守正上石里劉剛字克柔東吳里人十

人十二年貢馬忠見人紅贊字文素孝義

翔字九臯渭陽里人元李恭

字子厚縣西樊家庄人也景泰四年貢任山東博樂知縣

在任八月愛民守法一毫不私夜夢城墮神與語欲授以

位覺即患病七日而卒時家口衆多貧不能歸卒之明日

青州知府夢一知縣告貧乞送家衆同籍叩之乃曰吾

昌樂知縣李恭也不數日縣申缺官文書至呂鍾見人天

科貢

忠 字推已 郭下里人 七年 李貫 字應月 郭下里人 七年 崔

成 見人 吳瓚 字廷器 郭下里人 七年 周吉 字彥慶 慶豐里

導 昌訓 成化間十八人 王理 字循性 郭下里人 二年 貢靜 蕭

偉 字士壽 毘沙里人 四年 貢洪 來雍 字世傑 東吳里人 六

劉節 字時用上 石里人 王倫 字秉彛 孝義里人 十 王璽 字

川慶豐里人 十二 周尚禮 見人 趙諒 字宗信 奉正里人 趙

恕 字宗貫 奉正里人 十 劉儒 字世稱 郭下里人 二 趙春 字

舜奉正里人 二 吳道洪 字文傳 郭下里人 路坦 字平之 東

十一 年 趙秉彛 字字常慶 豐里人 二 來粒 字廷器 東吳里

貢張維字希案安信里人李榮光見人陳文字尚美郭正

年例弘治間九人郎蘭字德馨清糖璉見人賈榮字從善

人任雲南陽陵樊宗玉見人楊泰字時雍張喬李銳字進

千戶所吏日郭下里人弘治年間貢授嶧縣丞少貧苦學遭歲

凶族有遺燬躬自殫之家居講授學徒欲因歲凶解業流

離銳令富徒饋之或自携糗米食焉後皆成業厥既丞嶧

首出捕盜獲六人時那署日行五六十里此至牙上下俱

渴暈銳命取水與盜共飲駁訖盜不俟訊咸殺其情曹縣

人殺其人夫婦挑踵刻目刺鼻殲乳也五檢官俱不伏君

至謂曰此夫婦者固惡人汝當其手刃此也志除一邑害

情以布授其弟令衣母逆乎諸人皆羅泣日今之時若犯

科貢

他官破家蕩產已明公且以布還海如慈母死不敢為遊

嘗部諸邑夫修河費夫裹足不至者解囊錢假之至既還

又以假他夫之餼者一夫病且死養諸虛問所思食日

思鵝脯取厨鵝與之夫自是瘥銳且起諸夫之父母妻子

千人直夜追送擁不能行君在暉幾八月於撫來錦字尚

大獎吏部考上等入謂銳才不勝德豈然乎綱東

吳里人弘治間貢授福建連城縣主簿錦賦性質實無偽

其好善勤學出於天性在庠序中見一人有長愛慕不已

雖千年有推讓不知有我當考貢時其陪貢者文

劣錦輒讓之考出於真心主考知其誠也喜從誇美之

他日錦選主考者已進位蒙宰矣乃改銓錦于連

城蓋至仕迪廉履義無所求取自以為內不負

已學外不負官箴矣然以他事牽掛而楊鳳東吳里人未仕

歸豈非其屈哉既去連城人為之立祠人未仕

字時新郭下正德間十四人裴尚文字宗周孝義里人任

里人未仕四川馬湖府教授

蕭昂字廷暉昆沙里人魏琪字君瑞郭下里人陳華字積

真齋下里人歷野千舊黨友也正德嘉興以文學授
 四川同提舉履政卽禪心睦務追完通課四萬七千大寧
 罷丁數輩案積隨以二舟以求緩期君叱怒不受益
 加嚴切雲陽商人白鳳以百金追送至新寧且曰此鳳知
 耳答曰爾不開楊震之四知乎於是巡撫盛公有守身謹
 慎鹽法疏通職優有司之舉擬授四川行都司都事至
 則厲精所事罔愆于素時鹽井土官警職方與有周兵備
 者廉君勤能朴實給銀千有五百委之講和君善其辭說
 多方曉譬於是鹽井土官伏首聽命宿警盡釋未幾遘疾
 不起夷酋蠻醜亦多泣送蓋君爲學生時提學王先生傷
 重德行之士衆舉推爲公孫世祿字永爵郭下王緒字繼
 直第一宜其仕如此也孫世祿字永爵郭下王緒字繼
 信里人初任平陽府趙文學字希賢奉政里人弘治間貢
 經歷陞太平知縣任萬全都司繼事初與子同
 學于西寺師事周先生又同入學事瀘州半山高先生爲
 人恭慤謙慎在斷事時深爲蔡都憲所倚任但或忽於明
 哲宋鰲字大鯨孝義里人弘治間貢瀋府教授先生者之
 爾宋鰲從曾孫也初任山西永和知縣後任四川鄧都知

科貢

縣鰲父先逝事其母日飲食必在寒煖之節簞席衾枕皆
手鋪置兄弟索居多競產業鰲獨取其薄劣日性所欲也
戚黨有犯罪輸米者請鰲 謁日吾寧代輸義不可往及
至永和僻在山峽地多谿澗沙磧賦更繁重乃力請上官
汰其賦役歲減金二百有五十於是逃者還業倍增其戶
邑有雙山素爲盜巢至是亦皆屏息於是永和人日苟于
之不欲雖賞之不竊果然哉嘉靖庚寅改知鄆都路當衝
衝且邇諸夷鰲莅以忠信公清遂得其心縣有強寇上官
檄夷兵勦捕至則盜寢上官已其軍餉夷卒怒欲攻君當
是時爲宣撫者婦人也語其下日宋公素稱長者有恩信
今日斷餉非其本心遂解去冉希友之家人乘間傷人命
仇家誣希友君庶得其情釋希友希友潛五十金行謝輒
揮去之有婦人夜殺其夫殺廁中乃誣其先室子日汝以
我年少恐有所出析汝業乃殺爾父邪鰲鞫之日父子天
注必不至此此豈汝惡其夫之老殺之以圖再嫁乎其婦
驚以爲神縣有修仁井異時生鹽有課後不生鹽而徵課
如故鰲移書上官得罷其課在官恒以廉潔自持因親友
有勸其爲家者則叱之日鰲貧士致位縣侯子又學生豈

<p>可不知足 如鄧都水 有泰政按 縣客索賂 誘以注上 考語鰲日 鰲果</p>	<p>勝任自有 公道苟不 勝任雖得 羨考其如 此心何居 數月</p>	<p>以疾歸既 抵家遂不 起據此則 鰲于教授 公之道其 亦有</p>	<p>所續成 李朝用 字廷臣 昆沙里人 任</p>	<p>者乎 蕭雄 字孟武 昆沙里 人初任石 泉知</p>	<p>縣才能著 馬有 字天錫 慶豐里人 劉萬鍾 字大爵 孝義</p>	<p>于西蜀 復禮 字宗顏 上石里人 初任黎城 訓</p>	<p>導陞與縣 教諭起服 歷城教諭 劉環 字真閏 郭下</p>	<p>靖間十人 王龔 字宗器 郭下里人 桑子達 字兼善 奉正</p>	<p>士華 字子實 郭下里人 劉增 字益之 東吳</p>	<p>任雙流縣 訓導 權世用 字仲行 奉正里</p>	<p>人未 吳山 字仲石 郭下 李克家 字子肖 昆沙</p>	<p>住 劉守德 字克 新郭</p>	<p>下里人 墨達 字時顯 郭下里人 張霄 字伯雷 張喬</p>	<p>選貢 任四川安 岳訓導 劉思 字</p>
---	--	--	---	--	--	---	---	--	--	--	--	--------------------------------	--	---

科貢

睿郭下里人守
臣之子例貢
劉琢 字德修郭下里人例貢
楊宗禮 字汝約慶豐里人例貢
劉

珮 字秉德毘沙里人例貢
劉理 字秉直毘沙里人例貢

恩蔭墨準字仲平縣郭下里人榮毅公麟之子也為學官

弟子員永樂二十二年

上不忘榮毅公之績遣官行取補太常寺典簿遷刑部主

事陞宗人府經理有勅命 勅曰宗人府所以典屬籍而博叙親親者也為之長貳必選宗

室之賢者至于治其文書以贊相之亦非得人不以輕授爾宗人府經歷司經歷墨準始由蔭補擢典太常遷屬秋官復更今職咸克勤慎以舉其官茲特授爾階奉政大夫錫之勅命以示褒榮爾尚飭躬勵行必敬必誠以稱朕委任之意其往懋哉勅曰幾與已齊人倫之正也肆朝廷任恩其夫必有及之爾
人馬氏乃宗人府經歷司經歷

墨準之妻克謹婦道以相其夫嘗受封矣夫再晉秩封爾
爲宜人服此榮恩益崇而慎勅曰太常掌禮樂之用而
重祠祭之儀卿佐之選固難而典領簿書以協贊其事者
亦必得人庶稱厥任爾文林郎行在太常寺典簿墨準以
父勞擢居是職茲特錫勅命以爲爾榮夫祭祀之禮朕所
以交神明者也豈容毫髮之不敬哉况擢爾于名臣之干
宜寅恭嚴肅不懈夙夜庶幾無忝于國家爾惟欽哉勅
日朕惟人臣克效勞于國者雖本於父母蓋亦有伉儷內
助之力也故推恩之典必有之爾文林郎行在太常寺典
簿墨準妻馬氏克勤婦道以相其夫能致盡心於所職茲
特封爾爲孺人服此榮恩永光閭闔欽哉呂昉字幼開涇野子之子嘉靖十
六年以縣學生入蔭太學生

高陵縣志卷之六終

高陵縣志卷之七

邸宅陵墓第十二

漢降駕原邸在縣西南崇皇寺等地舊傳卽文帝誕生處薄后被呂后妬出居於代州時薄后方娠至崇皇寺地文帝誕生今稱降駕原云或云文帝自代來次高陵毘沙鎮處四日故相傳鎮中東嶽廟卽帝誕宅也廟會在八月十五日卽帝誕辰故異於諸東嶽廟會也又曰唐玄宗兩幸崇皇寺云通志后妃傳高祖崩諸御幸姬呂后皆幽之不得出宮而薄姬以希見故得出從子之代然皆無考

景帝陽陵

見祠廟

唐龍躍宮

唐高祖之舊宅也在接蜀門西十四里李觀武

德中以奉義宮改建焉似本高祖未發而言夫高祖其先

本成紀人後魏時大王父熙為金門鎮將戍於武川因家

焉祖虎伐魏有功封唐國公父昞襲其爵生高祖於長安

則龍躍宮者或昞別宅抑或高祖之離宮乎故武德七年

十二月丁卯高祖如龍躍宮戊辰獵於高陵大獲禽獸時

諫議大夫蘇世長從行上曰今日樂乎世長曰不滿十旬

未足為樂上變色既而笑曰狂態復發耶對曰於臣則狂

於陛下甚忠八年十月壬午復如龍躍宮德宗改爲修真
觀中有神堯真容及御井靈栢梁開平中廢但龍泉寺在
其旁或亦因是而名也故今其地稱李觀云今所存者乃

臥龍寺焉予嘗有題

神堯高祖六龍飛潛邸於斯
八角井欄猶未改是誰先已

漢張耳墓在縣西十餘里李趙村

李廣墓在縣西南良村原上迤東俗稱李將軍墓漢書所
謂賜廣塚地於陽陵者也

如淳宅未詳所在蓋平帝時賜其宅於高陵者也有碑頌

存未完

君諱淳字孺生昔有先德媛班周室武王伐紂身
充八百位登九五封姑并於葵邱後遷於茹割土

如耳相魏築邑曲沃其封耳之子達預登機運知
 數鍾彝飛驟負經剖心投報照主感雖利見封為義侯劔
 歸滅秦食地臨淄迄於王莽中祖茹普夙履華門解褐十
 歲遇政安漢物友接及謀大舉常存誠盡諫而草感忠
 死致慊外超乘神器顧採無志授大夫洪威難巨闕
 命祇台葵逼就京賜宅高陵光武中興朝清明信彰宇
 宙流順帝祖根馮登賴以優榮桓帝櫟賊蒙為漢諮德
 識經密眷姻窮骨躍躬皇特拔殊度啓蒞并牧後遷梁州
 帝加其姊中水公之誕生父俊再臨并州珠輪駕錦服
 傳御君籍先蔭情懽榮塗稟性叡哲少好博學通敏五經
 精練群籍懷寬猛之才抱緯世之策每覽莊生犧牛之誠
 思踐四皓栖巖之跡遁志邱園群儒遵道聲遐布響論天
 宇靈帝聞之蒲輪辟召若大舜之舉臯陶周文之得尚父
 授散騎侍郎逼為秘書制漢音義百有十二冊拜陳郡相
 敷洪禮政民庶澤液殊土之值邵公洛陽之遇姬旦化
 被累稔能言戴德但兵亂將興皇道巨夷解職辭祿匿躬
 畝畝暨魏納劉禪特徵任時邁耳順惟辭免承受加光

蘇大夫送柩而還上天匪吊慧齡歿替春秋七十有五夢
於家堂都喪聞為痛惜四野咸懷良明臣悲戀如
此也讚功則銘德刻石建碑樹行墓衝其辭曰魏
哉乾覆載理平物受差品故有愚明我君稟懿仁而哲
德侔伊姜頤智形間播皇室辟召儒生起潛應命臣
成遇以朝寵委以秘經
易細察實深非賢不鑽非聖
不命君惟湛明行藏從心

趙真女墓在接蜀門西南十里李趙村真女漢義郎蔡邕

妻也然邕陳留圉人而真女墓在此者順帝時邕被司徒

劉郃將作大匠陽球中常侍程璜之讒將棄市以呂強救

詔減死一等與家屬髡徙朔方居五原安陽縣明年大

赦邕將還慢五原太守王智智中常侍王甫弟也乃告邕

怨於囚放謗訕朝廷邕自是亡命江海豈其貽真女於此
死葬之邪

姚萇原陵在縣西北十里積灰爲之方幾一里俗稱灰堆
坡本號原陵其父弋仲晉永嘉七年封高陵郡公死葬天
水冀縣萇旣僭位號父爲始祖墓猶曰高陵置原邑五百
家其子興墓則在縣東五里大紀村前曰偶陵或曰原陵
亦在是

唐于志寧宅在縣西南七里七流村

王秋官尚書河間公墓在鹿苑原上有碑殘剥不知名

生孫世祿云姓王氏

金南京轉運司度支判官楊天德墓在其祠南三里奉正

原上魯齋許衡撰墓誌

誌曰公諱天德字君美其先耀之

世業農曾祖諱植始為縣吏父諱禮以高大庚子歲十二
月庚子生公於北郭公之父雅好儒而仲兄茂實克家厚
資公使游學公亦勤能副所望既肆業太學登興定二年
進士第釋褐補博州聊城丞未及赴陝西行臺榷榷權
大理寺丞繼擬主長安簿未幾改主慶陽安化簿尋辟德
順之隆德令再辟安化令補尚書都榷榷遷轉運司度支判
官京城不守流寓宋魯間十年而歸長安公自讀書入仕
至於晚歲風節矯矯始終不少變其為隆德也被圍於德
順冒圍請授以死期於復命及復立縣治撫養瘡痍誅鏹
強梗民賴以安慶陽之圍也復任安化主帥以公忠勤使
兼錄事并鎮撫軍又牒令判府事晝夜不遑處盡智畢力
拒守踰年居民餓死殆盡卒速收至圍解召公還京師

高安系示

邸宅

公嘆曰既不能救民之死又暴其骸而去之吾不忍也覆
 攘中竟留月餘悉收葬之其忠主愛民若此亂去後士夫
 或不能自守而公於勢利藐然如浮雲晚讀大學解治及
 伊洛諸書大嗜愛之常語人曰吾少時精力專於課試殊
 不省有此今而後知吾道之傳為有在也埋沒篆刻中幾
 不復見天日昏不能視書猶使其子講誦而朝夕聽之
 以是自樂及有疾親友往問之談笑歌詠不衰曰吾晚年
 幸聞道死無恨矣以戊午歲八月四日卒於家春秋七十
 有九公娶寇氏早亡一女適三原郭孝廉再娶太常少卿
 京兆孫通祥之女一子曰恭懿孫勇曰寅孫女二人皆幼
 以是年十二月十日葬於高陵閩國鄉奉正原之先塋公
 于孝廉篤實克紹先志平居事公已著信於朋友而居喪
 哀毀至五日不食寢苦枕塊居廬啜粥又能行古道其治
 喪一從公之遺命用司馬氏朱氏攻詩古禮民迷固久而
 公獨得以禮葬有子如此公為不朽矣河內許衡敬叙其
 事而為之誌且系銘曰出也為死生以之處也守不
 變於時有臨桑榆學喜有得其知益精其行益力吾道之
 公異端之私瞭然曾中洞析毫釐外私內公息都鉅鼓俯

仰古今可以無愧受全於天復歸其全尚固幽藏無窮歲年

元領太史事楊恭懿墓在其父天德墓旁大學士姚燧撰

神道碑

記曰嗚呼有秦君子楊公諱恭懿字元甫其先始鄉耀之同官中避宋亂徙美原五世祖儀徙今京

兆之高陵興高祖亨再世力田曾祖植祖禮再世任縣吏考天德權金興定進士第由博之聊城丞棧陝西行臺權大理寺丞至京兆長安慶陽安化等縣令順德之隆德及安化而安化兼銀事州之判官三職具修積官中大夫其德其政有先師司徒許文正公墓誌公初仕章宗南郊為太常臣授幣而立御史將劾不敬其友曰夫夫習於禮者名行秘書蓋從而問對曰授立不坐御史慚縮而止太常則公孫通祥實公玉父公以至大乙酉生於其居京兆之友桂坊童而讀書記識強敏日數千言時難從中大夫逃亂而東不恒其居於汴於歸德於天平雖難關險阻未嘗怠馳其業年七十待中大夫西歸無田於郊假室以居鄉鄰或繼其匱皆謝不取惟服勞以為養暇則力學綜博於

書無不經目而究心者握衣之徒戶外蕭屢橫經入問爲
祈疑義源源其辭若决江河而下之名聲日起海內縉紳
友大中者馳書交譽知之者求其文復其肆者以爲
鹽堂之席有繼與其極者直期以宗鹽道於將來時已
遂易禮春秋思有纂述取爲章句儒而止至於用世反覆
史學以監觀興廢存亡理亂得失於千數百年之中曰輔
治之具體樂兵刑非王者果不可興行於天下兵恃以交
泰亂而安元元刑取其端教循本以求皆仁義之資也不
講之有素或一旦帥三軍爲士師實質焉不知其方反受
教武人俗吏乎事雖未試從可察見其佐王之畧年二十
四始得朱子集註章句四經太極圖小學近思錄諸書誦
其言而推其意嘆曰人倫日用之常天道性命之妙皆萃
此書今入德有其門矣吾何獨不可窮理以致其知反躬
以踐其實動靜云爲一乎持敬行之以剛健居之以悠久
日就月將俟其成功於潛齋之下自任益重矣歲甲寅
徒奉潛齋教來秦公一見傾蓋歸而心服日世烏有斯人
之倫敬事循師而司徒友之亦至分庭而行抗席而坐一
遇講貫動窮終日而所造益深平居誦于爲言喪中十六

魏口水漿五日喪葬爲具不足稱貸益之棺槨皆黃賜衣
衾必綉疏衰饗粥悲憂爲疾杖始能興司徒會葬歸語學
者曰小子志之曠世墜典夫夫特立而獨行之其功可當
肇修人紀聚居六年司徒東歸喪姚夫人猶中大夫其疾
益陷三輔士夫知由禮制自致其親者皆奉之公先是宣
撫司行檄欲以掌書紀其義事祿之昏不能屬至元七年
詔司徒日國子祭酒拜中書左丞始與右丞相安童共
政日舉公賢丞相以聞十年上遣協律郎申敬來召疾不
能行十一年儲皇下教中書如漢惠聘四皓者使聘以來
故丞相遣郎中張元智書致是命其冬下車京師上遣
丞相弟今國王和童勞其遠來他日入見上問何鄉先德
爲誰從何師學子今有幾無不周悉其夕嘔血上遣尚醫
來候且賜之藥少間明年月正元日翼日上御香殿以大
師南伐日久欲筮之時日者待詔公車百十爲輩獨以命
公益以道德素著可交神明者其言頗秘侍講徒單公履
請設取士之科詔先師文獻公司徒竇文正公與公雜議
公奏取上崇實行檢經學奏曰三代以德行六藝賓興賢
能漢舉孝廉策經術魏晉尚文辭兩經術猶未之遺隋煬

始專賦詩以試之使自投牒貢舉之法遂廢雖有明經止
於記誦宋太宗始試經義亦令典矣哲宗賦詩選全備習
將救斯弊時有明詔嘗曰士不治經學孔孟之道日為賤
詩空文豈可以立萬世治安之本今欲取士宜勅有司舉
有行檢通經術之士使無投牒自薦試以五經四書大小
我論時務策畧能從事實學則士風還淳民俗趨厚國家
得識治之體矣奏入上善之丞相每咨世務倚以自毗會
且比征公方以畢男婚而歸十三年詔奠歷太史主悔繼
筭同知郭推測司徒明歷理或言公嘗推歷終一甲
子而得日食月食者七十有奇日日月之青自古無是之
多也十六年詔公著歷義方奏太史臣皆列曉獨起公及
司徒衡起立日二老自安是年少皆受學汝者故終奏皆
坐畢其說亦異數也語詳星歷纂要集賢館學士大中太
夫兼太史令越明年以徙家得請歸文明年儲皇俾靈臺
再岳鉉名公手書議相承旨李壽儲皇不可以為議治
昭文館大學士正議大夫領太史院事召二十九年詔明年以
舊議事申書省皆辭疾不行三十一年疾極親賓同之忽

長息曰有是哉國衰也聞者危之亂以他言徐又曰誠哉
後三日顧言子寅日敬慎小心以卒實正月二十有五
也後嗣位詔下知賓天果以其日人以為平生與國至誠
所格嗚呼使哭者有如溫公則公當以如呂壽起言天下
事矣徵士蕭剡誌其墓曰朱文公集周程夫子之大成其
學盛於江左北方之士聞而知者固有其人求能究聖賢
精微之蘊篤志於學真知實踐主乎敬義表裏一致以躬
行心得之餘私淑諸人繼前修而開後學粹然一出乎正
者維司徒暨公嗚呼誠知德不易之言哉後十年寅以江
南行臺監察御史疾得告去自金陵過宣以燧少受知公
而耳其雅言求銘墳道然所貴乎君子三焉耳位耳道耳
德耳得於心之謂德用於時之謂位行其學之謂道如剡
之言同其德矣以年考之司徒之生前公十有六其入見
前十有四其卒也前十有三而卒官皆昭文館學士領太
史院事同其位矣然是位也皆極人臣之亞為古人命位
實行道之資謂不得君知名而名既至則溫其玉音以勞
疾則尚醫交候饋藥太官繼膳疑政賜問入見坐語聞辭
則留留而不可暫聽其去去而思之復咨司徒十名公八

名其禮貌亦至矣如是而兩公迭爲循墻不可謂道之行亦天也然四海匪獨士于凡筐篋之吏求售於時其誦而習亦先四書蓋天理同根人心誦其言者衆則爲其道者將多非兩公肇是太平之基其誰歟斯有潛齋遺稿高祖妣齊氏曾祖妣紀氏妣寇氏孫氏夫人李氏以柔嘉作配君子姻里德焉三子寅其胄也寅令京兆蒲城宏方學女子四人適主京兆長安簿席貽士子馮嘉鳳翔提控按牘王繼述樞密院椽傳昱孫男禧女子子二人長適呂曾次幼銘曰維天生賢匪使自有俾極斯民爲責已厚公於明實肩實負乾乾其行良良其守師古葬祭如禮不苟三綱之淪我滌自手推得其類無倦誨誘學者宗之西土山斗鳶飛魚躍潛齋自蒞令聞之延已徹宸旌束帛莪莪賁及林藪丹旻日來何暮汝叟大師南倅斷已久其宜進退汝耆以叩又曰多士文字儷偶求得碩才奚策以取又曰歷義群喙紛糾汝折衷之其從誰某凡是夫政無不可否公拜稽首瀝膽悉剖丹旻日噫惟茲儲后端本萬邦汝寶以友儲后曰令識治黃耆惟汝爲可服朕元首公益抗章臣蚤衰朽養安踰純僅止中書歸從先靈奉政之阜止

汗有碑無我樵叢壘
詩千齡以告爾后

贈葦州知州雷貴墓在毘沙鎮塢南元直學士京兆同恕

撰碣 碣曰昔名門右族有耀於前克昌厥後未有不由其
先仁積義累以造其基吾於雷君見之君以至元十

六年己亥卒是年七月壬申葬高陵毘沙鎮塢原以子禧

贈奉議大夫華州知州飛騎尉高陵縣男母杜氏贈高陵

君至順庚午子禧持狀謁余求表其墓余謂君傑德偉行

已具潛齋楊文康公志可以慰安泉下光昭永久豈容復

措其辭固謝而請益力謹據其實而次第之君諱貴雷其

姓也出自古諸侯方雷氏蓋以國為姓後單姓雷君之先

世為耀州同官縣雷平川人曾而上譜逸沒究祖遠徙家

高陵毘沙鎮考定皆晦跡不仕妣楊氏生君金真祐甲戌
七月庚寅幼卓異不群長力於善行壬辰兵起父母失於
逃難君不避鋒鏑誓死以求未幾得父於鄧母氏殆無聞
焉歲時悲痛不已後二十餘年訪得子終南女道中兩親
違養之日服喪過哀喪禮一遵古制張氏姑一子而寡亦

邸宅陵墓

失於兵間既知母子在邠備金自往贖養以終與夫合葬焉子彌教育成長均已子分其業初庚子歲高陵縣以君才賢舉監稅官丙辰宣撫司辟爲其縣丞甲子初改至元受行中書省徵陞爲主簿兼三原涇陽櫟陽三縣高陵民千餘戶駐于豪家君力究理復隸民籍四年勅授主簿朝邑十一年改洛川十四年以疾辭始終治縣餘二十年猛不殘義寬不宥姦獄平訟簡官民兩益家居二年而卒先娶傅氏再娶杜氏內助之賢備在儒學提舉孫近齋撰志子男六人祐鎮江民匠大使傅出也詳監稅使禧奉訓大夫知耀州裕奉訓大夫判興元路禎尉臨潼杜出也祚次居五側室郭出也孫男十九人從仕者半又皆象賢孫女二十二人初傅氏父母之二喪杜氏父母家凡三世合十餘喪兵後其殯沒於榛莽皆爲塋地葬之里中喪不能葬者亦資其具凡人急難必爲救卹故老至今猶稱道之嗚呼君生平之德如此之實皆自吾仁義中出信可以培植基本垂祐後人矣或者惜君之位不顯於時是蓋不然當責豈必在其躬觀夫子承孫繼桂玉滿前驪芳並秀融融洩洩四氣之和集備一門登名仕版然人生則有孝養之

榮沒則有褒贈之美茲固不可以爲顯乎傳曰不在其身
在其子孫奉訓有之系以銘銘曰人皆可以爲堯舜此語
諒豈欺凡庸嗚呼奉訓真英雄崢嶸善積邱山崇玉石具
焚際艱凶父兮母兮失相從乃知至孝天可通慈闈具慶
還春風恩洽義淡親疏中人之疾痛如我躬治邑有政廉
以公蘇息疲瘵鋤姦因用雖未完德豐子孫競爽聯芳
蹤翩翩羽凌霜空報施神理何隆隆聖恩洪濡徹玄宮
英靈有鑒歆其逢松栢鬱然馬鬣封塢原高對巖岷峯一
碑翠炎工磨礪刻
詩用以昭無窮

集賢學士亞中大夫國子祭酒楊寅墓在其父太史令墓

前國史院編修趙晉撰神道碑
碑曰泰定四年春三月一

子祭酒楊公卒長安之故居正寢壽七十有三至正甲辰
其子仔手行實謁子而言曰先人奄棄諸孤三踰星紀墓
隧之石迄今無辭以刻子幸哀我而銘之嗚呼晉生也後
未及拜集賢杖屨然仰其名德久矣忽敢以不文辭謹按

公諱寅字敬伯世爲高陵縣人高祖植曾祖禮具仕縣吏
祖天德登金興定進士第南京都轉運司度支判官積官
中大夫皇元贈中奉大夫刑部尚書弘農郡侯謚壯敏祖
妣孫氏弘農郡夫人考恭懿昭文館大學士正議大夫領
太史院事贈榮祿大夫太子少保弘農郡公諱文康妣李
氏封弘農郡夫人公穎悟異常自知讀書一覽輒成誦比
長盡通六經百氏之學性至孝友兼善理生未嘗以匱乏
少遺親憂侍昭文應酬賓客賢否皆欽器之至元乙酉陝
西行省辟克掾史不樂謝去選除承事郎蓋屋縣尹撫民
以仁嚴懾群下未浹旬朔積年宿弊剖祛無遺藩憲交薦
丁外艱哀毀骨立服闋由韓城縣尹擢陝西行臺監察御
史其所建言於朝修德用賢以及明制審律農政屯田敬
天憲祖興學求言公賞罰振綱紀徵隱逸抑僥倖皆裨治
切時之語未幾臺罷行臺御史復前議詳藝文畧入拜
監察御史上陳江淮河壩之田豪彥占耕者衆宜按視徵
租可足國用而舒民力大德丙午勅僉陝西漢中道肅政
廉訪司秩承務郎糾憲長凶恣撓法卒正其罪亦自劾求
退弗許至大辛亥改僉河東山西道以母老歸養皇慶癸

丑起任陝西行臺都事僉事山東西道尋丁丙艱痛疾一
如喪父終制遷奉議大夫陝西漢中道廉訪司副使凡出
巡兩道伸枉黜濫風紀振揚至治癸亥使憲西蜀四川道
進階朝請大夫務崇大體不事煩苛邊服爲之肅寧以年
七十致仕奉定乙丑朝廷軫念老成用賢謀畫遂有集賢
胄監之命其在成均講明誨誘終日忘倦凡經指授者俱
登顯用明春奉祠嶽瀆還疾作頽言其子曰守身力學無
墜先業遂逝初配王氏繼扈氏封正農郡夫人以至正丁
未合附高陵奉政原先塋之穆子國人傷從仕郎代羌縣
尹偉侁仔女四人適呂克孝察院書吏王子益宋師善陝
西行省宣使路恭道孫男四復益壽觀孫女四悉配名族
仔當孤苦流離之際旣力襄葬又爲揚旌考遺善託諸不
朽其賢矣哉銘曰皇天生才俾資治理豪傑振興尤敦世
美猗與集賢機警疇比文耻浮誇學窮源委綵服趨庭歡
承甘旨從親入京聲華日侈兩職牧民歷剔憲使善良輯
夷奸邪殄弭抗章瀝誠懇懇弗已挺然風稜詎因勢靡令
業克承光復其始中奉有孫昭文有子懸車遂閑優游出
里上日耆碩爲我強起嘉謀諮詢廟堂傾企樂育俊髦冠

邸宅陵墓

裳擬代祀方殷遽興哀誅從祖歸藏沒而寧
止崇邱言言清渭瀾瀾顯詩配鑄用垂遐祉

明鄭州知州馬煥墓在奉政原有 勅命教諭古邾田圭

撰誌子馴墓在其側為主事時有 勅命 勅日人孰不

之賢而能宣力效職者朝廷必推恩以報之所以遂其顯

親之心而勸天下之為孝者也爾禮部儀制清吏司主事

馬馴故父馬煥善裕於躬慶延於後致有子效用於朝推

厥本源宜有褒顯今特贈爾為承德郎禮部儀制清吏司

主事靈爽不昧尚克承之 勅日朕惟人子之才雖本於

父而資於母德亦深矣故國家推恩臣下存則有褒榮之

命汝亦有追贈之典焉爾張氏乃禮部儀制清吏司主事

馬馴之母夙有德善著於閨門是生令子效勞於國探厥

所自宜有顯褒茲特贈爾為安人靈其歆承永貲幽壤洪

熙元年 勅日禮部古宗伯之任其屬有因皆置郎以長

制而協贊其事者亦必得人乃克存濟爾承德郎禮部儀

制清吏司主事馬馴擢自胄監荐更任使為春官屬式宜

厥職茲特錫之 勅命以示褒榮夫朝廷寵待臣工以酬
 勞其益懋修以俟旌擢欽哉 勅曰朕惟人臣匪躬以奉
 國者雖本於父母蓋亦有仇儷內職之力也故推恩之典
 必及之爾禮部儀制清吏司主事 駙繼室魏氏克盡婦
 道以相其夫故能盡心於所職朕用嘉之茲特封爾為安
 人服此榮恩永光閨闈欽哉 誌 公諱煥字有章姓馬
 氏其先扶風郡伏波將軍馬援之裔裔也始祖嘗居太原
 因元兵荒高祖杲來高陵渭陽因家焉杲生五子公之曾
 祖乃第四子也而生祖瑞瑞生二子長曰敏夫次曰遜夫
 敏夫生三子長孟遠次有章又次有鄰公娶張氏本縣張
 從道之女也洪武辛亥涇陽令辟為儒學教諭陞監察御
 史仲寬理枉尋陞知鄭州授奉訓大夫牧民有方御眾以
 仁至今州人尚思慕之春秋五十有一以疾終於官時洪
 武十三年三月初一日也夫人生一男二女長適墨麟任
 監察御史近陞兵部侍郎次適劉章任觀城知縣男娶吳
 氏魏氏當公卒之時馴年有七歲母夫人笑然無所依親
 操井臼使馴力耕以自給後邑里有推馴為吏者毋竊憂
 之俾克邑庠弟子躬紡績以資其學業二十六年秋應鄉

貢進士春除大同府經歷始獲迎母以就祿養後遷吏部
 司務尋陞北京刑部吏曹主事馴公恕忠清勤謹和緩永
 樂十一年三月十八日魏亦善終於家馴哀毀踰禮奉柩
 歸明年合葬於奉政原祖營銘曰苗裔昌大流澤延長屆
 於始祖起家太行高曾創業訖父始昌首拜御史繼而循
 良勲業烜赫政聲琅琅天不假年雲掩輝光母儀婦道教
 子有方子賢能繼奉葬故鄉吉日來
 耐渭水之陽泣涕勒銘永視勿忘

王大使家墓在縣東南奉政原上前翰林檢討王九思今

籍鄆縣者之先塋也 按王氏族譜云王氏先河南人來仕高陵遂家不卒塋今處有諱元亨

者或即始來與其子孫皆不可考 繼祖繼容繼先者兄弟三人亦不詳其所自出元末兵起繼容繼先東行出關

繼祖與其二子克誠克信 孝家西走辟居鄆縣終南山中至繼祖仍歸塋高陵弘治中縣尹朱璜嘗為築垣每歲清

明王氏四人

來祭掃焉

贈少保前兵部侍郎墨麟墓在邑南原上有諭祭文并

誥命其子宗人府經歷準并其孫憫州知州春墓在其旁

維洪熙元年歲次乙巳四月庚午朔二十六日乙丑

皇帝遣行人劉萃致祭於故兵部侍郎墨麟日嗚呼古
之人有言人惟求舊爾昔從朕於居守艱虞之際竭心奮
力可謂勞矣今朕統承天位迫惟疇昔而爾九原不作豈
勝感愴之懷茲特贈爾為少保謚曰榮毅賜以誥命遣人
致祭以著朕念舊之誠汝尚有靈服斯諭祭誥曰朕恭
承天序統御華夷眷念舊勞咸俾致進永懷冥漠宜有均
恩容故兵部右侍郎墨麟明於憲章嚴於操執昔先皇
帝奉天靖難之時爾實從予城守歷時既久克効於勤雖
升貳於夏官曾無幾而物故九原已遠一念未忘茲特贈
爾為榮祿大夫少保賜謚榮毅於戲厚終如始以示好賢
不已之誠稽行易名以著汝世不忘之羨庶其幽爽服此
明恩誥曰國家於臣之能勞於君事者雖沒亦褒贈之
耳推恩其親及其家室此令典也矧又有子列官於朝為

朕任使者乎宜加恩數及其所生以示獎勸爾馬氏故兵部右侍郎贈少保墨麟之妻太常寺典簿準之母以勤儉相夫以德義教子宜錫恩典俾與夫階茲特封爾為太夫人尚其欽承益介壽祉春有誌陝西提學副使伍福撰未錄

南京驍騎衛經歷陞和州同知王佐并其父王仲賢墓在

邑南原上有

勅命

勅日國家兵衛之設所以分理軍政長貳皆以勲臣處之至于協贊於幕

者亦必得人乃克有濟爾驍騎右衛經歷司經歷王佐贊畫戎幕蓋有年矣考績能稱特賜勅命授徵仕郎以示褒嘉服此隆恩懋修不懈尚有顯爵以觀爾成欽哉勅
 夫婦人之大倫故朝廷推恩群臣命必及之驍騎右衛經歷王佐妻閻氏克相其夫茲特封為孀人祇服榮恩永光閨闈勅日國家推恩臣下必及甚親者所以重本而勸孝也而何間於存沒哉驍騎右衛經歷司經歷王佐故父仲賢慶鍾厥子而祿養不逮揆其所自宜有顯褒今特贈

爲徵仕郎驍騎右衛經歷司經歷靈其不昧尚克承之
勅曰朕惟群臣之才者固本於父亦必資母德焉從有褒
榮沒有追贈此有國之通制也驍騎右衛經歷王佐之母
高氏有子能官而不逮養沂惟所自宜錫褒榮特贈爲孺
人靈其承之
永賁幽壤

勅封戶部浙江司主事劉平墓在邑西門外昌連渠南有

勅命戶部尚書前翰林院學士長安楊昇撰墓表其子知

府傑墓在其前有 勅命翰林院修撰古邵康海撰誌

勅曰人臣能盡夫事君之忠朝廷必遂其顯親之孝此忠
孝一致而上下所以相須也爾劉平乃戶部浙江清吏司
主事傑之父義方訓子克舉其官宜寵錫榮以示褒顯茲
特封爲承德郎戶部浙江清吏司主事爾其祇承無忝嘉
命 勅曰國家褒寵任事之臣而必榮及其親者所以勸
忠於孝也爾鄭氏乃戶部浙江清吏司主事劉傑之母婦

道毋饑夙著聞闔有子登庸皆爾慈訓所致茲特封爲安
人服此光華永綬祿養表曰天順五年四月十九日陝
西高陵劉君仲衡以疾卒於家享年五十有四其子傑戶
部主事聞訃守制將歸營葬事遂於翰林學士錢公原博
志君壙復持所狀君之行實侷鄉人郎中閻鐸聞本詣余
拜請表厥墓余與傑邑相比而傑舉進士余又濫司考較
今又居僚屬不得辭按劉系本出豐沛其後子孫散漫於
天下累因兵燹譜失其傳故君家高陵曾大父孝叔大父
允德俱隱居父振母雷氏咸以懿德淑行聞鄉人君諱平
仲衡其字也早失怙賴母氏鞠育成人天性孝友爲人沉
默澹泊敦厚周慎直諒不阿謹約節儉又能涉獵經書凡
人倫綱常之大節無一不洞曉其義故於慎終追遠長長
幼幼睦宗族樂賓友各不失其條理由是承先業而弗墜
訓子弟於有成他如剖人之訟周人之急免人之償其行
之可書者非一傑初登進士因公道便還家君勉之日士
之仕在行其義而已勿以之謀富貴既授主事以年勞得
以授勅封君如其官母爲安人復因公道便還家君又
勉之日臣之事君在內外始終一致甚勿以晚節自飾其

疾革召妻子曰吾為人雖不敢以君子自許事不為流俗
所染壽雖未至期願亦不為夭殤但念爾輩能不廢吾家
法而傑能不墮其初志吾無所遺憾矣語畢歿其配鄭即
安人四子長傑也自幼為校官弟子以至中鄉舉登進士
居今官循蹈規矩無一事之縱放者次俊舉儒傑為
邑學生亦時有科目之望孫女四俱幼擇以張順五年十
一月初六日葬奉天鄉北山之塋嗚呼古人豈有道行者
皆傳其實於後世以示勸於將來者劉公修身齊家之道
其庶幾乎故宜表之於墓上云 附永平知府劉公諱傑
墓表表曰樂菴先生姓劉氏諱傑字世英別號樂菴高陵
廓下里人也父封君平配安人鄭氏承其祖允德考振之
業且有懿行爰生先生及其弟俊侃儒先生賦質宏偉素
履剛方孝親友弟如出性成既肄儒業攻苦甘貧夙夜匪
懈迺領景泰癸酉鄉薦登甲戌孫賢榜進士觀政戶部管
發犒賞雲南軍需時黔國公沐方總鎮滇南禮遇贈送浮
於他使先生一無所取沐滋敬重將佐咸悚莫敢私干還
授戶部浙江司主事未幾封君平卒既終制復入戶部見
各省督學半用舉人歲貢流弊多端先生上疏歷陳其非

且請簡用科道部屬有學行者出為憲臣以理學政上嘉其論奏遂定為例至今遵行不改他日貴州草塘寇猖王師于征庭論以先生素有威望遣督軍餉六師所至烏道崎嶇糧輿隨給人服其能至擬諸木牛流馬之才雲及草塘寇既平班師論功迺遷地官郎中蓋殊擢也嘗陪祀南郊大學士邱文莊公見其衣冠嚴肅語同列曰此陝右人豪也方三月即有湖州之命大學士承新劉公定之語韓太僕乃曰世英常公輔自期今守年郡足展其驥足矣然實湖民之福也語詳祖送詩序中蒞湖三月堯禮義之教革譎誕之習省歲弊之費汰織造之侈滌誣辨冤政清刑省而迺抑宦寺之招權隆隱士之干旄是時吉永楊君翰有事於湖與士大夫慶曰劉侯公廉仁愛如此但恐陞任不遠湖民失望爾未幾乃為權要傷左遷真定府同知尋以鄭安人憂去服闋再任平陽府同知尋復陞承平知府伸富民之冤執巡校之橫又為勢要中傷解官去承平民流涕送之道經洪洞有段君讓者善知高陵先生契友也見其悠悠自得迎謂之曰人皆常因權要顯子獨以屢作權要而見黜豈非天平先生教然曰千歷佳越晉燕趙之

蘭幾三十年心未嘗沮今豈因去官而熱中耶歸家靜坐
讀書恒至夜分不易寒暑至老未倦通易書春秋卒以易
顯作為字書各體咸臻其妙樂菴之號所由顯也其所著
樂菴稿存于家先生不可侈大性不喜飲少飲輒醉謂其
子蘭曰酒以作禮好則散德汝諸弟少其善戒之在仕途
苦嗜積書有奇書輒以物購之承平之去大中丞楊公力
辨其冤言自傑蒞任興利除害扶弱鋤強民愛戴若父母
今以無根之誣罷其官深為可惜雖未施行而先生之名
不朽矣且還我劉公之謠雖一時哀慕之詞而千萬世存
而不朽者此也宣德丁未十二月乙卯生弘治壬戌七月
辛巳以疾卒于家春秋七十有六初配魏氏無出繼王氏
克執婦道亦先公歿再繼王氏駿有令德子六人長時蘭
人舉

勅贈戶部主事高恕墓在縣東三里有勅命碑其子選

墓在其前有勅命涇野子撰誌勅曰國家隆使臣之

禮錄教子之功爵賞既

高陵縣志

卷之四 邸宅陵墓

七

如其身褒封必及其父義實通於今昔制不異於存亡爾
 高恕乃戶部雲南清吏司主事選之父詩禮傳家邱園養
 素義方教子已收效於甲科郎署登庸乃遺哀於風木眷
 惟潛德宜賁褒章茲特贈為承德郎戶部雲南清吏司主
 事靈爽如存尚其歆服 勅曰子之於母孝愛蓋極其深
 君之於臣禮意必從其厚故養有不逮而恩無弗加在理
 則然於情尤當爾商氏乃戶部雲南清吏司主事高選之
 母敬教無違賢明有則篤成令子早登巍科顧郎曹之嘉
 績既成而鼎釜之榮養弗逮宜申恩命以示追崇茲特贈
 為安人尚期靈爽之昭益迓寵光之賁 勅曰地曹總邦
 計之權民生是賴主事佐郎官之政職務攸同故必簡清
 通之才斯可責富庶之效爾戶部雲南清吏司主事高選
 登名甲榜擢屬地曹在公精出納之方處已屬操修之節
 賢勞既積嘉譽用彰官評不俟乎踴明國典預加乎褒寵
 茲特進爾階承德郎錫之 勅命於戲庶官之職務在寅
 恭入政之疇必先食貨尚請共於爾位以勉爾於朕懷欽
 哉 勅曰臣有事君之功妻有從夫之義故錄賢勞於國
 必推寵命於家此今昔之所同豈存沒而有異 勅命於
 雲南

清吏司主事高選妻邱氏出自名門續於良士聞儀祿肅
 德性柔嘉方資內助之勤遠違賢勞之願爰因夫貴昭示
 國恩茲特贈爲安人庶靈爽之有知服休光於無斁勅
 日妻必有繼式隆饋祀之儀恩貴乎均肆及喪封之命茲
 惟典禮實體恒情戶部雲南清吏司主事高選繼室任氏
 夙遵姆訓繼配儒流雖未躬荆布之勞亦克效蘋蘩之職
 爰因天秩用錫褒章茲特封爲安人服此嘉名益敦教祇慎
 誌曰初商安人夢日殞於懷生公在床幼輒聰敏抱志
 崇遠常役火夫被叱自奮曰彼役吾者匪人邪乃從師貸
 書誦讀弗輟提學伍公簡升邑庠有先達者指公語贈君
 曰止此子能成邪公颺言曰選三年當踰汝矣他日贈君
 出賈囑公曰我歸汝必廩贈君歸果廩年十八也既舉陝
 西同舉有誚其榜末者公曰有進士科在明年公舉進士
 公於書一覽輒識弗忘余嘗侍坐談及往事不遺隻字友
 人楊鳳死不克葬公歸之棺槨金布乃舉焉公之初仕給
 賞甘肅四十萬金餘金千有五公悉封還戶部收鈔崇
 文門在公三月積弊肆率比歸搜篋而發監收大倉同事
 宦官蔡邕頗肆權勢公潛改邕奸邕使人語曰凡事相忤

行史系示

邱宅陵墓

三

不虞後患乎公應之曰若依汝遇百斤斫頭罪矣豈錯愕
 失色不復改嘗督理宣府糧儲益殫厥志納戶百金止耗
 一兩立獲通關諸省之民謳歌載路比落兩淮持躬滋厲
 商賈畏懷都憲重公公雖病漸臥縮印綬同知鈞州令行
 閩郡鈞人馬公劉公故太宰也其子族亦執禮孫公不敢
 驕恣於鄉在吉數月流離歸版達吉之日男女焚香哭送
 爭奉肩輿在臨清解舒里甲費出規措驛遞戶頭久罷馬
 頭孳牧弗償斟酌損益勞瘁用興去郡弗久孀婦峴山常
 讀循吏代不數人公歷三郡不讓前哲矣播常訓告諸子
 必述貧賤時服食令諸子無事侈汰病革曰今日過昔遠
 甚田地足供衣食子孫可事耕讀吾願足矣且芳臭有千
 載榮枯無百年天命在茲瞑目何憾公可謂死且不亂者
 矣

鴻臚寺序班無錫縣丞劉節墓在上石壁有勅命

鴻臚寺掌朝廷之禮儀卿佐朕自擇之至於屬職亦必得人
 節有濟爾鴻臚寺序班劉節發身胄監擢任台官歷歲

既深勤慎弗懈宜錫恩寵以旌爾勞是用進爾階登仕佐
郎錫之勅命以爲爾榮爾其明辨朝章相導有儀以稱
任使
欽哉

誥贈南京禮部右侍郎呂公諱鑑墓在邑東北隅有誥

命翰林院檢討鄒杜王九思撰墓碑世求士於巖穴旌賢

於築釣凡以興道善俗焉耳矧予遠臣之先其人雖往其
善足徵而可使其弗彰耶爾呂鑑乃南京禮部右侍郎構
之祖父和易有守質直無華衣冠不詭於民行已實符
於往哲敬人以禮侮慢者致其忝待物有容孺刻者服其
量且又明農圃之務導詩禮之源修德懷刑既老彌篤朕
方求若人以範俗乃今立慶典以推恩是用贈爲通議大
夫南京禮部右侍郎爰籍寵光用彰潛懿庶我近臣之祖
承流身後之芳誥曰國家善善之義長凡官至三品則
封及二代然而與此典者作不一二可謂難矣爾魏氏乃
南京禮部右侍郎呂構之祖母夙全懿行克相良人致有

賢孫佐掌邦禮雖世數浸久而慶澤固存茲特贈爲淑人
茂昭三品之恩用慰九泉之魄尚惟祇受以裕後昆
日繼祖母媿德於祖而於父有訓育之恩是故孫階顯仕
而封贈及焉爾劉氏乃南京禮部右侍郎呂姆之繼祖母
貞靖柔嘉孝慈勤儉二世之後乃毓寶孫積慶所鍾遠有
端緒茲特贈爲淑人昭世德也精爽匪遐尚期祇受碑
日公諱鑑字西安高陵人也其先出自成周太公望封
齊而居於呂厥後乃遂爲氏其在高陵歷籍漢唐文獻遐
魏弗能徵諸迨及有宋有諱世昌者慷慨灑烈超躍弗群
蓋嘗吊季代之委靡慕雲長之英烈模鑄金刃象其平生
置之祠廟而識名其鏃至今觀者罔不嘆息擬諸國士之
風焉由斯以降有諱彬卿者生子三人其長曰大次曰十
又次曰珪通經發跡作邑於淇大之行八人乃特稱而淳
樸慤直聞言不信洪武之初十司學庠乃以虧餉發戍於
北平永樂之初大亦累繇於齊東其諸裔留者縣縣延延
彌久而昌與高陵敵矣生有三子其長曰興體幹魁梧腹
加抱鼓言論便便不離中公嘗爲麻下里老夫接詞善聽
或以不爭返梁民之遺金葬親之朝乃值嘉暑獲其沃水

之報藉以弗死與生二子其長曰貴弱齡補成綽有勇畧
 督役伐木棟梁京觀尋役靖虜被知元戎乃佐金湯之積
 潘甘源之利興帷薄之俗破穿窬之穴貴配鄭氏實生公
 及其二叔清鍾暨側室子文鍾乃續學爲郝縣丞蓋呂氏
 之興代有懿德延及公世日益隆茂惟公體貌魁岸鬚髯
 踈秀粹出天秉聰哲內韞夫其器量淵邃物至有容而服
 誼之節剛亦不止蓋嘗訟割稅之誣以折宗人之強遠侮
 慢之跡以召敬恭之心仁勇具備直而不餒至於息李氏
 墮嬰之禍遷曾祖母崇邱之葬誼所宜舉不以貧沮忠謀
 之施具出腎腸可謂惠洽隣比恩覃枯骸者矣而又欽詩
 書之族崇耄耄之禮明農圃之務嚴涇渭之流修德懷刑
 老且彌篤於時冠帶之徒杖履之老申同德之嘉盟嚮山
 林之高蹈者彬彬焉雍雍焉土垣茅茨之下獲親夫康衢
 擊壤之遺風也爾乃搗謙抱冲朝夕惴惴若涉淵水罔敢
 或易培深履遐享年八十有四以弘治戊午閏十一月十
 四日考終正寢配夫人魏氏繼配劉氏咸以貞淑秉嘉孝
 慈勞勤克相於公蓋雖孟女之禮伯鸞媿婦之寶卻缺無
 以過之魏夫人生有二子其長諱博率履秉誼世德作求

卽宅凌墓

其次曰博溥生三子其長曰梅德博學博識皇猷天
 子休之擢進士第一授翰林院修撰進德經筵乃又覃
 恩錫類貽封所天光於邦國聞於四海其次曰梓又次曰
 相增廣生員勵節篤行願學顏子不幸早卒博生二子其
 長曰揚秦王典膳其次曰檣柎生子田騶虞之仁少則
 成性亦增廣生員辭曰煌煌厥呂肇自有周裔於高陵實
 繁且悠烈士顯名有赫劔矛翕而勿散貽厥孫謀四世九
 人名德嗣興或躋應仕或戎或耕世澤之覃於公是疑於
 休繼公令德彌純生枯拯殞戢侮廣仁丕承厥祖祐啓後
 人元子峩峩乃有冢孫歸棖祖源維公之教朱板方來晰
 乎有曜爰茲勒
 銘萬禩是告

均州知州郝滋墓在合村有勅命舉人劉時蘭撰誌

國家隆使臣之禮錄教子之功爵賞既加其身褒封必及
 其父義實通於今古制不異於存亡爾郝銘乃河南開封
 府中牟縣知縣滋之文晦跡韜光讀書履善義方之美已
 收效於鄉科祿養之榮乃遺哀於邑宰眷維清德宜賁褒

章茲特贈爲文林郎河南開封府中牟縣知縣靈爽如存
 尚其歆服 勅曰母德之成義實兼於教育恩之錫禮
 特重於褒封肆緣報德之情誕示追崇之命爾朱氏乃河
 南開封府中牟縣知縣郝滋之母生有懿質嬪於名門善
 相良人播賢聲於宗鄰篤成令子著嘉績於侯封顧風木
 之感旣深而綸綍之褒宜厚茲特贈爲孺人尚期神爽之
 昭益迓寵靈之賁 勅曰郡縣親民之政非按部莫能詳
 朝廷錫命之榮在司封爲甚重故法有定制而恩有特施
 克沾旌異之名必在褒嘉之列爾河南開封府中牟縣知
 縣郝滋名登鄉榜官領品符愛民存愷悌之心持已勵清
 勤之節賢勞茂著薦剡交騰宜有渥恩以示褒勸茲特進
 爾階文林郎錫之 勅命於戲治民莫先於獲上已徵名
 績之良善始尤貴乎保終庶竭猷爲之益訓詞具在尚克
 祇承哉 勅曰人臣有勞於國朝廷必寵其家肆惟伉儷
 之良亦被褒封之命典章具在存沒攸同河南開封府中
 牟縣知縣郝滋妻劉氏出自名門嬪於良士閭儀祇肅德
 性幽閑方資內助之勤遠違借老之願爰徵徃懿用示褒
 恩茲特贈爲孺人庶靈爽之有知服休光於無斃 誌曰

高安縣志

卷之七 邸宅陵墓

七

公諱滋字洪濟其先安肅人八世祖天挺仕元進授冀國
公天挺生溫兵部侍郎溫生經翰林學士謚文忠公經生
采麟肅政廉訪使采麟生濟郎公曾大父自孟州徙高陵
大父達國朝擢武鄉教諭父銘以公貴贈文林郎母朱氏
爲孺人累世積慶而公生焉公性穎異孝友自幼失恃讀
書輒通大義稍長入邑庠勤學不倦成化辛卯以禮經領
陝西鄉薦游太學友天下士焚膏繼晷凡三年丁外艱哀
毀踰禮事繼母劉氏孝蹟著聞弘治癸丑授中牟令晉大
夫趙氏邑密邇藩臬民尚奔競素稱難治公下車守廉奉
公不避權勢抑強扶弱興利除害不踰年境內大治有水
患歲常淹沒民田公築衛民堤一十八里植柳衛堤退出
閑田千頃民甚得利農隙命民採薪陶甃鳩工聚材修建
公館九十餘間分毫不取於民解舍煥然一新明年秋螟
蝻蚕賊害禾殆盡公祭於漢魯公祠次日陡風一陣四虫
皆抱禾而頽落地盈尺誠與魯恭三異爲不異也邑之致
政劉懷上公政蹟三十事當道極口稱讚若都憲徐公恪
劉公大夏陳公道巡按潘公楷劉公偉楊公倫皆以廉能
舉薦於朝遣官旌獎羊酒采緞至再至三民之愛戴親

如父母且衛民有記殞蝗有碑士有誦童有謠足傳不朽
不見所謂奔競難治者公之政也其他學校之興風俗之
移盜賊之息不可勝記又能樂施周急若訓導李端驛丞
陳清卒於清貧妻家又出人之所難九年秩滿以公位不
滿德擢湖廣均州太守牟民又起不福之嘆越一年俸望
方隆而公不諱時弘治癸亥六月三日享年六十有五距
生正統己未正月七日配劉氏駿有令德贈孺人生於正
統戊午正月二十六日卒於弘治戊申十二月十二日享
年五十有一繼娶王氏內助
尤多不爽懿範子男一紹先

行人孫先生諱昂墓在縣慶豐里均下村戶部郎中高選

撰誌

誌曰廷舉姓孫氏諱昂廷舉其字也世籍西安高陵

慶豐里人曾大父諱六大父諱亮世業農不仕父諱
祿歷仕巡檢母高氏生廷舉應弘治戊午鄉舉中壬戌康
海榜進士試事福建道越二年甲子授行人歷三月餘卒
於官實弘治十八年正月三十日也歸於家其子汝弼將
以今年正德丁卯三月二十七日卜葬於祖塋西北廷舉

門人呂仲木乃為狀請于銘予與廷舉同學且在交契中而仲木又懇以請遂不能辭按狀廷舉生異群兒自幼有大志父携之任有恃其官而侮之者廷舉正色曰此豈可以誇人哉吾他日不為是也時年纔十二三矣比入邑庠莊重詳雅言動不苟師友咸矚重之成化甲辰乙巳歲大凶歉廷舉曰此時若不通變以為衣食之計親將不免於饑餓矣即投其學業而西詣階岷移粟於家以供親養是以雖當人相食之年而親得溫飽無恙鄉人咸以孝稱自是復於學舍志力益堅隆冬以羊裘被取麥草藉之足下苦於誦習常至夜分或至達旦同號舍者不拘時分皆取燈於廷舉焉又以親老在家不能侍養為歉暮則自學至家晨則自家至學日常徒步二十餘里故定省學業兩不曠廢人皆以為難弘治壬子遂菴楊先生督學關中鄭重文行之士廷舉為吾庠首選者屢之既而果登鄉舉應試禮闈不第依親於家辛酉歲與其友人同榜劉廷馥肄業太學共一僕以給炊爨尋登進士移居興隆寺延廷馥同處仍借此僕之力其澹泊艱辛如太學然士論賢之廷舉素不喜作詩一日思親不置慈烏適反哺嗷嗷鳴於僧舍

榜樹乃爲不如慈烏詩以悲定省之曠既拜行人忠信以處察宋廉整以自操持日常誦書讀法不輟還爲一書遺其子汝弼名曰教子鄙言自奉先事祖以及務農修行凡十數欸其言切實俱有法度初在邑庠時從遊者甚衆教人惟以敦本尚實修德謹行爲事故一時及門之士多有所成就其舉於鄉以俟會試者則周克述紹與仲木也嗚呼廷舉以勤苦自勵而不伎求他人之有以強毅漸漬爲學而不鹵莽於一日二日之得與夫當其事而能處之詳審以密務乎內而不事表暴於外者茲固諸生以爲不易學至其卽時論事蓋將有志於天下國家豈意歷官未久而遽疾不起使其進不能以大有所爲而其才卒於不究此豈不謂之天哉廷舉生成化丁亥距卒之年三十九歲娶李氏克闕婦道子男四長汝弼娶田氏次汝直聘錦衣衛力士邑人段林女次汝鄰與汝直讀書熟稱聰悟足承廷舉之志次在襁褓幼名永世女二長名棗字生員周官次名椒字張聘是宜有銘銘曰嗚呼廷舉天胡大其進而不使得遂其所止天胡奪之速而不使得究其所以外則有徒內則有子天其或者將顯廷舉於此邪

垣曲縣丞周先生諱尚禮墓在邑城北戶部郎中高選撰

誌其子知縣紹墓在其側涇野子撰表

誌曰小學之教不行久矣吾邑周先

生自幼端謹莊重以歲貢為國子生家居授徒殆百餘人皆邑之秀俊先生之為教也取古之孝弟忠信勤學修身以及嫻睦友鄉才能政治者日講一條督令躬行其他洒掃應對出入起居俱有法度諸門人不敢違也故一時及門之士多漸漬以成其上者雖孔門可入矣中鄉舉者二人并其子紹為三人充邑庠廩膳生可望甲科者十人登戊辰進士第一名者一人皆自先生之啟迪造就然也小學之教吾邑如先生者不可謂之能行耶先生諱尚禮字節之世籍高陵父勗以國子生為太原縣丞先生從父之任時太原君率太原之民兵戍雁門太原民以太原君之去太原也相率避難趨府城居之先生獨與二三從者居太原待太原君不懼也時先生年尚弱孺而穎拔不群如此後為垣曲丞廉謹自持能愛百姓謝政歸家囊無餘貲民至泣下送之由此觀之則先生之所以教人者豈為無

本爾邪祖德成不仕自曾以上兵燹之餘不可考矣生
正統元年二月十七日卒正德三年四月十五日享年七
十三配劉氏貞惠勤儉克相以道繼室孫氏其相先生亦
如劉子男四經綸繼紹皆劉出紹有遠志尋當大成先生
為不沒矣女三亦劉出孫男五邵邪鄧董生也進綸嗣也
郊高出也孫女八筮正德三年十一月二十六日合葬於
縣治之北從先兆也銘曰倚嗟哲人厥初童孺養正弗端
終其淪敗聖人垂言惟茲為要先生舉之波及牧民誰謂
先生官卑名虧表曰此吾友江陵君周君之墓也君諱
紹字克述號渭川高陵治化里人也曾祖諱德成未仕祖
諱勗以太學生仕為山西太原縣丞父諱尚禮字節之號
養浩軒亦以太學生仕為山西垣曲縣丞垣曲善教人枏
為童子時受學焉獲聞洒掃應對之節其歿也枏嘗為之
狀曰小學之教不行久矣至先生而後能復之配劉氏是
生江陵者也早遵庭訓篤志經史每為文字出奇古語行
輩率推先焉遂舉弘治甲子鄉試乃益肆志於學孝事
人繼母孫氏性好自取君事之克當其意其弟於兄經綸
繼遜讓周至見友朋為善者力勸其成弘治中縣士子無

治春秋禮記者雖其書冊亦不具經時史武功君早夜走
 武功得春秋二三冊友人程吉氏者始治春秋縣於是
 有春秋焉東吳來氏自孟津回收禮記又之來氏得禮記
 有牛生者初治禮記縣於是先是有禮記焉比銓天官乃受戎
 縣令戎縣漢民三而夷人七先是有禮記焉比銓天官乃受戎
 自待故戎劫奪殺戮無寧歲也君蒞政後奉身薄惡壹心
 民病滅汰征求而又教之禮義課其誦讀戎人遠邇大小
 無不敬慕畏服夷多羅姓至其半十以同名如日從周
 歸周學周云戎縣西南阿霞阿昧二鄉之田率被長遠縣
 民侵占累勘不明至勤干戈者十年也君處分得當夷漢
 咸安於是上官薦其清謹勤慎持正公平招徠蠻夷有方
 夷民咸悅云事聞於朝遂調任湖廣江陵縣是時江水
 方漲害及三縣一州君乃創築長隄至七八百丈人獲安
 居又議墾數千頃荒地以業窮民其水灘田地糧草盡為
 被害之民申請除豁若乃辨趙永寧人命之謹其心明允
 真可通乎鬼神於是巡撫張公稱其持心謹愨處事安詳
 倉庫既實衙門清肅而荆南道亦獎其處入之所難處秉
 實心有定守云惟以不善事太守致有訕謗解位而歸江

陵人如失父母焉君至家閉門教授清貧自樂垂及之年歲以奔走南北不常厥家光祿卿籍田馬公亦嘗友君乃呼其子從於三原飲食教誨至且有立又為之謀治石槨以葬則君之為人可知矣

通州衛經歷趙諒墓在良村有勅命勅曰人臣有勞於國朝廷必寵其親

此今昔之所同豈存沒而有異爾趙榮乃通州衛經歷司經歷諒之父邱團養素詩書傳家篤誠教子之功宜示追褒之寵茲特贈為徵仕郎通州衛經歷司經歷靈爽有知庶其歆服勅曰子之於母孝愛益極其深君之於臣禮義必從其厚故養有不逮而恩無弗加爾蘭氏乃通州衛經歷司經歷趙諒之母相夫勤儉教子嚴明子既能官祿不逮養宜加恩典以示追崇茲特贈為孺人換命是承幽局承耀勅曰國家設軍衛以安生民雖專武職置幕官以理庶務則用文階寓意甚深用人宜慎爾通州衛經歷司經歷趙諒發身胄監列職幕僚歷歲深課功惟最宜加恩典以獎勤勞茲特進爾階徵仕郎錫之勅命於戲官不計崇卑必求其稱事不論難易務底於成益勉進修以

高安縣志 邱宅陵墓

俟甄擢欽哉 勅曰夫婦之際風化所先君臣之間恩禮
攸在凡為伉儷必與褒封通州衛經歷司經歷趙諒妻陳
氏相夫有道治內無違夫既顯庸爾宜倍
貴茲特封為孺人服此嘉名益勤內助

南京國子監典籍李先生諱崇光墓在西吳里許村有

勅命前翰林院修撰康海撰墓表 勅曰國家於成均之屬
置典籍之官其事若簡

而任則專其秩若輕而責亦重留都所在厥職攸同爾南
京國子監典籍李崇光起家儒業列職實關謹載籍之儲
式勤綜理守成箴之戒克懋操修屬茲慶典之行宜示褒
嘉之寵是特進爾階登仕佐郎錫之勅命於戲居官以盡
職為良保譽以永終為善尚加茲慎以伏階明欽哉 表
曰君諱崇光字宗顯其先故臨潼人元季徙居高陵因世
家高陵西吳里高祖文秀生十三十三生剛剛生芳芳娶
劉氏生君兄弟五人君少被擇為縣學諸生習朱氏詩正
德庚午以太學生授南京國子監典籍三年病瘧與痢卒
於官時甲戌九月二十九日年纔五十六也配魏氏生男

二人長純次毅讀書欲爲士女子四人長爲翰林院修撰
吾友呂仲木妻已封爲安人次受聘孫氏歿又次嫁商尚
質又次嫁三原學生鄧世泰孫女子二人明年乙亥八月
六日將葬君西吳先塋之次純持狀請表諸墓石余曩與
呂君遊呂君數數稱君孝弟能讓余以爲美德後聞其營
置家事井然有條理若稍見材度矣然當富厚充裕之地
又能躬儉不奢宜其久視遠享迺止如此銘曰嗟嗟李君
厥德孔懋孝友共和靡有弗厚肇遊太學其氣已豪富而
克儉古聖所褒迨及典籍冊書之紀惟勤勿斁是云諧只
三歲宦成我績旣優其陟方來病乃弗瘳金陵高陵其道
孔艱魂來雖遙靈佑且安仲秋吉日永蒞立室刻石告哀我心用恤

封翰林修撰贈南京禮部右侍郎涓陽呂公溥墓在祖墓

隅有誥命前翰林修撰康海撰墓表右有弟 詔賜壽官

諱博墓光祿卿馬理題蓋楠爲誌

誥曰朕以禮典告成
覃恩宇內凡通籍於朝

者咸得以追賁其所生矧予舊學之臣乎爾封儒林郎翰
 林院修撰呂溥乃南京尚寶司卿柎之父躬備純德名聞
 鄉邦訓子克成爲國俊彥生沾褒典歿被卹恩天之祐善
 不爽乃若是哉茲特贈爾爲奉政大夫南京尚寶司卿用
 侈爾有子之榮亦昭我得賢之美九泉弗昧尚克歆承
 誥曰母之賢於子微之故緣子貴母國有令典存歿一也
 爾贈安人宋氏乃南京尚寶司卿呂柎之母生有淑資克
 循內則慶鍾嗣子慈訓有徵載錫寵章慰爾泉下養雖弗
 逮名則永昭茲特贈爲宜人靈爽有知服茲殊渥 誥曰
 古稱繼母如母蓋以其配德於父恩宜均焉爾封安人侯
 氏乃南京尚寶司卿呂柎之繼母敬以相夫慈能成子爰
 頒新命增耀前封茲特封爲太宜人既壽而昌永綏祿養
 誥曰夫生有美行則沒有易名此朝廷待大臣之禮而
 其親不與焉乃若褒贈之典榮及九泉雖群臣亦得以行
 於親而易名固在其中矣是知贈典所係亦重矣哉爾贈
 奉政大夫南京尚寶司卿呂溥乃南京禮部右侍郎柎之
 父性秉端純行敦孝友平心率物訟者望廬而還正己齊
 家族黨嚮風而化矧有令子爲國禮臣非徒特論是歸亦

乃朕心攸屬伊誰致此爾教則然茲特加贈爲通議大夫
 南京禮部右侍郎庶幾贈秩之榮有同易名之寵爾靈如
 在式克歆承 誥曰國家賴賢才以爲用而賢才之成率
 有內教焉蓋本源之地所係尤切也爾贈宜人宋氏乃南
 京禮部右侍郎呂柟之母舍貞稟懿垂範厥家訓子有成
 名顯當世雖祿養未逮而淑問永傳茲特加贈爲淑人章
 內教也九泉有知歆此殊渥 誥曰繼母於子有教育之
 恩故國家錫類褒封一視其母蓋本其情而爲之節文也
 爾封太宜人侯氏乃南京禮部右侍郎呂柟之繼母恪持
 內範允嗣前徽協乃義方均愛厥子顧今顯貴惟乃之休
 茲特加封爲太淑人尚克欽承益敦內教 表曰公諱溥
 字某世家高陵人始祖曰世昌又幾世至彬卿生八八生
 與興生貴貴生鑑鑑娶魏氏生公及其弟博公長子柟者
 海友也海以柟友則數之高陵因得數拜公親見其容貌
 聞其言論觀其行事知公之宜有柟也公以正德丙子五
 月丙申卒於家七月戊子葬於縣北祖塋柟以海爲公墓
 碑公鄉里恒人無麗辭耀藻之要譽文學無豐財崇秩以
 驚炫流俗無奇節詭行以聳動世習然海數言不置示天

下以長者之道所以廣教布德懲勸浮靡也海惟公樸實
 不華耕鑿飲食之外一無所為海不敢誣之曰遁世不仕
 也孝親友弟守身畏法處親戚鄰里無所欺負治生期於
 僅足責人不為己甚雖傳記所載典冊所訓何弗啻哉此
 公之大畧人人易言之人人不能為者故君子素其位而
 行不願乎其外若公者於此道庶幾否耶公美髯鶴幹望
 之如神仙達識事體深計者莫能會其意其指摘是非談
 述義理學者或鮮焉志稱其决魏某詐嚇李州判之事豈
 非其事實哉墨劉之鬪墨嘗謀酖其老病償劉矣片言之
 間却酖已鬪生墨氏長少蓋幾人也其後又解娠婦之死
 平劉李之怨訟買田逋稅者官不能稽諸板冊以公一言
 而决縣官定徭役辟於里書方伯至亦信以去公言諸富
 平道中方伯即歸以正之其已壯哉公居常惡衣糲食休
 休自娛既受封貴顯猶著補綴屨繩布終其身無怨恚於
 人少日以大戶輸餉榆林同輸者為掩味得貲皆笑公歸
 亡完屨乃同輸者發覺破產易子公獨安居闔闔至今應
 輪者必自戒飭日慎不可不若呂公公閒居常謂換日汝
 知仕之大本矣乎無他惟在慎取子爾有餽者至日無故

而餽豈無所為也輒令返之寢疾經兩歲桷晝夜侍不敢
 少怠或履聲稍震猶屬色以責曰汝侍天子側亦當爾
 耶病且革呼桷語曰汝受朝廷榮寵他日當竭力報
 國無得自逸事宜谷稟汝叔而行公所以愛其弟者死猶
 未已也曩聞高陵人言公壯時父命為居室將與弟異乃
 擇大木為弟室弟讓公公曰安知為汝室也室成乃卒以
 與弟配宋氏潘府教授宋公之孫女也以身教子凡枕輦
 刺繡故實必曰此賢此孝講說大意疊疊不倦又恒誦其
 祖敬授公之遺行以詔桷故桷之所以為天下之士者其
 父母之教有然也公生正統戊辰五月戊戌春秋六十有
 九安人與公同年生七月己巳卒弘治乙卯五月庚寅壽
 止四十又入正德癸酉春以桷封公為儒林郎翰林院修
 撰贈宋為安人而繼室侯氏亦加封安人焉子三人桷舉
 正德戊辰進士第一官翰林院修撰為上經筵講官仲
 日梓歿季曰栖縣學生孫子三人田乙酉舉人昀桷子留
 梓子誌曰叔父諱博生而英敏強毅弱冠即服賈四方
 諸練家人生產業作務本力穡耻事華靡上事吾祖贈公
 暨祖母魏淑人及繼祖母劉淑人咸得其歡心魏淑人每

饗殮除米一勺恒買栢香夜焚以拜... 斗人... 穉佛叔父
 恒為子姪誦說不倦贈公或有過... 吾父直... 無少回護
 叔父輒能婉諷贈公函皆與納受其事... 吾父恭遜讓謹不
 知有己當患難窮困之際必先力往不避... 吾父嘗患怔忡
 疾叔父皆應時區處以安其心成化甲辰乙酉間歲大旱
 關中尤甚人率四出求食當是時叔祖呂三公方為祁禱
 之叔乃留吾父於家事贈公劉淑人乃身送母媼...
 事塾師周先生父力禁不欲耕為識字人曰恐壞爾性也
 蓋有見於士流之放蕩不檢者云耳叔... 目此兒慧可教
 也焉知其不能戒柙凡購書策筆劄皆於叔父取給至有
 今日多叔父之賜也其教愛楊檟周至亦可知已若乃還
 遺金而不私救饑寒而解衣推食辨釋人命之誣如王氏
 劉氏孫氏程氏數十輩皆其緒行也叔父配陳氏勤儉柔
 嘉實多內助乃先叔父而卒遂繼配陳氏張氏焉叔父生
 景泰六年乙亥四月二十七日卒嘉靖十八年七月初三
 日享年八十五

贈知縣劉勤墓在邑東北隅有 勅命大學士任邱李公

撰墓表 勅曰積善在躬慶澤必垂於後效庸於國寵命必

直隸任邱縣知縣守臣之父隱德持身義方訓子

望克舉今官用贈爾為文林郎直隸任邱縣知縣宜

知服茲無斃 勅曰朕惟子賢雖本於父而其母之功亦

比隆焉宜並受乎幽章庶少酬乎罔極爾王氏乃直隸任

邱縣知縣劉守臣之母既相其夫復成厥子顧祿養之弗

逮宜尤寵之攸加茲特贈為孺人尚克欽承永光泉

表曰隱君任邱縣知縣劉君克艱之 嘉靖丁亥秋畿內巡按御史以克艱治有異政上旌於

朝於是隱君得贈如克艱官歲壬辰克艱以臨清知州入

覲京師事竣來謂余曰守臣不幸父母早逝墓無表識私

切痛焉予昔居憂於家與克艱處凡三歲又先母邊太淑

人蒙贈葬克艱承命經理修築不擾於民事集而功就余

心感焉迄今不忘誼其可辭按狀隱君諱勤字警常世居

高陵大父諱榮父諱顯俱隱德弗耀顯生三子君為之長

邱宅陵墓

生而純質不喜華侈既長日事畝畝耻效市人逐什一之利又謙抑恭謹未嘗與人有所爭性孝友事父母極其誠敬凡時有鮮物父母未嘗不敢嘗承顏順志務極其心父母卒哀毀骨立杖而後起祭祀以時必敬必潔有所謂事死如事生者成化中弟璉嘗賈漢中值歲饑人相食家人洵懼謂且不測君徒步入漢中訪得之相携以歸竟不死兄弟共爨至老居積饒裕君一無所私里閭稱友弟者必曰劉君云邑尹良讓勤名於石朱璜著銘旌善亭曰自能爲善又能化人於善人皆以爲稱情每延鄉飲俱辭弗就嘗衣新衣偕友人赴飲見其衣敝卽更衣以行鄉人有盜穀於田者傭人縛之君曰是非爲饑寒所迫乎命解其縛仍與穀四束曰若能改是吾終不以語人其人卒不爲盜其長厚類如此正德辛未十二月十九日卒生正統壬申八月二十二日春秋六十有六配王氏有淑行贈孺人舅姑既逝遺女妹幼且多疾孺人撫愛如親妹爲擇所歸盛治奩具處妹姻戚無不意滿者族黨稱之年四十五歲先隱君卒弘治辛亥十月一日也子男二人長廷章次守臣舉鄉試授任邱縣知縣孫男一人思國子生於歲昔人謂

不知其父視其子克艱尹吾邑恭慎詳敏惠而不濫嚴而不苛有循吏之風今在臨清又善有蹟是非得於家庭之教乎此可以占隱君矣後之欲知隱君者尚有徵於余言哉

河南布政司都事趙秉彛墓在縣西張市里有勅命

族惟光祿之官國家所重故既置卿以領寺而又分署以備員亦得庶副茲任爾光祿寺良醞署監事趙秉彛發身胃蓋擢任今官蒞事惟勤持身罔玷歷年既久最考是著宜有渥恩以示褒勸茲特進爾階修職佐郎錫之勅命於獻官不計崇卑必求其稱事不論難易務底於成益勉進修以俟甄擢欽哉

寧蜀龍萬齡壽堂

無錫孫海觀滙東全校

邑士周映綵

邸宅陵墓

高陵縣志卷之七終

呂涇野先生續傳

明楊九式撰

呂文簡公郭下里人昫之父也按吏部文選司郎中章印李開先傳曰真醇道學在關中可繼張橫渠者涇野一人而已在我

朝可繼薛文清者亦涇野一人而已涇野姓呂諱柟字大棟旣而改字仲木西安之高陵人也居涇水之陽四方學者共稱爲涇野先生系出呂望後宋有呂世昌者始家高陵祖彬卿墓日墳中有聲如雷卜者以爲當顯於六世彬卿生八八生興興生貴貴生鑑鑑生溥溥配柴氏生先生

果符卜言先生資性穎悟始就傳於周尚禮習幼儀郎中高選見而竒之曰此子他日必成大器不但以科第先人提學東田馬中錫異其文收入縣學尚未總卯卽有志聖賢之學危坐朗誦矮屋中雖祁寒酷暑不踰門限年十四應試臨潼貧不能僦館投宿於新豐空舍內夜夢老人自驪山下謂曰爾其勵學後當大魁天下明日試補廩生母宋卒哀毀骨立旣祥受尚書於高教諭儔孫行人昂旣又遠從渭南薛思菴充然有得相繼督學者楊遠菴王虎谷屢試首多士拔入正學書院授以所學而聞見益博嘗夢

程明道呂東萊親爲指授而義理愈精于時有熊李二叅
政聞其賢欲延爲塾師先生以禮無往教辭之乃遣其子
就學於荒寺未幾聞父疾走還二公用驛馬追送弗受疾
平移居於雲槐精舍從遊者日衆不但叅政二子而已辛
酉年甫二十三中鄉試前名刻其文明年下第卒業成均與
三原馬伯循秦世觀榆次寇子惇安陽張仲修崔仲鳧林
縣馬敬臣輟舉業而講理學久之德業進修踐履篤實蓋
有悅而不及人不及知者時或與他友習古冠婚士相見
禮 孝廟寶天衆在順天府哭臨惟具禮耳先生則涕淚

交下通國異而譁之弗恤也。孫行人歿爲之服衰拜送吊客。戊

辰會試。以治書中第六名。據卷當居第一。主考欲取一易

卷。本房力爭不可得。主者以爲此劉養正也。拆卷乃邵端

峯銳。劉後佐寧藩謀反。自縊死。王陽明以文祭之曰。母死

不葬。爰及于戈。一念之錯。乃至如此。君臣之義。吾固不能

宥子之身。朋友之義。吾猶得以塋子之母。特著其事。以見

世之取士者。勿徒徇虛譽而有玷科目云。廷試讀卷官見

其筆畫端楷。策冒仁孝字正合題旨。遂以首卷進呈。武

皇御覽嘉賞。遂賜狀元及第。湛甘泉爲同考。批其卷云。卷

雖佳。惜力微不能首薦子。然子固已魁天下矣。自鄉試至是僅八年。已有成帙詩文集。其春陰履霜等作。不亞名詩。而子畏於匡傳。甚高古。雖王漢陂補周語。李崆峒擬趙高答李斯書。無以踰也。入爲翰林院修撰。經筵試場史局其職也。進講竭格心之誠。考校號得人之盛。而編摩稱秉筆之公。受祿祀先。祝稱某之子某。聞者羨其知禮。父母書至。對使拜受。退而跪讀。其他親友有書。受讀亦各有儀。聞期功喪。必爲位哭奠。凡饋遺非禮。一毫不受。逆瑾擅權竊政。附麗之者。驟遷顯秩。先生雖同鄉。獨不出其門。且却其贄。

禮瑾已不堪。又因西夏搆亂。上疏請上入宮親政事。則禍患潛消。內外臣工。可常保富貴。瑾更惡其直。欲殺之。先生遂與何栢齋相繼引疾。何亦骨鯁。當時所不能容者。遣官校尾其後。俱不得其過。至半途返。先生抵家數月。瑾誅刑及大家宰。遺累陝之縉紳幾盡。人以是服其智。杜門謝客。力田養親。若將終身焉。父或因小失責。次子梓先生。疏而願同受責。父怒乃解。科道薦剡交上。而王廷相尤剴切。往拒宦寺。已見卓識偉節。年來學術淵闕。操持嚴毅。正宜名擢大用。以答人心。乃起供舊職。勸上勤學。謂文王

緝熙敬止咸和萬民斯享靈囿之樂元順帝廢學縱慾
太祖一舉而取之可爲深戒或曰元主云云傷於太直先
生曰昔賈山借秦爲喻文帝尚能用之矧主上明聖遠
過漢文而吾獨不能爲賈山乎疏上蒙嘉納以乾清宮
災覃恩封其父爲翰林修撰承德郎母及繼母侯氏配李
氏生封歿贈俱爲安人復應 詔陳言六事其遺去義子
番僧及取廻鎮守太監尤爲人所不敢言言雖中寢聞者
憚之仍以仕非其時求退途遇秋旱禾稿白諸當道薄其
征王虎谷爲都御史願舉先生相代父病侍湯藥夜帶不

解畫履無聲及其卒也痛哭嘔血將合塋母喪其一指
先生額天號痛若不欲生尋復得之土壤忽大雨如注跣
舞踊蹈泥淖中道路環視至有泣下者塋畢廬於中門外
哭猶旦夕不輟自成服奠塋遷柩題主以及卒哭三虞兼
大小祥至於脫禫斟酌損益各有儀注楊東江塋其父母
及予塋母踵其遺意行之鎮守太監廖鎧購以金幣立却
之客有託交遊以三百金求書者先生峻拒之曰人心有
如青天白日柰何以禽獸相視也客慚而退都御史盛應
期御史朱節熊相曹珪薦其不當久在家居適今 聖天

子入繼大統。首召先生。遂幡然有用世之志。次年壬午。改元嘉靖。與修武廟實錄。上御經筵。先生輪當進講。是日值仁祖淳皇后忌辰。口奏宜著慘淡之服。罷酒飯之賜。朝議避之。疏勸尋溫聖學。以爲新政之助。其畧曰。學貴力行。而知要。帝王之學。與韋布不同。須克己慎獨。上對天心。親賢遠讒。下通民志。太平之業。可不難致。大禮議興。意見與時不合。復以十三事自陳。議者謂爲大臣宰執之職。不宜引爲己責。因繫獄。尋謫解州判官。會知州林元叙卒。遂攝州事。於是恤熒獨。減丁役。勸農桑。築堤以護鹽池。開

渠以興水利。載諸署解文移者可考也。已又聚耆民鄉長。誨明教民勝文。行呂氏鄉約。及文公家禮。察孝弟節義者。標題其門。求子夏後。訓諸學官。建司馬溫公祠。正首陽夷齊墓。訂雲長關公集。奉迎其母。孝養以爲百姓先。鄰近及遠方學者日衆。初御史景爲關解梁書院以居之。擇民間俊秀子弟習小學之節。歌幽南之詩。民俗士習翕然改觀。庶幾乎有陶唐遺風矣。居三年御史盧煥等累薦稱其爲王佐之才。迺出漢唐之上。陞任南吏部考功司郎中。士民無慮千數。哭送至於河干。先生既渡河猶聞哭聲。琅琅乃

口占一絕云。試聽黃河東岸哭。爲官何必要封侯。去後州人感德不忘。爲之立碑以紀其實。塑像以慰其思。未幾陞尚寶司卿。政務簡省。得以閉門讀書。兼設教鷲峯之下。吳楚閩越士從之者。日有百餘人。時張相國應詔起用。道經南都。有醮禮爲賀者。先生托以官卑俸薄。拒之。通政王姓張之甥也。轉北祭酒。通國送之江上。先生獨不往。張啣之。欲乘機罷其官。乃以疾在告。不得遂其私。考績北上。至真定。得陞太常少卿。邸報還往時。太常會飲。皆役樂籍。更有雜差。先生悉與寬免。禁革道士俗粧。每月朔望。令演樂。

二次。太廟災。乞罷黜以答天戒。不允。自庚寅至甲午在
南都五六年。五六年間。豈不三四轉乎。然而皆散地也。乙
未始入而爲北祭酒。監中教典。士氣蹶弛不振久矣。遂以
道範師模。嚴自表立。敦禮教。勤講習。棄去一切煩文。一二
貴游子弟。稍不率教者。卽繩之以法。而乞差爭撥之風。頓
息。有以敷教在寬。而規先生者。先生曰。寬非縱肆之謂。乃
日刮月磨。以要其成。而不責效於旦暮之間。然曰敬敷。則
又不可不謂之嚴矣。古稱師嚴而道尊。道尊而民敬。意正
在此。今世人才。漸不如古。豈古今人真不相及哉。內則祭

酒外則提學。率多因循姑息。而不知人才日流也。先生立教雖嚴。然皆本躬行以率之。正心修身爲本。忠君孝親爲先。每季試諸生。必刻其文之優者。以示式。有德行著稱者。則揭之榜。仍早撥其歷。以示勸。病者問而鑿之。死者賻而歸之。間取儀禮及爲詩樂圖譜。分日講解。蓋禮以立之。而樂以和之也。禮讓之俗。粒歌之聲。洋洋於京師。首善之地矣。又言之吏部。謫一監丞。而兩廳六堂諸屬。罔不清慎者。不但教及諸生。雖歷事監生。觀政進士。向學中官。亦從而質疑問難。奏減歷日。以通淹滯。申飭監規五事。請之。上

皆報可識者以為自宋吳李章四祭酒外鮮見其比禮部

右侍郎仍在於南。自言眉淡不久。君其實心直不能隨

世耳。同諸公卿謁。孝陵眾將著緋先生曰望墓生哀只

宜青衣角帶。皇太子生蒙恩階通議大夫父祖俱贈禮

部侍郎魏劉二祖母生繼二母及其配俱封贈淑人廕次

子昀為國子生署吏部事薦文武士可備將相之選者數

人。寅長走簡歛祭張相。乃以黨姦拒之。且云一變而為正

人。有何不可。其亢直敢言有如此。長又榜暴夏相之愆。先

生以為聞之於朝可也。私示路人其可乎。亟勸收其榜。

及夏問霍事。應以大臣當以容人爲量。故夏疑先生黨霍。亦疑先生黨夏。後霍卒夏誅。先生之心。竟莫之白。上將躬視承天。顯陵累疏勸止。俱留中未出。捧表賀萬壽。節道出河南見饑孳。相枕籍。語所在。隨宜埋之。朝賀禮畢。尚未陞。辭值天變。乞得致仕歸事。侯淑人敬養備至。不殊。生母侯病。頭風。歎寒。親製艾艾。乃安。歲饑。則以俸餘。賙其族。人事叔博如父。姊適劉家。貧常分財濟之。痛宋外祖無嗣。每展墓。垂涕不止。從舅宋瑾流同州。務尋訪。還其鄉。侯卒。哀毀亦不殊。生母未及葬。以壬寅六月。左臂癱。發坐臥北。

泉精舍。至七月一日卒。山斗失韓。而洙泗無曾矣。生則成化己亥四月二十一日享壽六十四卒。則甲辰七月二十四日邑城良隅。卒日有雷火日食之變。及夕有大星隕於華陰。見者嗟異之。吾鄉哲人其當之矣。哲人孰有如先生者哉。取者以千計。高陵人爲之罷市者三日。解梁及四方學者聞之。皆設奠位。持心喪訃聞。上爲輟朝一日。賜祭命有司。營壙事未得。贈官加謚。反出端峯郤太僕之下。識者不無憾於禮官云。日後從祀孔廟。雖不敢預。必然提學。謝少南郡守李文昇已請之。撫按祀之。正學書院矣。其致

政而西也。人皆望其復起。其厭世而歸也。人皆惜其不能復生。千人之知不勝數。人之擠衆口鑠金。雖百身願贖。何益哉。先生頭顱圓潤。體貌豐隆。海口童顏。輪耳。方而兩目炯炯有神。鬚雖整秀。惜不多耳。配李氏。典籍崇光女。與先生匹德。咸休事。詳三石齋世寧墓文中。長子田。由舉人任汝寧府通判。娶桑繼劉張次子昀。歷任尋甸府知府。娶王郭李孫男田。出者名師。舉娶吳氏。昀出者名師。名聘張氏。孫女三。吳三錫。生員墨謙。王希曾。其婿也。俱昀出。先生雖官三品。履仕途三十餘年。座止圖書室。無媵妾。家無長物。

平生不以私事干人。亦不受人私干。門人相守數十年者。未嘗見有偷語惰容。乃家之孝子。鄉之善人。國之忠臣。而天下之先覺天民也。自來以狀元及第。不愧科名者。宋有王曾。宋庠爲名宰相。馮京爲名執政。而文山忠義尤烈。我朝黃觀之死節。羅倫之抗疏。康海之豪邁。其與先生皆彰著在人耳目者也。有疑陽明之學者。則曰。講其學而行非。勿信可也。不講其學而行是。信之可也。有劾甘泉之學者。則曰。聖君在上。賢臣在下。豈可使明時有僞學之禁之風。有問朱陸之學者。則曰。初時同法堯舜。師孔孟。雖入

門路徑。微有不同。而究竟本原。其致一也。先生雖講學。應文無虛日。但非其人。亦不願接。九卿請李序。菴祭文。同僚。浼蔡鹽商墓志。俱不之許。先生上可庶幾乎周之精程之。正邵之大朱之著述。不但橫渠近可兼乎。吳康齋胡居仁之長抑。又不但文清且古今經生。史臣騷卿。墨客才子。術士詩伯。文人豈少哉。然或華而不實。是而不真。其圓靈雖足以洞性命之原。而檢廸之功。或畧於微隱。其警辨雖足以聳來遊之慕。而持循之業。或蕩於高虛。其流至於假借。延緣。而標本殊觀。德教爲二者。容有之矣。先生所著有四

書因問。周易說翼。尚書說要。毛詩說序。春秋說志。禮問史約。涇野文集詩集。扈蹕錄。史館獻納。南省奏稿。內外篇。宋四子抄釋。詩樂圖譜。小學釋。高陵志。解州志。義勇武安集。寒暑經圖解。魏氏族譜。宋氏族譜。署解文移。論解州畧。足以闡經翼聖。紹往開來。乃仁義之精華。而孔顏之道脉也。其教人也。隨問而答。其用人也。因材而授。嘗云。學先其所短。用先其所長。是以海內士溫恭者得先生之讓。方正者得先生之剛。縝密者得先生之慎。清介者得先生之廉。慈惠者得先生之仁。堅毅者得先生之節。誠篤者得先生之

忠警惕者得先生之勤而善文事不足言矣使其得職銓
衡掌絲綸其所設施詎止此哉世之不知先生者但以爲
長于文而議禮者猶以爲偏于古文譏之高麗使臣亦欲
乞其文傳示外國且文果奚從而生乎易曰黃裳元吉文
在中也又言曰君子黃中通理正位居體美在其中暢于
四肢發于事業美之至也至美者既在其中至文者自達
之外而孟子之論氣有曰以直養而無害則塞乎天地之
間其稱大丈夫也亦曰富貴不能淫貧賤不能移威武不
能屈趙岐釋之曰淫者亂其心也移者易其行也屈者挫

其志也。心也行與志也。皆美之所在也。能無所遷移及屈然後可以爲之直養而無害矣。先生守堅力決。心定神閒。視順逆常變如一。又鍾以關中風氣。渾厚雄偉。剛毅奮強。而直氣將塞乎天地。富貴焉得而淫之。貧賤威武焉得而移。且屈之乎。予之繼妻其祖母呂氏。乃先生近派流寓齊東。舉族往來甚厚。太守公爲都事時。屢以書屬予。欲刪定其集。取其有關要者。止留數冊。簡便可傳。又欲作一文。詳述先生事蹟。集欲畧而事欲多。顧其集三十六卷。一時不能卒辦。先爲之作一傳。以副其意。先生知予以王漢陂馬

谿田康對山三公之薦在京師忘年與交別後音問不絕
其贈予中麓說及簡札集中乃不載何也其爲予脾扁大
書真得古法先生已有名公狀志似不待鄙人矣因竊據
之亦惟撮其闕要重爲一傳。文不佳而事可傳也。脉泉李
方伯存目嘗趨其成卽當各錄一通一寄太守公一焚脉
泉墓上云後隆慶元年追贈禮部尚書謚文簡公

